

San Juan

Cohãcjũ ye yahuducuyere yahuriquiroy masãnota iji dũcahye

1 ¹Duitapũta ahri yehpa to ijiato panopũta Cohãcjũ ye yahuducuyere yahuriquiroy Cristo masare yãhdũoatiquiroy duita iji tuhasae tiahye. Tiquiroy Cohãcjũ mehna ijiahye. Sa yero tiquiroy Cohãcjũta iji cãhno niahye. ²Duitapũta coã waropũre Cristo Cohãcjũ mehna ijiahye. ³Sa yero coã waropũre ne mariedarire bajumehneahye. Ahri yehpare, ùhmũsere, ijipihtiyere, masa gãhũre bajumehne dutiahye Cohãcjũ tiquiroy. Sa yero ahriye bajumehne pehoahye tiquiroy. Ahriye yojopũre mari ihãñene, mari ihãdari gãhũre tiquiroy bajumehnedagũ ne mariedaboya. ⁴Cristo catiyere ohoriquiroy ijiroy nine. Buhriroy marine to quehnoano ihãna masigũ yero saha mari Pacure quehnoano masigũ yere. Sa yero mari Pacure masigũ yere masare. ⁵Ahri yehpa cjẽna ñãñene wacũ, tiquina tutuaro cahmeñe nahitiano yero saha ijiye nine. Buhriroy quehnoano marine to ihãna masigũ yero saha Cohãcjũ ye yahuducuyere yahuriquiroy masare masigũ yere. Sa yero nahitiano buhriroy to yãhdũdũcaero sahata Cristore ne ñãñe yãhdũdũcaerare.

⁶⁻⁷Cohãcjũ Ñũ wame tiquiroy pehere ohoahye, Cristo buhriroy yero saha ijiriquiroy masare yahu mũhta dutiroy. Tiquiroy ohogũ Ñũ pehe masare yahuro ahtari tiquiroy yahuriquiroy Cristore ijipihtiyequina tiquina wacũ tutuatire. ⁸Ñũ pehe Cristo ijierari. Sa ijieraro tiquiroy Cristo pehere masare yahu mũhtano ahtari. ⁹Cristo buhriroy yero saha ijiriquiroy ijipihtiyequina masare Cohãcjũre masigũ yeatiquiroy pehe ahri yehpapũ ahtari jiri. Ijiroyta ijire ahri. Tiquiroy buhriroy yero saha ijiriquiroy warota ijire.

¹⁰Sa yero Cristo ahri yehpapũ ijiri jimedi. Ahri yehpare bajumehnediquiroy ijiahye. Tiquiroy sa ijiepegũta tiquiroy ya yehpa cjẽna tiquiroy ne masiedari. ¹¹Tiquiroy ya yehpapũ masa bajuari jimedi. Tiquiroy ya yehpapũ tiquiroy masa bajuariquiroy ijiepegũta tiquiroy ya yehpa cjẽna pehe ne tiquiroy cahmedari jiri. ¹²Tiquina sa cahmedapegũta apequina pehere ijipihtiyequina tiquiroy cahmeñequina pehere tiquinare Cohãcjũ tiquiroy pohne ijigũ yeri jiri. Tiquiroy wacũ tutuayequina pũrita potota tiquiroy pohne warota ijire. ¹³Tiquina Cohãcjũ pohmeta ijiye nine. Sa ye masa tiquina masa bajuariroy saha ijierare, Cohãcjũ pohne tiquina wahagũ.

¹⁴Sa yero Cristo masuno tiqiuro iji ducari bato mari mehnata ijire tiqiuro. Tiquiro sa ijigũ ihñana masare cahñiquiro, potota yahuriqiuro tiqiuro ijigũ usã masii. Tiquiro dihita Cohãcjũ macuno ijiro tutuariqiuro quehnoariqiuro ijiri. Tiquiro sa ijiriquiro ijigũ usã masii. ¹⁵Ñu Cristore yahu muhtano ohõ saha ni sañuducuri masare yahuro:

—Siquiro ahtare yũhũ ohõ saha ni yahuriqiuro: “Tiquiro yũhũ bato ahtariqiuro ijire. Sa ijieperota tiqiuro yũhũ yũhdũoro tutuariqiuro ijire. Tiquiro yũhũ masa bajuato panopũ iji tuhasahye. Sa yero tiqiuro yũhũ yũhdũoro tutuariqiuro ijire”, masare yũhũ ni yahuriqiuro ahriquiota ijire, nidi Ñu Jesure masare yahuro.

¹⁶Tiquiro Cristo pehe quehnoano tutuaro masare cahñiquiro ijiro marine ijipiltinare quehnoano yeducuri. ¹⁷Cohãcjũ dutiyere Moise pehe cũ muhtahye marine. Jesucristo pehe Cohãcjũ masare tiqiuro cahñene buhero ahtari. Cohãcjũ tiqiuro potota yahuducuye gũhũre buhero ahtari. ¹⁸Masa ne Cohãcjũre ihñedare. Tiquirore mari ihñedapegũta tiqiuro macuno ihcãquiota ijiriquiro tiqiuro Pacũro mehna sa ijiducure. Sa yero tiqiuro Pacũrore marine masigũ yeri.

Apequina Ñu wame yeriquirore sinituahye
(Mt 3.3, 11-12; Mr 1.2-3, 7-8; Lc 3.4-6, 15-17)

¹⁹Usã acaye judio masa pũhtoa Jerusalẽpũ ijieyequinare pahiare, Cohãcjũ wũhũpũ dahrayequina gũhũre Ñu cahapũ ohori jiri. “¿Noa boro ijiajari muhũ?” ni sinitu dutiye ohori jiri tiquinare. Tiquina sa sinitugũ ohõ saha ni yahuri Ñu pehe. ²⁰Yeero boro marieno yahuri. Potota yahuri:

—Yũhũ Cristo Cohãcjũ masare yũhdũo dutiro tiqiuro ohorigũ ijieraja, nidi tiqiuro.

²¹Tiquiro sa nigũ tiquina pehe tiquiore pari turi sinituri tja:

—¿Muhũ Cristo ijieragũ Elia pehe ijiajari muhũ? nidi tiquina.

—Ijieraja yũhũ, nidi tiqiuro.

—¿Usã coherigũ Cohãcjũ yere yahu muhtacjũ pehe ijiajari muhũ? nidi tiquina.

—Tiquiro ijieraja yũhũ, nidi Ñu pehe.

²²Tiquiro sa nigũ tiquina tiquiore pari turi sinituri tja:

—Usãre sinitu dutiriquinare usã yahuro quehnoano poto usãre yahu madoqueohya. ¿Noa boro pehe ijiajari muhũ? ¿Muhũ basita dũhse ijigũ ijiajari muhũ? “Sa ijigũ ijiaja yũhũ”, ni yahuya usãre, nidi tiquina Ñure.

²³Tiquina sa nigũ ohõ saha ni yũhtiri tiqiuro:

—Masa marienopũ ohõ saha ni sañuducugũ ijiaja yũhũ, Cohãcjũ yere yahu muhtariqiuro Isaia munano tiqiuro ni yahuriro sahata: “Mari pũhthoro tiqiuro ahtato pano mahare mari quehnoyuro saha quehnoana ijiyuya masa”, ni masare yahu sañuducugũ ijiaja yũhũ, nidi Ñu tiquinare.

²⁴Ñure sinituyequina fariseo masa tiquina ohoriquina ijiri. ²⁵Sa ye tiquina Ñure sinituri tja:

—¿Muhũ Cristo, Elia, Cohãcjũ yere yahu muhtagũ usã coherigũ ijierapegũta dũhsegũ masare wame yeajari muhũ? nidi tiquina.

²⁶Tiquina sa nigũ tũhoro yũhtiri tiquiro:

—Yũhũ aco mehna masare wame yeaja. Apequiro pehe mũsa masieniquiro pehe mũsa watoa iji tuhasare. ²⁷Tiquiro pehe yũhũ bato ahtariquiro yũhũ yũhdũoro tutuariquiro ijire. Quehnoa yũhdũariquiro ijire. Tiquiro yero saha ijieraja yũhũ pehe. Sa yegũ tiquirore tũhotugũ, “Ithyo ijigũ ijiaja yũhũ”, ni tũhotuaja yũhũ, nidi Ñu tiquinare.

²⁸Sa ni yahuducuri tiquina, Betaniapũ Jordã wame tiri ma ape sie pahrẽpũ, Ñu masare tiquiro wame yerirorpũ.

Jesu Cohãcjũ ohoriquiro tiquiro yaquiro cordero yero saha ijiriquiro ijire

²⁹Ape decorpũ Jesu Ñu cahagã cjũno tiquiro ahtagũ Ñu tiquirore ihãano ohõ saha nidi:

—Ihãaña. Ahriquiro Cohãcjũ ohoriquiro tiquiro yaquiro cordero yero saha ijiriquiro ijire. Corderore mari wejẽdiro sahata masa ahriquiro gũhũre wejẽeta. Sa yariaro ahri yehpa cjẽnare tiquina ñañe yerire cohãnota tiquiro.

³⁰Ahriquirola ijire yũhũ ohõ saha nidiquiro: “Yũhũ bato ahtariquiro yũhũ yũhdũoro tutuariquiro ijire. Yũhũ masa bajuato pano tiquiro iji tuhasahye. Sa yero tiquiro yũhũ yũhdũoro tutuare”, yũhũ nidiquiro ahriquirola ijire.

³¹Yũhũ pehe ahriquirore masiedahti. Sa masiedapegũta aco mehna wame yei ahtaũ nii yũhũ acaye Israe masa ahriquirore tiquina masiatore, nidi Ñu.

³²Sa ni tuhasa Ñu yahu nemori:

—Espĩritu Santo uhmũsepũ bujua yero saha Cristo bui dijia ta, tiquiro bui wihiducagũ ihãañ. ³³Cohãcjũ yũhũre tiquiro yahueragũ tiquirore ne masiedaboaga yũhũ. Tiquiro yũhũre mũsare aco mehna wame ye dutiro ohoriquiro Cohãcjũ pehe ohõ saha ni yahu mũhta tuhasari yũhũre: “Espĩritu Santo dijia ta tiquiro bui wihiducanohriquiro tiquirota ijirota. Tiquiro pehe Espĩritu Santore masa mehna ijiducugũ yerota”, nidi Cohãcjũ yũhũre. ³⁴Yojorpũ pũritare tiquirore ihãa tuhasaũ yũhũ. Sa ihãagũ “Potota Cohãcjũ macũno ijire”, nii yũhũ mũsare, ni yahuri Ñu usãre.

Jesu buheyequina tiquiro piji mũhtariquina ijire

³⁵⁻³⁶Ape decorpũ Ñu mehna usã pũana tiquiro buhena usã ducugũ, Jesu usã cahapũ yũhdũ cãno nidi. Tiquiro sa yũhdũ cãgũ Ñu tiquirore ihãano, pari turi ohõ saha nidi usãre:

—Ihãaña. Ahriquiro Cohãcjũ yaquiro cordero yero saha ijiriquiro ijire, nidi Ñu.

³⁷Tiquiro sa nigũ usã pũana tiquiro buhena pehe tire tũhona Jesure nũnũ tãũ. ³⁸Usã sa nũnũ tãgũ ihãano Jesu usãre majare ihãa, sinituri:

—¿Yabere macana nijari mũsa? nidi tiquiro.

Tiquiro sa nigũ usã gũhũ sinituu tiquirore:

—¿Buhegũ, nohopũ ijiajari mũhũ? nii usã tiquirore.

³⁹—Yũhũ mehna ahtatjiãna ihãana taya, nidi Jesu usãre.

Tiquiro sa nigũ usã pehe tiquiro ijiropũ ihñana wahaũ. Ti pjere ñamicahapũ cuatro hora ijiri. Sa yena ti decore tiquiro mehna tojoaũ usã.

⁴⁰Usã puana Ñure tũhorina, Jesure nunũ tãrina yũhũ piti Andre mehna ijii. Andre pehe Simo bahũro ijiri. ⁴¹Sa yero duita tiquiro wahminore Simore maca, boca, tiquirore ohõ saha ni yahuahye:

—Mesiare Cohãcjũ marine yũhdũo dutiro tiquiro ohoriquirore usã bocaũ, niahye Andre Simore. Mesia usã ye mehna nina, Cristo nina niaja.

⁴²Sa ni tuhasa tiquiro Simore Jesu cahapũ neari. Tiquiro cahapũ esagũ ihñano Jesu pehe Simore ohõ saha nidi:

—Mũhũ Simo wame tigũ, Ñu macũ ijire. Yojoopũre mũhũre Cefa wame yeitja, nidi Jesu Simore. Cefa usã ye mehna nina, Pedro nina niaja.

Felipere, Natanae gũhũre pijiahye Jesu

⁴³Ape decopũ Jesu Galilea yehparũ waha duari. Sa yero tiquiro wahato pano Felipere piti ca ohõ saha nidi:

—Yũhũ mehna cjũ ijiacjũ ahtaya, nidi Jesu.

⁴⁴Felipe pehe Betsaida cjũno ijiri. Tiquiro Andre, Pedro mehna ihcã maca cjẽna ijiri tiquina. ⁴⁵Sa yero Felipe Natanaene maca, tiquirore bocaro ohõ saha ni yahuri:

—Cohãcjũ dutiyere Moise tiquiro ojoari pũpũ tiquiro yahuriquirore apequina Cohãcjũ yere yahu mũhtariquina gũhũ tiquina yahuriquirore usã bocaũ. Jesu Nazare cjũno, José macũnota ijire, nidi tiquiro Natanaene.

⁴⁶—Nazarepũre ne ihcãquiro quehnoariquiro mariedare, nidi Natanae.

—Ihñagũ taya mũhũ, nidi Felipe.

⁴⁷Sa ye Jesu cahapũ tiquiro esagũ ihñano Jesu pehe ohõ saha nidi Natanaene:

—Ahriquiro yojoopũ ahtariquiro potota quehnoariquiro judio masũno warota ijire. Tiquirore mehoñe ne mariedare, nidi Jesu Natanae pehere.

⁴⁸Tiquiro sa nigũ tũhoro Natanae pehe tiquirore sinituri:

—¿Dũhsegu yũhũre quehnoano masiajari mũhũ? nidi.

—Felipe mũhũre tiquiro pijiato pano, higueraũ docapũ mũhũ ijigũ ihñau yũhũ mũhũre, nidi Jesu.

⁴⁹Tiquiro sa nigũ Natanae pehe ohõ saha nidi tja:

—Buhegu, potota mũhũ Cohãcjũ macũ ijire. Mũhũ Israe masa usã puhto ijiacjũ ijire, nidi Natanae.

⁵⁰Tiquiro sa nigũ tũhoro ohõ saha ni yũhtiri Jesu:

—Higueraũ docapũ yũhũ mũhũre ihñarire masigu yũhũre “Cohãcjũ macũ ijire”, ni wacũ tutuare mũhũ. ¿Tita mũhũre sa masigũ yeajari? Ahri mũhũre yũhũ ihñari yũhdũoro Cohãcjũ tutuaye mehna ye ihñogũtja yũhũ mũhũre. Yũhũ sa ye ihñogũ ihñagũta mũhũ, nidi Jesu Natanaene.

⁵¹Sa ninota ohõ saha ni yahu nemori:

—Potota mũhũre niita niaja. Yũhũ masũ Cohãcjũ ohorigũta ijiaja. Uhmũsepũ parĩ maagũ Cohãcjũ tiquiro yequina angele yũhũ bui tiquina dijia tagũ, tiquina mũjagũ gũhũre ihñagũta mũhũ, nidi Jesu tiquirore.

Caná wame tiri macapü tiquina omoca dũhteropü Jesu wahahye

2 ¹Ihtia deco bato Canápü Galilea yehpapü ijiri macapü omoca dũhteri bose deco ijiri. Sa yero Jesu pacoro ti wũhũpü ijiri. ²Jesu mehna usãre tiquiro buhena gũhũre omoca dũhteropü pijiori tiquina. ³Ti bose deco cĵẽ vino pihtigũ Jesu pacoro tiquirore yahuri:

—Yojopũre vino pihtia wahari, nidi ticoro Jesure.

⁴Ticoro sa nigũ tuhoro Jesu ohõ saha nidi:

—¿Iño, dũhsego tago tire yũhũre yahuajari mũhũ? Masa yũhũre tiquina masiato dũhsarĩne, nidi Jesu tiquiro pacorore.

⁵Tiquiro sa nidi bato tiquiro pacoro pehe tiquina cahacjẽnare dutiri:

—Yũhũ macũ tiquiro dutiro sahata yeya, nidi ticoro.

⁶Ti pjeppure usã acaye judio masa Cohacjũ yere yeye tehe masare tiquina pagũrire sa coseducu dutie tiri. Sa ye ti wũhũppure seis suturi utã mehna tiquina yeri suturi aco pose tiye suturi ijiri. Ti suturi Cohacjũ yere yeye tehe tiquina coseye aco pose tiye suturi ijiri. Ti suturi cincuenta o setenta litro pose esa tuhari. ⁷Sa yero tiquina cahacjẽnare dutiri Jesu:

—Ahri suturire acore pio sã nemoña. Quehnoano wahpo dapoya, nidi Jesu.



(San Juan 2.7)

Tiquiro sa nigũ tiquina pehe quehnoano wahpo dapo peho cãhri ti suturire.

⁸Tiquina sa yeri bato Jesu tiquinare dutiri tja:

—Yojopure ti acore wa ne, wuhũ cjũnore ohoya, nidi.

Tiquiro sa nigũ tuhoye ti acore wa ne, wuhũ cjũnore ohori. ⁹Tiquina sa ohogũ tiquiro pehe ti acore vino wahagũ yeri acore sihni tuhuri. Ti acore tiquiro dũhse yerire masiedari tiquiro. Tiquiro sa masiedapegũta tiquiro cahacjẽna ti acore wayequina pehe masidi. Wuhũ cjũno sa masiedaro omoca dũhteriquirore pijio, ohõ saha ni yahuri:

¹⁰—Apequina masa quehnoañe vinore sihõ mũhtare. Masa tiquina quehnoano sihni batorũ ña cjũne core sihõri tiquina. Mũhũ pehe quehnoañe core ihbo, came cjũno ti core sihõri usãre, nidi wuhũ cjũno omoca dũhteriquirore.

¹¹Canãrũ Galilearũ ijiri macarũ Jesu acore vino tiquiro wahagũ yero, topũ Cohãcjũ tutuaye mehna coã ye dũcari. Sa yero apequinare tiquiro tutuayere ihõri Jesu. Tiquiro sa ihõri bato usã tiquiro buhena tiquirore wacũ tutuaũ.

¹²Came Jesu tiquiro pacorore, tiquiro bahanare, usãre tiquiro buhena gũhũre Capernaupũ siho esari. Topũ esana, meheñe decorigã tojoarĩ usã.

Jesu Cohãcjũ wuhũpure esahye

(Mt 21.12-13; Mr 11.15-18; Lc 19.45-46)

¹³Pascua ijigũ judio masa usã bose deco ijiato mehenogã dũhsatjiãri. Sa yero Jesu Jerusalẽpũ esari. ¹⁴Topũ esaro tiquiro Cohãcjũ wuhũpũ sajã saro, wecũare, ovejare, bujuaare duayequinare boca sari. Sa yero niñerure comesayequina mesaripũ dujigũ tiquina gũhũre boca sari. ¹⁵Sa boca saro yuta dari mehna tanari da ye, tiquinare ijipihtyequinare sopecharũ tana nũnũ wiori. Oveja, wecua gũhũ tana nũnũ wio cãri tiquiro. Sa yero niñeru comesayequina ye mesarire ne majaredoqueo, doque cũ cãri. Ti niñeru cjoeri gũhũre doque site cãri. ¹⁶Sa ye tuhasa bujuaare duayequinare ohõ saha nidi:

—Musa bujuaare ne wijiaya. Yũhũ Pacu ya wuhũre apee boro duari wuhũ yeracãhña, nidi Jesu tiquinare.

¹⁷Tiquiro sa yegũ ihñana usã tiquiro buhena pehe Cohãcjũ yere tiquina ojoari pũpũ tiquiro nidire wacũ: “Cohãcjũ, mũhũ ya wuhũre tutuaro cahĩaja. Sa cahĩgu ti wuhũre ñano tiquina yegũ ihñagu tutuaro bujua witiaja yũhũ, ni ojoahye Cohãcjũ yere tiquina ojoari pũpũ”, ni wacũ usã Jesu buhena.

¹⁸Jesu tiquiro sa yeri bato usã acaye judio masa pũhtoa tiquirore sinituri: —¿Dũhsegu mũhũ ahriquinare Cohãcjũ wuhũpure ijieyequinare cohã wioari? Cohãcjũ mũhũre tire ye dutiriquiro tiquiro ijigũ Cohãcjũ tutuaye mehna ye ihñoña mũhũ usã ihñatire, nidi tiquina Jesure.

¹⁹Tiquina sa nigũ Jesu yũhtiri:

—Ahri wuhũre musa cohãgũ ihtia deco wahaboro tuhasautja yũhũ, nidi Jesu tiquinare.

²⁰—Ihtia deco ahri wuhure yesi mũhũ. Cuarenta y seis cãmari waro tiquina yeri wuhũ ijire ahri wuhũ, nidi tiquina pehe Jesure.

²¹Tiquiro sa nigũ tiquina tiquirore quehnoano tũhoerari. Jesu “Ahri wuhure”, nino tiquiro pagure nino nidi jimedi.

²²Sa ye tiquiro yariari bato, tiquiro masa wijiari bato usã tiquiro buhena pehe tiquiro nidire wacũna, Cohãcjũ yere tiquina ojoari pũre Jesu tiquiro yahuri gũhure “Ti ijirota ijire”, ni wacũu usã.

Ijipihtiyequina tiquina wacũñene Jesu masine

²³Pascua bose deco ijigũ Jesu Jerusalẽpũ ijiri. Topũ tiquiro ijigũ masa peyequina Cohãcjũ tutuaye mehna tiquiro ye ihũogũ ihũñañe tiquirore wacũ tutuari. ²⁴Tiquina sa wacũ tutuepegũta Jesu masa tiquina wacũñene quehnoano masino, “Yũhure sa wacũ tutuaducuenta”, ni tũhotuerahye. ²⁵Masa tiquina tũhotuyere quehnoano masidi tiquiro. Sa masino masa tiquina tũhotuyere apequinare ne sintuerari.

Jesu Nicodemore yahuahye

3 ¹Ti macare Nicodemo wame tiriquire, judio masa pũhtoa mehna cjũno ijiri. Tiquiro fariseo masa ya curua cjũno ijiri. ²Sa yero ihcã ñami tiquiro Jesu cahapũ ahta, tiquiro mehna yahuducuahye:

—Buhegũ, mũhũ Cohãcjũ buhe dutiro tiquiro ohorigũ mũhũ ijigũ usã masiaja. Cohãcjũ mũhure tiquiro yedohoeragũ mũhũ pehe tiquiro tutuaye mehna ne ye ihũoedaboaga. Mũhũ peye tahari Cohãcjũ tutuaye mehna ye ihũore, niahye Nicodemo Jesure.

³Tiquiro sa nigũ Jesu pehe yahuahye:

—Ijirota mũhure niita niaja. Wahma masa bajuariquire yero saha pari turi masa bajuariquire dihita Cohãcjũ yaquire iji masine, niahye Jesu.


⁴—Yohnah. ¿Bucuro pehe dũhse ye pari turi masa bajuaboari tiquiro? Tiquiro pacoro niji suhtiropũ majare sajã, pari turi bajua masiedaboaga tiquiro, niahye Nicodemo.

Tiquiro sa nigũ Jesu yũhtiahye:

⁵—Ijirota niita niaja mũhure. Wahma masa bajuariquire yero saha aco mehna, Espĩritu Santo tiquiro tutuaye mehna pari turi masa bajuariquire dihita Cohãcjũ yaquire iji masine. ⁶Numia niji pacosãnumia ijije, macanagãre masa bajuagũ yere. Espĩritu Santo pehe masare Cohãcjũ pohne ijigũ yere. ⁷“Wahma masa bajuariquire yero saha pari turi masa bajuariquire dihita Cohãcjũ yaquire iji masine”, yũhũ nigũ, tũho wisieracãhña. ⁸Espĩritu Santo masare Cohãcjũ pohne tiquiro yegũ ti wihnono yero saha ijire. Wihnono to ahtariropũ ahtare. To ahtaro ca tagũ mari tũhoaja. Sa tũhoopenata to ahtarirore, to waharirore ne masiedaja. Sata yere Espĩritu Santo masare Cohãcjũ pohne yero, niahye Jesu Nicodemore.

⁹—Mũhũ niñene quehnoano masiedaga, niahye Nicodemo.

¹⁰Tiquiro sa nigũ tũhoro ohõ saha niahye Jesu:



(San Juan 3.2)

—¿Muhu judio masare buhegu ijiepeguta, dahsegu yuhü niñene tuhoerajari? ¹¹Ijirota niita niaja mähure. Usä masidire usä ihñarire usä yahuaja. Usä sa yahuepegüta ne müsä acaye judio masa ne tuho duerare. ¹²Ahri yehpa cjä mehna masa tiquina masa bajuari mehna müsare queoye mehna yuhü buhe mühtarire “Ijirota ijire”, niedare müsä. Sa niedana queoye mehna buhero marieno Cohäcjä yere yuhü yahugü gühäre “Ijirota ijire”, nisi müsä.

¹³Ne ihcäquiro ühmüserü Cohäcjä caharü wahariquiro ne pari turi tojoa tasi. Yuhü masü Cohäcjä ohorigü yuhü dihita ühmüserü ijirigü ahri yehparü ahtaü. Sa yegü yuhü dihita Cohäcjä yere müsare yahu masiaja. ¹⁴Panopäre masa marienopü Moise mñnano bronce wame tiri come mehna tiquina yeriquirore añare yucügü tiquina docodüpu duhu yoahye. Yucügüpu tiquina duhu yoriro sahata yuhüre masüre Cohäcjä ohorigüre tiquirore tiquina yeriro sahata yuhü gühäre duhu yoeta. ¹⁵Yuhüre tiquina sa yeri bato ijipihtiyequina yuhüre wacü tutuayequina ijipihtiye decori Cohäcjä mehna ijiducueta, niahye Jesu.

Cohācjū ijipihitiyequinare cahīne

¹⁶Sa ni tuhasa ohō saha ni nemoahye:

—Cohācjū ijipihitiyequina ahri yehpa cjēnare tutuaro cahīne. Sa yero yūhūre tiquiro macure ihcūta ijigūre Cohācjū ohori ijipihitiyequina yūhūre wacū tutuayequina pecapū tiquina “Wahaeracāhdo”, nino. Sa ye ijipihitiye decori Cohācjū mehna ijjeta tiquina. ¹⁷Cohācjū yūhūre tiquiro macure masare buhiri dahre dutiro ohoerari yūhūre ahri yehpapūre. Sa yero masare pecapū wahaboriquinare yūhdūoacjūre yūhūre ohori.

¹⁸Yūhūre Cohācjū macure wacū tutuayequinare ne buhiri dahresi Cohācjū. Yūhūre wacū tutueyequina pūritare Cohācjū buhiri dahre duti tuhasari. Masa yūhūre Cohācjū macure ihcūta ijigūre tiquina wacū tutuerari buhiri, buhiri dahrerota tiquinare. ¹⁹Yūhū, Cohācjū macū ahri yehpapū ahtagū buhrioro quehnoano marine to ihña masigū yero sahata Cohācjū yere quehnoano masigū yeaja. Yūhū sa masigū yegū ihñañe yūhūre wacū tutueyequina yūhūre cahmedare. Tiquina ñañe yeye pehere quehnoano cahmene. Tiquina sa cahmedi buhiri tiquinare buhiri dahrerota. ²⁰Ijipihitiyequina ñañene yeyequina tiquina ñañe yeyere duhu duerare. Sa ye buhrioro to bajumehnenno sahata tiquina ñañe yerire “Bajumehneari”, niñe, yūhūre cahmedari tiquina. ²¹Quehnoañene yeyequina pehe yūhūre, yūhū buheye gūhūre cahmene. Cohācjū yere tiquina yeyere yūhū quehnoano bajuro dahregū bæ tierare tiquina. Sa ye yūhūre buhrioro yero saha ijigūre cahmene, ni yahuahye Jesu.

Pari turi Ñu wame yeriquiro Jesure yahuahye

²²Came Jesu usāre tiquiro buhenare Judea yehpapū siho wahari. Topū esaro to cjēna mehna meheñe decorigā tojoa, wame yeri tiquinare. ²³Ñu gūhū masare wame yero niahye Enón wame tiri macapū. Enón Salim wame tiri maca cahapū ijiri. Topū dia ijiri. Sa yero Ñu topū wame yero niahye masare. ²⁴Tiquina peresu yeato pano Enópū wame yero niahye Ñu. ²⁵Ti pjere Ñu buheyequina mehna cjēna meheñequinagā judio masūno mehna wame yeyere yahuducuye niahye. ²⁶Sa ye tiquina Ñu cahapū esa, tiquirore yahuahye:

—Buhegū, Jordā si pahrēpū mūhū mehna ijiriquiro “Tiquirota ijiaga”, mūhū nidiquiro pehe yojoḡpūre masare wame yero nine. Tiquiro sa yegū ijipihitiyequina tiquiro cahapū dihita wahare, niahye tiquina Ñure.

²⁷Tiquina sa nigū tūhoro Ñu yūhtiahye:

—Tiquiro tutuariquiro ijigū Cohācjū pehe tiquirore sa ijigū yere. ²⁸“Cristo ijieraja”, yūhū nigū mūsa tūhori. Sa ijierapegūta tiquiro pano ohonoho mūhtarigū ijiaga yūhū. ²⁹Cristo mehna masa tiquina wahagū ihñagū tutuaro bucueaja. Ohō saha ijire ti: Omoca dūhtericoro ticoro manūno mehna ijiro wahare. Omoca dūhtegū cohteriquiro pehe dūhteatiquiro namo tigū ihñano tiquiro yahuducugū tūhoro tutuaro bucuere. Sa yegū yūhū omoca dūhtegū cohteriquiro tiquiro bucuero saha Cristo mehna masa tiquina wahagū

ihñagu tutuaro bucueaja. ³⁰Cristo pehere wacũ tutuaro cahmene masare. Yũhũ pehere wacũ tutuero cahmene masare, ni yũhtiahye Ñũ.

Cohãcjũ macũno ùhmũsepu ahtariquiro ijire

³¹Sa ni tuhasaro ohõ saha ni nemoahye Ñũ:

—Ùhmũsepu ahtariquiro ijipihtiyequina yũhdũoro tutuariquiro ijire. Ahri yehparu masarina ijina ahri yehpa cjãna ijiaja mari. Sa yena ahri yehpa cjẽne yahuducujaja mari. Ùhmũsepu ahtariquiro pehe ijipihtiyequina yũhdũoro tutuariquiro ijire. ³²Tiquiro ihñarire, tiquiro tũhorire tiquiro yahure. Tiquiro sa yahuepegũta tiquiro yahuyere masa pehe ne tũho duerare. ³³Ùhmũsepu ahtariquiro tiquiro yahuyere masa tũhoye, “Cohãcjũ potota nidiquiro ijire”, niñe nine tiquina. ³⁴Ahriquiro Cristore Cohãcjũ ohoriquire Espĩritu Santo ye tutuayere oho pehore Cohãcjũ. Sa yero tiquiro Cohãcjũ ye yahuducuyere yahure. ³⁵Cohãcjũ tiquiro macũnore tutuaro cahĩne. Sa yero ijipihtiyequina puhtoro iji dutiri tiquiro macũnore. Ijipihtiye upũro iji dutire tiquiro. ³⁶Cohãcjũ macũnore wacũ tutuayequina pehe ijipihtiye decori Cohãcjũ mehna ijietã. Tiquiro macũnore yũhdũucayequina pehe Cohãcjũ caharu wahasi. Sa ye ijipihtiye decori ùhmũsepu ijisi. Sa yero Cohãcjũ tiquinare tutuaro buhiri dahrerota, niahye Ñũ.

Jesu Samaria cjõno mehna yahuducuro niahye

4 ¹Jesu Ñũ yũhdũoro peyequina buheyequinare tiquiro cũogũ, Ñũ yũhdũoro masare tiquiro wame yegũ fariseo masa tũhoahye. ²Tiquina sa tũhoepẽgũta Jesu pehe tiquiro basi masare wame yerari. Ùsã tiquiro buhena pehe masare wame yei. ³Fariseo masa tiquina sa masigũ tũhoro Jesu pehe Judea yehparu ijiriquiro Galilea yehparu ùsãre siho tojoaa wahari.

⁴Topũ wahana Samaria yehpare esa yũhdũ cãna tana nii ùsã. ⁵Sa yũhdũ cãna Samaria yehparu ijiri macaru Sicar wame tiri macaru esau. Ti maca caharu panoru cjũno Jacob mũnãno tiquiro macũno Josẽ mũnãnore tiquiro ohori yehpa ijiri. ⁶Topũ Jacob mũnãno tiquiro sihnidi cope ijiri. Sa yero Jesu pehe yoropũ ahtariquiro ijiro, tiquiro wahyia yũhdũaro ti cope dũhtũ caharu nuju sari. Ti pje tiquiro nuju sari pje coheri pje waro ijiri. ⁷⁻⁸Ùsã tiquiro buhena pehe macaru ihyayere ùsã dũna wahari bato ihcãquirola tiquiro topũ tojoa nuju sari. Sa yero Samaria cjõno ti coperu aco waro wihigũ Jesu ticorore acore siniahye:

—Acore ohoya yũhũre, niahye.

⁹—Mũhũ judio masũ ijire. Yũhũ pehe Samaria cjõ ijiaja. ¿Dũhsegũ yũhũre acore siniajari mũhũ? niahye ticoro Jesure.

Judio masa Samaria cjẽnare ihña tuhtiyequina ijire. Sa yero ticoro sa niahye.

¹⁰Ticoro sa nidi bato Jesu ticorore yahuahye:

—Mũhũre Cohãcjũ tiquiro yedoho duayere masigo, mũhũre acore sinigũre masigo, mũhũ yũhũ pehere siniboaya. Mũhũ sa sinigũ apeye aco pehere ohoboaya yũhũ. Ti aco pehe catigũ yere, niahye Jesu ticorore.

¹¹Tiquiro sa nigũ tũhoro ticoro yũhtiahye tiquirore:

—Ne mǎhǎre sutu mariedare. Sa yero ahri cope ǎhcuǎrĩne. ¿Sa yegu ahri catigũ yeye acore nohopu wa neboagari mǎhu? ¹²Mari ñecu mǎnano Jacob panopu cǎno ahri copere marine cǎe tiahye. Tiquiro, tiquiro pohne, nuñequina gũhu ahri acore sihnie tiahye. ¿“Apeye acore ohoboaya yǎhu”, mǎhu nigũ, Jacob yǎhduoro tutuagu ijajari mǎhu, sa ni tǎhotugu? niahye ticoro.

¹³Ticoro sa nigũ Jesu yǎhtiahye:

—Ijipihtiyequina ahri acore sihniñequina, pari turi aco wǎoeta.

¹⁴Yee aco pehere sihniñequina ne pari turi aco wǎosi. Sa ye, yee acore sihniñequina Cohǎcǎjũ mehna sa ijiducueta. Ma pohtepu aco to sa wijiaducuro sahata yee aco ne pihtisi, niahye Jesu.

¹⁵Tiquiro sa nigũ tǎhoro numino pehe ohõ saha niahye:

—Ti acore ohoya yǎhǎre pari turi yǎhu aco wǎoeraro quehnoano. Sa yego pari turi ne ohõpǎre aco wasi yǎhu, niahye ticoro.

¹⁶Ticoro sa nigũ Jesu ticorore yahuahye:

—Ti pje pũrita mǎhu manǎnore pijigo wahaya. Piji tuhasa ohõpu ahtaya tiquiro mehna, niahye Jesu ticorore.

¹⁷⁻¹⁸—Manǎ mariego ijajaja yǎhu, niahye ticoro.

—Ijirota nimene mǎhu. Ihcǎ omope tahari manǎ ti tuhasamedi mǎhu. Sa yero yojopǎre mǎhu mehna ijiriquiro mǎhu manǎno ijierare. Sa ye “Manǎ mariego ijajaja”, nigo potota nimene mǎhu, niahye Jesu ticorore.

¹⁹Tiquiro sa nigũ tǎhoro ohõ saha niahye ticoro:

—ǎa, Cohǎcǎjũ yere yahu mǎhtagu ijire mǎhu, yǎhu tǎhotugũ. ²⁰Usǎ ñecusumǎa iji turiayequina mǎna ahdu cǎnpu Cohǎcǎjũre ño peoe tiahye. Sa yena mǎsa pehe judio masa “Jerusalǎpu Cohǎcǎjũre ño peoro cahmene masare”, nie tiri mǎsa judio masa, niahye ticoro.

Ticoro sa nigũ Jesu yǎhtiahye:

²¹—Numio, yǎhu pehere tǎhorĩna. Camepu ahdu cǎnpu, Jerusalǎpu gũhǎre mari Pacure ño peosi mǎsa. ²²Mǎsa pehe mǎsa ño peoriquirore masiedare. Masare yǎhduoatiquiro judio masunota ijire. Sa yena usǎ judio masa pehe usǎ ño peoriquirore masiaja. ²³Yojopǎre, camepu gũhǎre Cohǎcǎjũre potota ño peoyequina tiquina quehnoano tǎhotuye mehna tiquirore ño peoeta. Sa mari ño peogũ cahmene Cohǎcǎjũ. ²⁴Cohǎcǎjũre, pagu marieniquiro tiquiro ijigũ masa tiquirore ihñedare. Sa ye tiquirore ño peoye, tiquina quehnoano tǎhotuye mehna tiquirore quehnoano potota ño peoro cahmene masare, niahye Jesu.

²⁵Tiquiro sa nigũta ticoro yǎhtiahye:

—Mesia, “Cristo” tiquina nidiquiro pehe masare yǎhduoatiquiro tiquiro ahtatire masiaja yǎhu. Tiquiro ahtaro marine ijipihtiyere buhe peho cǎnota, niahye ticoro.

²⁶—Yǎhata ijajaja Cristo, niahye Jesu ticorore.

²⁷Tiquiro sa nigũ waro wihii usǎ. Sa yena usǎ tiquiro buhena pehe Jesu numino mehna tiquiro yahuducugũ ihñana, ihña maria wahau. Sa ihña mariepenata, “¿Dǎhse cahmeajari mǎhu? ¿Dǎhse niari mǎhu ticorore?”

ni sinitueru tiqirore. ²⁸Sa yero numino ticoro ya suture duhu dapo cã, macapu wahaa wahari. Topu esaro masare yahuro, ohõ saha niahye:

²⁹—Yuhu yerire yahu pehoriquirore ihñana ahtaya musa. Tiquiro potota Cristo ijiboaga, ape taha yero, niahye ticoro.

³⁰Ticoro sa nigũ tuhoye ti maca cñena pehe Jesure ihñañe ahtari. ³¹Ti pjere usã Jesu buhena pehe tiqirore tutuaro ihya dutimi:

—Buhegu, ihyaya, nimi usã.

³²—Sijoro ijiye ihyayere cuoaja yuhu. Tire musa masiedare, nidi tiqiro.

³³Tiquiro sa nigũ tuhona usã basi ohõ saha ni yahuducuu:

—¿Apequina tiqirore ihyaye oho tuhasayari? nii usã basi.

Usã sa nigũ Jesu yahuri:

³⁴—Masa pehe ihya coare. Yuhure ohoriquiro tiqiro cahmeñe pehere ye coaja yuhu pehe. ³⁵“Pititia asũ dũhsare mari dũca duha neato”, wese upuro tiqiro nidiro saha musa pehe ni tuhoturacãhña. “Cohãcjũ yere usã yahuato dũhsarĩne”, ni tuhoturacãhña. Ijirota niita niaja musare. Yojoꝛu pũritare masare ihñaña. Dũcare neni pje to ijiro sahata, yojoꝛu pũrita masa yuhu buheyere tiquina tuhõati pje ijiro nine. ³⁶Oteye dũcare neñequinare tiquina wapa yeriro sahata yeere buheriquinare, yeequina ijiatiquinare pijieequinare, tiquina sa yeri wapa tiquinare quehnoano yeitja yuhu. Tiquina sa buhegũ tuhoye yuhu buheyere tuhoyequina yeequina pehe Cohãcjũ mehna ijipihtiyede decori ijiducuetã. Sa ye tiquinare buhe mũhtañequina, came yeequina wahagũ yeyequina gũhu ihcãno saha bucueducuetã. ³⁷“Ihcãquiro ote mũhtariquiro ijire. Apequiro pehe dũcare neniquiro ijire”, nie tiahye panopu. Ti ijirota ijire. Tiquina sa nidiro sahata ihquẽquina yeere yahu mũhtañequina ijire. Apequina pehe yeere buheye, yeequina wahagũ yere. ³⁸Wese upuro yequina dahra cohteyequina oterariquina tiquina ijiepegũ tiqiro oteye dũcare tiquinare ne dutiro ohore. Sa masare buhe mũhtaedarina musa ijiepegũta yeequina wahatiquinare buhe dutigũ ohoaja musare. Apequina pehe tiquinare buhe mũhta tuhasari. Tiquina buheriquinapure pari turi buhe nemonã, yeequina wahagũ yenata musa pehe. Sa ye buhe mũhtañequina pehe tiquina yedohoro mehna apequinare yeequina wahagũ yenata musa, nidi Jesu.

³⁹Ti pjere Samaria cñono “Yuhu yerire tiqiro yahu pehori”, ticoro sa nigũ tuhoye Samaria cñena peyequina Jesure cahmeahye. ⁴⁰Sa ye Samaria cñena Jesu cahapu esaye, “Usã mehna tojoarĩña”, nidi tiqirore. Tiquina sa nigũ usã gũhu tiqiro mehna pua deco tojoarĩ. ⁴¹Apequina gũhu peyequina Jesure tuhoye, cahmedi tiqirore. ⁴²Ohõ saha nidi masa numinore:

—Coã waropure mũhu yahurire tuhona, Jesure cahmei. Yojoꝛu pũritare tiqiro yahuducuyere tuhona tiqirore cahmeaja. Sa yena tiqiro pehere tuhona ahri yehpa cñenare pecapu wahaboriquinare yuhdũoriquiro potota tiqiro ijigũ yojoꝛu usã masiaja, nidi masa Samaria cñonore.

Pũhtoro macũnore dohatiriquirore yũhdũoahye Jesu

⁴³Pũa deco bato Jesu usãre Galilea yehpapũ siho wahari. ⁴⁴Coã waropũre ohõ saha nie tiri tiquiro: “Cohãcjũ yere yahu mũhtariquirore tiquiro ya yehpa cjẽna tiquirore ño peerare. Sa ye yũhũre ño peerare ohõ cjẽna ohõpũ yũhũ bucuarigu ijigũ”, nie tiri Jesu. ⁴⁵Sa ye Galileapũ tiquiro esagũ to cjẽna tiquirore quehnoano pitĩ cari. To pano Jerusalẽpũ bosc deco Jesu tiquiro yerire ihñariquina ijiri tiquina.

⁴⁶Sa ye Canãpũ Galileapũ ijiri macapũ acore tiquiro ãhse co bajumehnedĩ macapũ wahau usã tiquiro mehna. Canã cahapũ ijiri macapũ Capernau wame tiri macapũ pũhtoro macũno dohatiro niahye. ⁴⁷Sa yero Jesu Judeapũ ijiriquiro tiquiro Galileapũ esagũ pũhtoro tũhoahye. Tire tũhoro Jesu cahapũ wihiri:

—Yũhũ macũ yariaro nidi. Sa ye tiquirore yũhdũogũ ahtaya, ni tutuaro mehna pijiri tiquirore.

⁴⁸Tiquiro sa nigũ tũhoro Jesu yũhtiri:

—Cohãcjũ tutuaye mehna yũhũ yegũ ihñedana, ne yũhũre wacũ tutuerare m̃sa, nidi Jesu tiquirore.

⁴⁹Tiquiro sa nigũ pũhtoro pehe ohõ saha nidi:

—Pũhto, yũhũ macũ tiquiro yariato pano ahtaya, nidi tiquiro Jesure.

⁵⁰—Tojoahya. Mũhũ macũ catiaga, nidi Jesu.

Tiquiro sa nigũ tũhoro, “Tiquiro nidiro sahata catirota yũhũ macũ”, nino, pũhtoro tojoaa wahari.

⁵¹Sa tojoaducuriquirore tiquiro cahacjẽna tiquirore piti ca, yahuahye:

—Mũhũ macũ catiri, ni yahuahye tiquina tiquirore.

⁵²—¿Noho asũ ijigũ yũhdũari yũhũ macũ? ni sinituahye tiquiro cahacjẽnare.

—Canũre coheri pje batogã ujuaye sururi tiquirore, niahye tiquina.

⁵³Tiquina sa nigũ tũhoro ohõ saha ni tũhotuahye tiquiro: “Jesu yũhũre tiquiro sa ni yahuri pjeta ujuaye suruaya”, ni tũhotuahye pũhtoro pehe. “Poto ninota niaya yũhũre”, nino, tiquiro ijipihtiyequina tiquiro acaye mehna Jesure wacũ tutuahye.

⁵⁴Jesu Judea yehpapũ ijiriquiro Galilea yehpapũ tiquiro esari bato pũhtoro macũnore tiquiro yũhdũorire mari queogũ pũa taha Cohãcjũ tutuaye mehna ye ihño tuhasari Jesu.

Tini masieniquirore yũhdũoahye Jesu

5 ¹Came judio masa Cohãcjũre usã ño peori bosc deco ijigũ Jesu Jerusalẽpũ esari tja. ²Topũ oveja wame tiri sopecaha cahapũ cuhsari cope ijiri. Usã judio masa ye mehna niñe Betzata wame tiri cope ijiri. Ti cope cahapũ ihcã omope tihamehneñe tucũri ijiri. ³Ti tucũripũ peyequina dohatiyequina cuñari. Caperi bajueyequina, pari yuri wahayequina, tini masieñequina tiquina ti cope cahapũ ijiri. [Topũ ijije aco ñuhmi maanore cohteye nidi. ⁴Topũ buharo ti cope cjẽ acore ihquẽ tahari ñuhmigũ ye mũjahye angel. Ti cope cjẽ aco ñuhmido bato ña mio mũhtariquiro pehe dũhse ijiyere dohatiyere cũoriquiro quehnoa wahahye.] ⁵Sa yero tore treinta y ocho cũhmari waro dohatiriquiro ijiri. ⁶Topũ

tiquiro cuñagũ ihñano tiquiro sa yoari pje dohatiriquiro ijigũ masidi Jesu tiquirore. Sa masino tiquirore sinituri:

—¿Pagu dohatiye mariegu iji duajari mũhu? nidi Jesu.

⁷Tiquiro sa nigũta dohatiriquiro yũhtiri:

—Ti aco ñuhmigũ yũhure aco ijiri copepu neaboriquiro mariedare.

Ti copepu yũhu ña mio duepegũta apequina pehe yũhu pano sa ña mio mũhtaducure, nidi tiquiro Jesure.

⁸—Wahcãdũcaya. Mũhu cuñari cahserore ne cãhña, nidi Jesu tiquirore.

⁹Tiquiro sa nigũta dohatiriquiro pehe tiquiro cuñari cahserore ne, tini dũcari. Ti deco saurũ judio masa usã sori deco ijiri. ¹⁰Ti decore Jesu sa yegũ ihñañe judio masa usã pũtoa pehe dohatimediquirore ohõ saha ni yahuahye:

—Miare saurũ deco mari sori deco ijiepegũta mũhu cuñari cahserore neare mũhu. Sa yegu mari dutiyere yũhdũdũcagu nine mũhu, niahye tiquina tiquirore.

¹¹—Yũhure yũhu dohatiyere cohãriiquiro pehe ohõ saha nidi yũhure: “Mũhu cuñari cahserore ne cãhña”, nidi tiquiro yũhure, ni yũhtiahye dohatimediquiro.

¹²—¿Tire mũhure sa nidiquiro pehe noa boro ijiari tiquiro? ni sinituahye tiquina.

¹³Topu masa peyequina tiquina ijigũ ihñano Jesu pehe waha tuhasari. Sa yero dohatimediquiro pehe tiquirore yũhdũoriiquiro wamene masiedahye. ¹⁴Came Cohãcjũ wũhũpu Jesu tiquirore piti ca yahuri:

—Tũhorĩña mũhu yũhure. YojoPURE quehnoano pagu tire mũhu.

Ñañene ye nemoedacãhña. Pari turi ñañene ye nemogu mũhu dohatiriro yũhdũoro wahagũta mũhu, nidi Jesu tiquirore.

¹⁵Tiquiro sa nidi bato dohatimediquiro pehe usã judio masa pũtoa tiquirore sinituriquina cahapu esaro yahuahye tiquinare:

—Jesu wame tiriquiro yũhure yũhdũgũ yeri, ni yahuahye tiquiro.

¹⁶Sa ye saurũ ijigũ dohatiriquirore tiquiro dohatiyere Jesu cohãgũ masiñe, judio masa usã pũtoa pehe tiquirore ñano ye dũcari.

¹⁷Sa ñano tiquirore tiquina ye duagũ masino Jesu pehe yahuri tiquinare:

—Yũhu Pacu yojoPURE dahrarĩno nine. Yũhu gũhu dahrarĩ ni aja, ni yahuri tiquirore ñano ye duayequinare.

¹⁸Tiquiro sa nigũ judio masa usã pũtoa pehe tiquiro mehna tutuaro usuaye, to pano tiquina nidiro yũhdũoro tiquirore wejẽ duari. Saurũ decore tiquina sori decore ihcãquiro dohatiriquirore tiquiro yũhdũogũ ihñañe tiquina usuari. Sa usuaye tiquiro Cohãcjũre “Yũhu Pacu”, nigũ tũhoye, tiquina pehe to pano tiquina nidiro yũhdũoro usua nemoahye tja. “‘Yũhu Pacu’, nino Jesu tiquiro basi ‘Cohãcjũ mehna ihcãno saha ijiaja’, ni wacũaga tiquiro”, ni tũhoturi judio masa usã pũtoa.

Jesu Cohācjū ohoriqiro ijire

¹⁹Sa ye Jesu tiquinare yahuari:

—Ijirota niita niaja mūsare. Yūhū Cohācjū macū, yūhū esa tuharo yeraja. Yūhū Pacū tiqiro yerire ihñagū, tire yeaja. ²⁰Yūhū Pacū yūhūre tiqiro macūre cahīne. Sa yero tiqiro yerire yūhūre ihño pehore. Ahri vojopū tiqiro tutuaye mehna yūhū yeri yūhdūoro tiqiro apeyere ye dutirota yūhūre. Tiquiro sa ye dutigū tiqiro tutuaye mehna ye ihñoutja yūhū. Sa yena ihña maria wahanata mūsa. ²¹Yūhū Pacū yariariquinare tiqiro masoriro sahata yūhū gūhū yūhū cahmeñequinare masoutja. ²²⁻²³Ne yūhū Pacū pehe masa tiquina ñañe buhirire buhiri dahreriquiro ijierare. Yūhū pehere tire tiquina ñañe buhirire buhiri dahreacjūre cūri yūhū Pacū. Ijipihtiyequina masa tiqirore tiquina ño peoriro sahata yūhū gūhūre tiquina ño peotire buhiri dahreacjūre cūri yūhūre. Yūhūre tiqiro macūre ño peorana yūhū Pacū gūhūre ño peorare mūsa. Tiquiro ijire yūhūre ohoriqiro, nidi Jesu.

²⁴Sa ni tuhasa ohō saha ni yahu nemori:

—Ijirota niita niaja mūsare. Yūhū yahuducuyere tūhoyequina, yūhūre ohoriqirore wacū tutuayequina ijipihtiye decori ūhmūsepū sa ijiducueta. Sa yegū tiquinare buhiri dahresi yūhū. Sa ye tiquina pecapū wahaboriquina yūhdūeta. ²⁵Ijirota niita niaja mūsare. Pecapū wahatiquina yūhūre Cohācjū macūre tiquina tūhoati pje vojopū ijire. Camepū gūhūre yūhūre tiquina tūhoeta tja. Sa tūhoye tūho nūññequina pehe Cohācjū mehna sa ijiducueta. ²⁶Cohācjū yūhū Pacū pehe sa ijiducugū yeriquiro ijire. Sa yero yūhūre tiqiro macūre sa ijiducugū yeacjū iji dutiri tiqiro yūhūre. ²⁷Sa yegū yūhū masū Cohācjū tiqiro ohorigū yūhū ijigū tiqiro masare buhiri dahreacjūre cūri yūhūre. ²⁸Ahrire tūhona, tūho mariedacāhña mūsa. Ape decorūre ijipihtiyequina yariariquina masa coperipū ijieyequina yūhū yahuducugū tūhoeta. ²⁹Sa tūhoye, quehnoañene yeriquina ijipihtiye decori Cohācjū mehna ijiatiquina masa mūjaeta. Ñañene yeriquina pehe ñañene tiquina yeri buhiri pecapū wahaeta, ni yahuri Jesu.

³⁰Sa ni tuhasa ohō saha ni yahu nemori:

—Yūhū esa tuharo ne yeraja. Ne yūhū basi yūhū cahmeno ye dueraja. Yūhūre ohoriqiro tiqiro dutiriro sahata ye duaja. Sa yegū tiqiro nidiro sahata buhiri dahreaja. Sa yegū yūhū masare buhiri dahregū queoro yeaja. ³¹“Yūhū tutuagū ijiaja”, yūhū ni yahugū “Mūhū yahuye ne poto ijierare”, ni masiboaga mūsa. ³²Apequiro ijire yūhūre yahuriqiro. Tiquiro Ōu pehe masare yahure yūhūre. Masare yūhūre tiqiro yahuri ijirota ijire. Tire yūhū quehnoano masiaja. ³³Mūsa apequina pehere Ōupūre yūhūre sinitu dutina ohori. Sa yero potota yahure tiqiro mūsare. ³⁴“Cohācjū macūno ijire ahriqiro”, yūhūre ni yahuatiquinare macaedaja. Sa macaedapegūta Ōu masūno tiqiro ijiepegūta yūhūre “Cohācjū macūno ijire”, tiqiro ni yahurire yahugū niaja. Mūsa yūhūre wacū tutuatire, mūsa pecapū wahaborina mūsa yūhdūatire yūhūre Ōu tiqiro yahurire yahugū niaja. ³⁵Sihāria

meheñe decorigã ihña masigũ yero sahata Ñu musare buhe mũhtano mehenogã tiquiro catiro puno musare masigũ yeri. Tiquiro sa buhegũ tuhona meheñe decorigã bucueri musa. ³⁶Yũhũ ijyie tiyere tiquiro sa buhepegũta Cohãcjũ pehe yũhũ ijyere quehnoano yahure. Tiquiro sa yahugũ Ñu yũhũ ijyere tiquiro yahuye yũhũoro ijire Cohãcjũ ye yahuye. Sa yegu Cohãcjũ tiquiro tutuaye mehna yũhũre tiquiro ye dutirire yojopũ yei niaja. Ahrire yũhũ yegũ ihñana potota Cohãcjũ ohorigũ yũhũ ijyere masine musa. ³⁷Sa yero yũhũ Pacũ yũhũre ohoriquiro tiquiro basi “Tiquiro yũhũ ohoriquiro ijire”, ni yahure musare. Tiquiro sa ni yahuepegũta tiquiro yahuducuyere ne tuhøerari musa. Sa yena musa tiquirore ne masiedari. ³⁸Yũhũre Cohãcjũ ohorigũre musa ne tuhø duerari. Sa yena musa Cohãcjũ yere ne cahmedari. ³⁹Cohãcjũ yere tiquina ojoari pũre musa buhena, “Mari ahri pũre buhena ijipihitiye decori Cohãcjũ mehna sa ijiducunata”, nine musa. Ti pũta yũhũre yahure. ⁴⁰Ti pũ yũhũre ti yahuepegũta musa pehe yũhũre cahmedare. Ijipihitiye decori Cohãcjũ mehna musa sa ijiducuatire yũhũre sini duerare musa, ni yahuri Jesu.

⁴¹Sa ni tuhasa ohõ saha ni nemori:

—Yũhũre musa ño peoeragũ ihñagũ usueraja yũhũ pehe. ⁴²Musa pehe Cohãcjũre musa cahiedagũ masiaja yũhũ. ⁴³Cohãcjũ yũhũ Pacũ tiquiro yũhũre dutiriro sahata yũhũ ahtaepegũta musa yũhũre cahmedari. Apequiro pehere Cohãcjũ ohoeriquiro tiquiro ijiepegũta tiquiro pehere cahmenata musa. ⁴⁴Apequina masa musare tiquina ño peogũ cahmene musa. Cohãcjũ musa mehna tiquiro bucuẽgũ cahmedare musa. Tiquiro dihita Cohãcjũ waro ijire. Sa cahmedana yũhũ gũhũre tuhøerare musa. Yũhũre wacũ tutuerare. ⁴⁵Musare yũhũ Pacũre ne yahusãsi yũhũ. Tire masiña musa. Moise tiquiro ojoari pũ pehe musare yahusãnota. “Ti pũ cẽ dutiyere mari ye pehona, Cohãcjũ cahapũ wahanata”, musa nidi pũ pehe musare yahusãnota. ⁴⁶Moise tiquiro ojoari pũpũ yũhũ pehere yahuahye. Sa yena ti pũre “Ijirota ijire”, nina, yũhũ yahuye gũhũre “Ijirota ijire”, niboaya musa. ⁴⁷Moise tiquiro ojoari pũre “Ijirota ijire”, niedana, yũhũ yahuducuye gũhũre “Ijirota ijire”, nisi musa, nidi Jesu tiquinare.

Cinco mil masare ihyayere ohoahye Jesu

(Mt 14.13-21; Mr 6.30-44; Lc 9.10-17)

6 ¹Sa tiquiro buheri bato Galilea wame tiri ditara ape sie pahrẽpũ usã Jesu mehna pehãa wahaũ. Ti ditara pajiri ditara Tiberia wame tiri. ²To pano Galilea yehpapũ Jesu dohatiyequinare tiquina dohatiyere tiquiro cohãgũ masa ihñae tiri. Tiquina sa ihñari bato Jesu pehãgũ ihñañe masa peyequina tiquirore nũnũ tã cãri. ³Topũ esana usã tiquiro buhena pehe tiquiro mehna cunũpũ mũja sa, tũ buipũ dujii. ⁴Ti deco pascua wame tiri bose deco ijiato judio masa usã ya bose deco mehenogã dũhsari. ⁵⁻⁶Topũ dujiro, Jesu peyequina masa tiquiro cahapũ tiquina ahtagũ ihñadoqueori. Sa ihñadoqueoro Felipere sinituri:

—¿Ahriquina masa tiquina ihyatire nohopũ dúnatari? nidi Felipere.

Jesu tiqiro basi tiqiro yeatire masieperota Felipere sinituri, “¿Duhse yuhtirodari?” nino. ⁷Tiqiro sa sinitugū tuhoro Felipe yuhtiri:

—Doscientos niñeru cjoeri pose ihyayere mari dúepégūta masare dayegā ihyayere mari itiepegūta ne esa tuhasi, nidi Felipe Jesure.

⁸Usā mehna cjäno Andre, Simo Pedro bahuro pehe Jesure yahuri:

⁹—Ihcā omope pā pacare, puaro wahire nijino ohō cüore. To punogāta tiqiro cüoepégūta masa pehe peyequina waro ijire. Sa yero ahri mehenogā ihyaye ne esa tuhasi, nidi Andre.

¹⁰—Masare duji dutiya mūsa, nidi Jesu usāre tiqiro buhenare.

Topu taa dayegā ijiro ijiri. Usā duji dutigū masa nuju sa pihitari taa buipū. Umua dihitare mari queogū cinco mil ijiri. ¹¹Tiqina sa nuju sagū ihñano Jesu pehe päre ne, Cohäcüre “Quehnoare” nidi. Sa ni tuhasarota usāre tiqiro buhenare iti dutiri. Tiqiro sa dutigū usā pehe dujiyequinare iti cāñ. Puaro wahi gūhure iti cāñ. Ijipihtiyequinare quehnoano tiqina esa tuharo ihyayere tiquinare itii. ¹²Sa ye masa pehe yapia wahari. Tiqina sa yapigū ihñano Jesu usāre nidi:

—Tiqina ihya duharire quehnoano ne peho cāñña. Sa yena tiqina ihya duharire ne bosí, nidi.

¹³Tiqiro sa nigū usā pehe ihcā omope pā paca duhsarire usā ne cahmecoagū doce puhuse waro wijiari. ¹⁴Sa ye masa ti bajumehnenore Jesu tiqiro yegū ihñañe, ohō saha nidi:

—Ijirota ijire. Ahriqiro Cohäcjö yere yahu muhtariqiro ahri yehpapu ahtariqiro mari cohteriquirota ijire, nidi tiqina.

¹⁵Tiqina Jesure tiqina puhtoro ijiatiquiro ñehe sō duamedí. Jesu tire masino pari turi ihcāquirota cunupū waha wahari.



(San Juan 6.9)

Jesu aco bui tiniahye
(Mt 14.22-27; Mr 6.45-52)

¹⁶Ñamicahapũ usã tiquiro buhena ditarapũ buhaũ. ¹⁷Topũre buha sa, yucũsapũ sajã, Capernau wame tiri macapũ pehãũ. Usã pehãri pje ñamipũ ijiri. Sa yero Jesu usã cahapũ ahtaeranidi. ¹⁸Wihnono tutuaro wẽgũ, pajiri ma pahcõri wahcãri. ¹⁹Ihcã omope kilómetro esaboro waro usã esagũ waro Jesu usã cahapũ wihiri. Aco bui tiquiro ahtagũ ihñaũ usã. Sa usã cahapũ tiquiro ahtagũ ihñana usã cuei. ²⁰Sa usã cuegũ ihñano tiquiro usãre yahuri:

—Ne yũhũre ihña cueracãhña. Yũhũta ijijaja, nidi Jesu.

²¹Tiquiro sa nigũ tũhona usã bucueye mehna tiquirore piti ca sajã dutii. Tiquiro sajãri batogãta usã wahari yehparũre pehã sa tuhasaũ.

Masa pehe Jesure macahye

²²Ti ñamine masa topũ tojoariquina pehe ihcãriata usã pehãtiare ihñaahye. Tia mehna usã pehãgũ ihñari tiquina. Jesu usã mehna tiquiro wahaeragũ gũhũre ihñari tiquina. Sa ye ape decore tiquirore cohteye nimahye. ²³Tiberia wame tiri macapũ ahtaye, Jesu Cohãcjũre “Quehnoare”, tiquiro nidiro cahagã cjũnopũ, masare tiquiro ihyaye itiriro caha cjũnopũ wahã sahye tiquina yucũsa mehna. ²⁴Sa ye ape deco usã Jesu mehna ijirirore usã mariedagũ ihñaãe, masa yucũsapũ sajã, Capernaupũ usãre nũnũ tã pehã sari. Jesure maca saye nidi tiquina.

Jesu catiyere oho, ihyaye yero saha ijiriquiro ijire

²⁵Ditarapũ pehã, Jesure boca saye, masa sinituri tiquirore:

—¿Buhegũ, dũhse ijigũ ahtari mũhũ ohõpũre? ni sinituri tiquina.

²⁶Tiquina sa sinitugũ Jesu tiquinare yahuri:

—Ijirota niita niaja mũsare. Bajumehnedire yũhũ yepegũta yũhũ pehere wacũ tutuerare mũsa. Yũhũre wacũ tutuerapenata yũhũre macare mũsa. Yũhũ mehna bũjũye ihyana, mũsa yapirina yũhũre maca cãhtari tja. ²⁷Ihyaye ne sa ijiducuerare. Camepũ pihtia wahare. Sa yena tire wacũducueracãhña. Apeye ihyaye sijoro saha ijiye ihyaye pehere macaãña mũsa. Ti ihyayere bocana ijipihtiyẽ decori Cohãcjũ mehna ijinata. Sa ye ti ihyaye pũrita ne pihtierare. Ti ihyayere yũhũ masũ Cohãcjũ ohorigũ mũsare ohoutja. Cohãcjũ yũhũ Pacũ yũhũre tire oho dutiriquiro ijire. Cohãcjũ tiquiro ohorigũ yũhũ ijiyere ihño tuhasari mũsare, nidi Jesu.

²⁸Tiquiro sa nigũ tiquina sinituri tiquirore:

—¿Cohãcjũ tiquiro ye dutiyere yena tana dũhse yenatari usã? ni sinituri tiquina.

²⁹—Ahrire Cohãcjũ mũsare ye dutire: “Yũhũ ohoriquirore wacũ tutuaya”, nino mũsare ye dutire Cohãcjũ, nidi Jesu.

³⁰Tiquiro sa nigũ tũhoye tiquina ohõ saha nidi tja:

—Cohãcǵũ ohorigũ ijigũ tiquiro tutuaye mehna ye ihñõña usãre mũhũre usã qeuhnoano wacũ tutuatire. ¿Yabe borore yeitjari mũhũ? ³¹Mari ñecusumũa mũnarũ panorũ cǵena masa marienorũ maná wame tiye pacare ihyae tiahye. Cohãcǵũ yere tiquina ojoari pũrũ ohõ saha ni yahuahye: “Tiquiro tiquinare uhmũse cǵẽ ihyayere ohoe tiahye tiquina ihyatire”, ni ojoahye Cohãcǵũ yere tiquina ojoari pũrũ. ¿Tiquiro sa yeriro sahata yeitjari mũhũ gũhũ? nidi tiquina.

³²Tiquina sa nigũ Jesu yahuri tiquinare:

—Ijirota niaja mũsare. Moise uhmũse cǵẽ ihyayere ohoerari mũsare. Yũhũ Pacũ pehe uhmũse cǵẽ ihyaye potota ijiyere mũsare ohoriquiro ijire. ³³Cohãcǵũ ye ihyaye uhmũsepu dijia taye, ijipihitiri yehpa cǵenare catiyere oho masine, nidi Jesu tiquinare.

³⁴—Pũhto, decoripe ti ihyayere ohoya usãre, nidi tiquina.

³⁵Tiquina sa nigũ tũhoro Jesu yahuri tiquinare:

—Yũhũ pehe catiyere oho, ihyaye yero saha ijigũ ijiaja. Mari ye ihyayere mari ihyari batota duita uũa ahbaa wahaja mari tja. Sihniñe gũhũre mari sihnidi batota aco wũoa wahaja tja. Sa ijiepegũta yũhũre cahmediquiro, yũhũre wacũ tutuariquiro uũa ahbaerariquiro yero saha tiquiro bucueye tiquirore pihtisi. ³⁶Musa pehe yũhũre ihñaepenata yũhũre wacũ tutueranine. Tireta mũsare yahue timi yũhũ. ³⁷Ijipihitiquina yeequina ijiatiquinare yũhũre yũhũ Pacũ tiquiro cũriquina pehe yũhũre cahmeeta. Sa ye yũhũre cahmeñequinare ne cohãsi yũhũ. ³⁸Uhmũsepu ahtagũ yũhũ cahmeno yei ahtagũ niedũ yũhũ. Yũhũre ohoriquiro tiquiro cahmediro sahata yei ahtagũ nii yũhũ. ³⁹Ahrita ijire yũhũre ohoriquiro tiquiro cahmeñe waro: Ijipihitiquina yeequina yũhũre tiquiro ohoriquinare yũhũ boeragũ cahmene yũhũre ohoriquiro pihtiri deco ijigũ tiquina masa mũjatire. ⁴⁰Ijipihitiquina yũhũre Cohãcǵũ macure ihñañequina, yũhũre wacũ tutuayequina ijipihitije decori tiquiro mehna tiquina ijigũ cahmene yũhũ Pacũ. Sa yegu pihtiri decoru tiquinare masoutja, nidi Jesu.

⁴¹“Yũhũ uhmũsepu ahtaye ihyaye yero saha ijigũ ijiaja”, tiquiro nigũ tũhoye judio masa usã pũhtoa pehe tiquiro mehna usua, tiquina basi Jesure ñano ni yahuducuri.

⁴²—¿Ahriquiro Jesu José macũno ijierajari? Tiquiro pacũro, pacoro gũhũre mari masiaja. Sa yero mari yero saha pagũ tiriquireta ijire. ¿Sa ijieperota duhsero “Uhmũsepu ahtau”, niajari tiquiro? ni usuari tiquina.

Tiquina sa nigũ tũhoro Jesu yahuri tiquinare:

⁴³—Musa yũhũre ñano ni yahuducueracãhña. ⁴⁴Yũhũ Pacũ yũhũre ohoriquiro pehe masare yũhũ pehere cahmegũ yere. Tiquiro sa yeragũ masa pehe yeequina iji masiedaboaya. Pihtiri deco ijigũ yeequinare masoutja yũhũ. ⁴⁵Cohãcǵũ yere yahu mũhtariquina pehe ohõ saha ni ojoahye: “Cohãcǵũ tiquinare buherota”, ni ojoahye Cohãcǵũ yere yahu mũhtariquinaru. Ijipihitiquina yũhũ Pacũ ye buheyere tũhoyequina, tiquirore yũhtiquina yũhũre cahmene. Sa yeye yeequina ijire.

46 Yuhũ Pacure ne ihcãquiro masuno ihñedare. Yuhũ Cohãcjũ ohorigu dihita yuhũ Pacure ihñau. 47 Ijirota niaja musare. Yuhũre wacũ tutuariquiro ijipihtiye decori yuhũ Pacu mehna sa ijiducurota. 48 Yuhũ catiyere oho, ihyaye yero saha ijigũ ijiaja. 49 Musa ñecusumua muna jii turiayequina masa marienopu manãre ihyae tiahye. Sa tire ihyæpeta yariaa wahæe tiahye. 50 Uhmusepu ahtari ihyayere yuhũ niñe ihyayere masuno ihyaro, ne pecapu wahasi. 51 Yuhũ uhmusepu ahtari ihyaye catiyere oho, ihyaye yero saha ijigũ ijiaja yuhũ. Ahri ihyayere ihyariquiro ijipihtiye decori yuhũ Pacu mehna sa ijiducurota. Ahri ihyaye catigũ yere. Ahri ihyaye yero saha ijiye yuhũ paguta ijire. Ijipihitiri yehpa cjëna Cohãcjũ mehna tiquina sa ijiducuatire yuhũ pagure ohogutja. Sa ohogu yariagutja, nidi Jesu.

52 Tiquiro sa nigũ tuhoye usã acaye judio masa pehe tire ohõ saha ni yahuducuri tiquina basi:

—¿Ahriquiro dũhse ye tiquiro pagure ihyatire ohorotari? nidi tiquina basi.

53 Tiquina sa nigũ tuhoro Jesu yahuri:

—Ijirota niaja musare. Yuhũ masu Cohãcjũ ohorigu ijiaja. Yuhũ pagure ihyeriquiro, yuhũ diire sihnieniquiro uhmusepu wahasi. 54 Sa yuhũ pagure ihyariquirore, yuhũ diire sihnidiquirore pihitiri deco ijigũ masoutja. Sa yero uhmusepu sa ijiducurota tiquiro. 55 Yuhũ pagu potota ihyaye waro yero saha ijire. Yuhũ dii potota sihniñe yero saha ijire. 56 Yuhũ pagure ihyariquiro yuhũ diire sihnidiquiro yuhũ mehna bucueye mehna ijiducurota. Sa yegu yuhũ gũhu tiquiro mehna bucueye mehna ijiducujaja. 57 Yuhũ Pacu yuhũre ohoriquiro sa ijiducure. Sa ijiducuro, yuhũ gũhure sa ijiducugũ yere. Sa yeye yuhũre sa ijiducugure masa ihyaye, Cohãcjũ mehna uhmusepu sa ijiducuenta tiquina gũhu. 58 Ahri tjire uhmusepu ahtari ihyaye. Mari ñecusumua muna jii turiayequina tiquina ihyari yero saha ijierare ahri ihyaye. Tiquina pehe ti ihyayere ihyæpeta yaria pihitia wahæe tiahye. Ahri ihyaye pehere ihyariquiro uhmusepu sa ijiducurota, nidi Jesu.

59 Capernaupũ judio masa usã buheri wuhupu Jesu buhero, sata ni yahuri.

Jesu ye buheyere tuhona uhmusepu sa ijiducunata mari

60 Peyequina Jesure cahmeñequina tiquiro sa ni buheyere tuhoye, ohõ saha ni yahuducuri:

—Ahri buheye tutuaro mijore. Sa yena mari tuho duera cjũaja, ni yahuducuri tiquina basi.

61 Tiquina sa nigũ Jesu pehe tiquina yahuducurire masidi. Sa masino tiquiro sinituri tiquinare:

—¿Ahri buheyere tuhona usuajari musa? 62 ¿Yuhũ masu Cohãcjũ ohorigu uhmusepu yuhũ tojoaa wahagũ ihñana dũhse ni tuhutonatari musa? ¿To gũhure usuanatari musa? 63 Masuno tiquiro jeripohnare curo catire. Tiquiro pagu pehe tiquirore catigũ yerare. Masuno tiquiro jeripohna tiquirore catigũ

yero saha yũhũ buheye pehe mʉsare Cohãcjũ mehna sa ijiducugũ yere.

⁶⁴Apequina mʉsa mehna cjẽna ne yũhũre wacũ tutuerare, nidi Jesu.

Coã waropũre Jesu tiqirore wacũ tutueyequinare masidi. Sa yero tiqirore ihña tuhtiequinare ihñoatiquiro gũhũre masi tuhasari. Sa tiqirore wacũ tutueyequinare masino “Apequina mʉsa mehna cjẽna yũhũre wacũ tutuerare”, nidi Jesu. ⁶⁵Sa ni tuhasa ohõ saha ni nemori:

—Ohõ saha ni yahumi mʉsare: “Yũhũ Pacũ masare yũhũ pehere cahmegũ yere. Tiquiro sa yeragũ masa pehe yeequina iji masiedaboaya”, mʉsare nie timi, nidi Jesu.

⁶⁶Tiquiro sa ni buhegũ tũhoye peyequina Jesure cahmemediquina tiqirore cohã, tiqiro mehna pari turi wahaerari. ⁶⁷Tiquina sa yegũ ihñano Jesu ʉsãre doce tiqiro buhenare sinituri:

—¿Mʉsa gũhũ yũhũre cohãnatjari? ni sinituri ʉsãre. ⁶⁸Tiquiro sa nigũ Simo Pedro yũhtiri tiqirore:

—Pũhto, ʉsãre apequiro buheriquiro mariedare. Mũhũ ye buheyere tũhona Cohãcjũ mehna sa ijiducunatja ʉsã. Mũhũ ye buheye dihita tire yahure ʉsãre. ⁶⁹Sa yena ʉsã mũhũre wacũ tutuaja. Sa yena mũhũ quehnoagũ, Cohãcjũ macũ tiqiro ohorigũ mũhũ ijigũ ʉsã masiaja. Sa yena mũhũre cohãsi ʉsã, nidi Simo Pedro Jesure.

⁷⁰Tiquiro sa nigũ tũhoro Jesu yahuri ʉsãre:

—Yũhũ pehe mʉsare doce besei. Sa ijiepegũta ihcãquiro mʉsa mehna cjẽno watĩno yaquiro ijiatiquiro ijire, nidi ʉsãre tiqiro buhenare.

⁷¹Sa nino Judare Simo Iscariote macũnore nino nidi. Juda pehe doce ʉsã mehna cjẽno Jesure ihña tuhtiequinare ihñoatiquiro ijiri.

Jesu acaye tiqirore “Cohãcjũ macũno ijire”, ni, ne masiedahye

7 ¹Came Jesu Galilea yehpapũ tinino wahari. Judea yehpapũ judio masa tiqirore wejẽ duari. Tiquina sa wejẽ duagũ masino tiqiro ti yehpapũ wahaerari. ²Judio masa daye wũhũsegã ʉsã yeati bose deco mehenogã dũhsatjiãri. ³Sa ye Jesu bahana tiqirore yahuri:

—Judeapũ wahaya. Topũ mũhũ yequinare mũhũ bajumehneñene ihñogũ wahaya mũhũ. ⁴Masare mũhũ bajumehneñene ihño duagũ ne nũosi mũhũ. Ye ihñono cahmene. Potota ahri bajumehneñene ye masigu ijigũ tire masare ihñoña, nimesi tiquina.

⁵Tiquiro bahana ijiepetã Jesure “Cohãcjũ macũno ijire”, niedari. Sa yeye sa nidi tiquina tiqirore. ⁶Tiquina sa nidi bato Jesu yahuri tiquinare:

—Masa yũhũre tiquina quehnoano masiati pje dũhsarĩne. Mʉsa ihña duana bose deco ijigũ waha masine. ⁷Ahri yehpa cjẽna mʉsa pehere ihña tuhtierare. Tiquina ñãñe yerire yũhũ yahugũ tiquina yũhũ pehere ihña tuhtire. ⁸Bose deco ijigũ wahaya mʉsa sehsharo. Yũhũ pehere yũhũ wahati pje dũhsarĩne. Sa yegu yũhũ pehe bose decore mianogãre ihñau waharĩsi, nidi Jesu tiquinare.

⁹Sa nino tiqiro Galileapũ tojoari.

Jesu daye wuhusegã tiquina yeri bose deco ijigũ wahahye

¹⁰Bose decopũ Jesu bahana tiquina wahari bato Jesu gũhu tiquina bato wahari. Sa waharo masa tiquina ihñeno watoa wahari. ¹¹Bose deco ijieyequina judio masa usã pũhtoa tiquirore macari:

—¿Nohopũ ijiagari tiquiro? ni sinituahye tiquina.

¹²Sa ye masa gũhu Jesure peyequina yahu wajahye. Apequina “Tiquiro quehnoariquiro ijire”, niahye. Apequina “Tiquiro ñariquiro ijire. Masare mehoriquiro ijire”, ni yahu wajahye tiquina.

¹³Sa niepeta judio masa usã pũhtoare cueye masa tiquina ihñenopũ Jesure yahu wajahye.

¹⁴Bose decori deco mehna dũhsagũ Cohãcjũ wũhũpũ Jesu sajã saro, buheri.

¹⁵Tiquiro sa buhegũ usã acaye judio masa tũho maria waha, ohõ saha nidi:

—¿Ahriquiro buheropũ buhemehnediquiro ijieperota dũhsero quehnoano masi pehoajari? nidi tiquina basi tiquirore.

¹⁶Tiquina sa nigũ Jesu yahuri tiquinare:

—Yũhu buheri yee yahuducuye ijierare. Yũhũre ohoriquiro ye yahuducuye pehe ijire ahri buheye. ¹⁷Cohãcjũ cahmeñene ye duayequina yũhu buheye pehere Cohãcjũ ye yahuducuye ti ijigũ masieta. Yũhu esa tuharo yũhu buheragũ gũhũre masieta tiquina. ¹⁸Ihcãquiro tiquiro esa tuharo tiquiro masiñe mehna buhero “Yũhu dihitarẽ ño peoya”, nino nine tiquiro. Sa ijiepegũta yũhũre ohoriquiro pehere mũsa ño peogũ cahmeaja yũhu pehe. Yũhu sa nigũ tũhona “Potota ni yahuducure tiquiro. Ne mehoedare”, ni masinata mũsa.

¹⁹Cohãcjũ dutiyere Moise mũnano pehe cũahye mũsare. Tiquiro sa cũepegũta mũsa ijipihtina ti dutiye pehere ne yũhtierari. ¿Dũhsena yũhũre wejẽ duajari mũsa? nidi Jesu usã acaye judio masare.

²⁰—Tũho masiedare mũhũ. Watĩnore cũore mũhũ. Mũhũre wejẽ duayequina mariedare, ni yũhtiri tiquina Jesure.

Tiquina sa nigũ Jesu yũhtiri:

²¹—Mari judio masa mari sori deco saurũ ijigũ ihcã tahata Cohãcjũ tutuaye mehna dohatiriquiro tiquiro dohatiyere yũhu cohãgũ mũsa ihña maria wahari.

²²Mari ñecusumũa mũna panopũ cjẽna pehe tiquina pagũre cuhnucunũ sohtoa cahserogãre yũhũre neñequina tiquina yeriro sahata Moise yũhũre ne dutiahye. Potota Moise pehe ti dutirote cũedahye. Mari ñecusumũa mũna iji turiayequina pehe tire cũ, yahu turiahye. Tiquiro sa dutigũ saurũ sori deco ijiepegũta masunore tiquiro cuhnucunũ sohtoa cahserogãre yũhũre nene mũsa.

²³Saurũ ijigũ masunore tiquiro cuhnucunũ sohtoa cahserogãre yũhũre nene mũsa, Moise dutiyere yena tana. ¿Mũsa gũhu saurũ decore tire yepenata ti decopũ dohatiriquirore yũhu yũhũdogũ dũhsena yũhu mehna usuajari mũsa?

²⁴Yũhu yerire mũsa quehnoano masiedapenata, yũhũre ñano tũhotuercãhña. Mũsa quehnoano masidi bato yũhũre mũsa tũhotugũ potota ijirota. Yũhu yerire masina, queoro masiña mũsa, nidi Jesu.

Jesu coã waropu tiquiro ahtaritore yahuahye

²⁵Tiquiro sa ni yahuri bato meheñequinagã Jerusalẽ cjenã tiquirore ohõ saha ni yahu wajari:

—¿Ahriquiro judio masa puhtoã tiquina wejẽ duariquiro ijierajari? ²⁶Sa yero tiquirore tiquina wejẽ duepegũta ijipihtiequina ihõono masare buhero nine tiquiro. Sa ye tiquirore wejẽ duayequina ijiepetã sa ihña cãre. ¿“Tiquiro potota Cristo ijire”, ni, tuhotuagari puhtoã pehe? ²⁷Sa ijiepegũta ahriquiro Jesu tiquiro ahtaritore mari masiaja. Cristo pehe masare yũhdũoatiquiro tiquiro ahtagũ tiquiro ahtariro pehere masimehnedare. Sa yero masare yũhdũoatiquiro Cristo waro ijierare Jesu, ni yahu wajari tiquina Jerusalẽ cjenã.

²⁸Tiquina sa niñene masino, Jesu ohõ saha ni tutuaro saũducu buheri Cohãcjũ wũhũpũ:

—Yũhũre ohõ saha ni tuhoture mũsa: “Tiquirore masiaja. Sa yena tiquiro ahtariro gũhũre masiaja”, ni tuhotumene mũsa. Mũsa sa ni tuhotuepenata yũhũre ohoriquirore ne masiedare mũsa. Yũhũre ohoriquiro poto niniquiro, poto yeriquiro ijire. Tiquirore ne masiedare mũsa. ²⁹Tiquirota yũhũre ohori. Sa yegũ tiquiro cahapũta ahtaũ. Sa yegũ yũhũ pehe tiquirore masiaja, nidi Jesu judio masare.

³⁰Tiquiro sa nigũ tuhoye tiquirore ñehe duamedĩ. Tiquina sa ñehe duepegũta Jesu tiquiro ñano yũhdũati pje dũhsarĩdi. Sa ye tiquina tiquirore ñehe masiedari. ³¹Apequina masa pehe peyequina tiquirore wacũ tutuaye, ohõ saha nidi:

—“Cristo peye tahari Cohãcjũ tutuaye mehna ye ihõnnota”, panopũ tiquina ni yahu mũhtariro sahata ahriquiro Jesu pehe peye tahari Cohãcjũ tutuaye mehna ye ihõre. Ijipihtiequina apequina yũhdũoro Cohãcjũ tutuaye mehna ye ihõre tiquiro. Sa yero Cristo Cohãcjũ ohoriquirota ijire ahriquiro Jesu, nidi Jesure wacũ tutua dũcayequina.

Fariseo masa Jesure peresu ye dutiahye

³²Masa Jesure tiquina sa ni yahuducugũ tuhoahye fariseo masa. Sa ye tiquina, pahia puhtoã mehna Jesure ñehe dutiye ohoahye surarare, Cohãcjũ wũhũre cohteyequinare.

³³Sa yero Jesu judio masare ohõ saha nidi:

—Meheñe decorigã mũsa mehna ijiniitja. Sa yegũ mehenogã bato yũhũre ohoriquiro cahapũ wahaũtja. ³⁴Yũhũ ijiatore mũsa waha masiedare. Sa yena yũhũre macaepenata ne bocasi mũsa, nidi Jesu judio masare.

³⁵Tiquiro sa nigũ tuhoye tiquina basi ohõ saha ni yahuducuri:

—¿Ahriquiro sa nino nohopũ waharotari, mũsa tuhotugũ? ¿Griego masa cahapũ judio masa waha siteriquina tiquina ijie macaripũ griego masapũre buhero wahaboagari ahriquiro? ³⁶¿“Yũhũ ijiatore mũsa waha masiedare. Sa yena mũsa yũhũre macaepenata ne bocasi”, tiquiro nigũ dũhse nino boro ahriquiro sa nijari? ni yahuducuri judio masa tiquina basi.

Catigũ yeye mārīne yahuahye Jesu

³⁷Bose deco bato tiri deco ti deco waro ijiro nidi. Ti decore Jesu topũ ducuro, tutuaro mehna sañuducu yahuri:

—Aco w̄oyequina acore tiquina tutuaro cahmeno saha ijipihtiye decori Cohācjũ mehna m̄sa ijiatire tutuaro cahmena ȳhure siniña. M̄sa sa sinigũ tiquiro yequina m̄sare iji dutiitja. ³⁸Ȳhure wacũ tutuayequinare oh̄o saha ni ojoahye Cohācjũ yere tiquina ojoari p̄p̄p̄: “M̄ari pohterip̄ catigũ yeye aco sa wijiaducuro sahata catigũ yeriquiro tiquina mehna sa ijiducurota”, ni ojoahye Cohācjũ yere tiquina ojoari p̄p̄p̄, ni yahuri Jesu judio masare.

³⁹Sa catigũ yeriquirore wame peo yahuro “Ȳhure wacũ tutuayequina Esp̄ritu Santore c̄oeta”, nino nidi Jesu. Tiquiro ũhm̄sep̄ tiquiro m̄jaedarigũ Esp̄ritu Santo pehe wihieraniahye.

Judio masa tu wahye p̄a curua

⁴⁰Jesu tiquiro sa nigũ t̄hoye, masa peyequina oh̄o saha ni yahuducuri: —Ahriquirop̄ potota Cohācjũ yere yahu m̄htariquirop̄ mari cohteriquiro ijire, nidi masa.

⁴¹Oh̄o saha nidi apequina ḡũh̄:

—Ahriquirop̄ Cristo marine ȳhd̄oatiquiro ijire, nidi.

Apequina pehe oh̄o saha nidi:

—Cristo ahtaro, Galilea yehpa c̄j̄no ijisi tiquiro. Ahriquirop̄ Jesu pehe to c̄j̄nota ijire. ⁴²Cristo Davi m̄nano panamino ape t̄juro c̄j̄no ijiatiquiro ijirota. Sa yero Davi ya maca ijirir̄p̄ Bel̄p̄ Cristo masa bajarota. Oh̄o saha ni yahure Cohācjũ yere tiquina ojoari p̄p̄p̄. Ahriquirop̄ Jesu pehe Bel̄p̄ masa bajarahye. Sa yero tiquiro Cohācjũ ohoriquiro Cristo waro ijierare, nidi tiquina.

⁴³Sa ye Jesure t̄homediquina p̄a curua tu wari tiquina basi.

⁴⁴Meheñequinagã masa pehe Jesure ñehe duamedi. Sa ñehe duepeta tiquirore ñehedari.

Judio masa p̄htoa Jesure ne wacũ tutuerahye

⁴⁵Sa ye surara pahia p̄htoa cahap̄ fariseo masa cahap̄ tojoa wahahye. Tiquina tojoa sagũ ih̄ñañe tiquina surarare sinituahye:

—¿D̄hsena Jesure ñehedari m̄sa? ni sinituahye tiquina pehe.

⁴⁶—Tiquiro quehnoa ȳhd̄aro yahuducuriquiro ijiri. Apequina tiquiro yero saha yahuducuyequina ne mariedare, ni ȳhtiahye surara tiquinare.

⁴⁷Tiquina sa nigũ fariseo masa pehe oh̄o saha ni yahuahye:

—¿M̄sare tiquiro mehogũ “Potota nino niaga”, niajari m̄sa ḡũh̄?

⁴⁸Mari p̄htoa Jesure wacũ tutueyequina ijiye ne tiquirore cahmedare.

Ūsã ḡũh̄ sa ijina tiquirore cahmedaja. ⁴⁹Ahriquina masa pehe Cohācjũ dutiyere Moiser̄ tiquiro c̄irire masiedare. (Sa masieñequina ijiye Jesure

wacū tutuayequina ijiye, tiqiore cahmene.) Tiquina sa cahmedi buhiri tiquinare mari Pacū buhiri dahrerota, niahye fariseo masa.

⁵⁰Fariseo masūno Nicodemo Jesure yahuducuro esariquiro topū ijiahye tiquina mehna. Tiquina sa nigū tūhoro ohō saha niahye tiquiro tiquinare:

⁵¹—Jesu nāno yerire masiedaja mari. Sa masiedana marine tiquiro yahuato pano tiqiore buhiri dahre masiedaja mari. Sa masiedapenata tiqiore buhiri dahrena, mari ye dutiyere yūhdūdūcana nijaja mari, niahye Nicodemo tiquinare.

⁵²Tiquiro sa nigū tūhoye ohō saha ni yūhtiahye tiquina:

—¿Mūhū gūhū tiquiro yero saha Galilea cjūta ijiajari? Cohācjū yere tiquina ojoari pūre buhe pehoya. Sa buhegū “Cohācjū yere yahu mūhtariquina ne ihcāquiro mariedare Galileare”, ni buhe masiita mūhū. (Sa yero sa ni maca cāno nine Jesu,) ni yūhtiahye tiquina Nicodemo.

[⁵³Tiquina sa nidi bato tiquina ye wūhūsepū tojoaa wahahye.

Ūmūno mehna nāno yericorore judio masa pūhtoa wacūeno mehna esa pjeahye

8 ¹Jesu cūnūpū Olivo wame tidūpū wahari. ²Sa yero bohrearo Cohācjū wūhūpū tiquiro esari tja. Tiquiro esagū ihñāñe masa peyequina tiquiro cahapū cahmecoari. Tiquina sa cahmecoagū ihñāno tiquiro pehe dūjtjāno tiquinare buhe dūcari. ³Tiquiro sa buheri watoa ūsā acaye judio masa buheyequina, fariseo masa mehna ti wūhūpū numinore ne cāhtari. Ticoro ūmūno mehna nāno yegū waro wacūeno mehna esa pjeahye tiquina ticorore. Sa esa pjeje ticorore Cohācjū wūhūpū ne sajāri tiquina. Ne sajā sa tuhasa ijipihitiyequina ihñono ticorore duhu docoye ohō saha nidi:

⁴—Buhegū, ahricoro ūmūno mehna nāno ticoro yegū waro wacūeno mehna ticorore esa pjei. ⁵Cohācjū dutiyere Moise mūnanopū marine tiquiro cūri ohō saha nine: “Ūmūno mehna nāno yericorore ūtā paca mehna doque wejēña”, niahye Cohācjū dutiye. ¿Mūhū waro dūhse ni tūhotuajari ahrire? ni sinituri tiquina Jesure.

⁶Jesu nāno nigū tūho duaye nimesi tiquina tiqiore yahūsāñe tehe. Tiquina sa sinituepegūta Jesu muhri quehe, yehpapū tiquiro omo piria mehna ojoari. ⁷Sa tiquina ni sinituducugū Jesu pehe wahcā nuju sa, tiquinare yahuri:

—Mūsa mehna cjūno nāno yerariquiro ticorore ūtā mehna doque mūhtaahdo, nidi Jesu.

⁸Sa ni tuhasa pari turi muhri quehe, yehpapū ojoari tja. ⁹Tire tūhoye tiquina nāñe yerire wacūñe, tiquina wahmisūmūa pehe wijia mūhtari. Tiquina bato tiriquina mehna cjēna gūhū wijia pihtia wahari. Sa yero numino topū ducuricoro Jesu mehna tojoari. ¹⁰Sa yero Jesu wahcā nuju sa ticorore sinituri:

—¿Nohopū wahajari tiquina? ¿Mūhūre buhiri dahre duamediquina mariedajari yojopūre? nidi ticorore.

¹¹—Mariedare pūhto, ni yūhtiri ticoro.

—Yūhū gūhū buhiri dahreraja mūhūre. Wahaya. Sa yego nāñene ye nemoedacāhña, nidi Jesu ticorore.]

**Buhrioro marine ihña masigū yero saha Jesu ahri
yehpa cjenare mari Pacure masigū yere**

¹²Pari turi Jesu ti wuhupɛ ijijequinare yahuri:

—Buhrioro marine to ihña masigū yero sahata yuhɛ ahri yehpa cjenare Cohăcjure masigū yeaja. Yuhure wacū tutuariquiro ijipihtiye decori Cohăcjū mehna sa ijiducurota. Sa yero tiquiro quehnoañene wacūnota. Sa yero tiquiro ñañene wacū duerare, ni yahuri Jesu.

¹³Tiquiro sa nigū tiquirore fariseo masa ohō saha nidi:

—Muhɛ basi muhɛ ijije tiyere sa ni yahuducugɛ nine. Sa ye muhɛ ohō saha ni muhɛ esa tuharo muhɛ ni yahuducu maca quēhe ne dăhseati ijierare, nidi tiquina Jesure.

Tiquina sa nigū Jesu yuhtiri:

¹⁴—Yuhɛ ahtarirore masiaja yuhɛ. Yuhɛ wahato gūhure masiaja yuhɛ. Mɛsa ne tire masiedare. Mɛsa ohō saha niepegūta yuhɛ ijije tiyere musare yuhɛ yahuri potō tjire. ¹⁵Mɛsa esa tuharo mɛsa ihñari dihitare masine mɛsa. Sa yena quehnoano masiedare mɛsa. Sa masiedapenata yuhure ñano ni yahuducure mɛsa. Yuhɛ pehe yuhɛ esa tuharo masare ne sa niedaja. ¹⁶Sa yegɛ masa tiquina ijije tiyere ihña masigɛ yuhɛ esa tuharo ihña masiedaja. Yuhɛ pūrita yuhure ohoriquiro mehna ihña masiaja. Sa yegɛ masa tiquina ijije tiyere yuhɛ ihña masiñe potō tjire. ¹⁷Mɛsare dutiye tiquina ojoari pū ohō saha ni yahure. “Puarō masa ihcāno saha tiquina yahugū ohō saha tiquina yahuye potō tjire”, ni yahu ojoari jiri. ¹⁸Yuhure yahuriquiro mehna usā pɛana tjiaja. Yuhɛ ijije tiyere yahuaja yuhɛ. Sa yero yuhɛ Pacɛ gūhɛ yahure yuhɛ pehere. Tiquiro tjire yuhure ohoriquiro, nidi Jesu.

¹⁹—¿Nohopɛ ijiagari muhɛ pacɛ? ni sinituri tiquina.

—Yuhure mɛsa masiedare. Yuhɛ Pacɛ gūhure masiedare mɛsa. Yuhure masina, yuhɛ Pacɛ gūhure masiboaga mɛsa, ni yuhtiri Jesu tiquinare.

²⁰Jesu tiquinare buhero sa ni yahuducuri Cohăcjū wuhupɛ tiquina niñeru sãñe acari cahapɛ. Tiquiro ñano yuhduati pje ijieranidi. Sa ye tiquina mehna tiquiro ijiepegūta tiquina tiquirore ñehedari.

—Yuhɛ wahatopɛre mɛsa pehe waha masisi, niahye Jesu

²¹Pari turi Jesu tiquinare yahuri tja:

—Yuhɛ ahtaripɛ wahautja. Yuhɛ wahari bato mɛsa yuhure macanata. Sa yena mɛsa ñañe buhiri tiye mehna yarianata. Yuhɛ wahatopɛre mɛsa pehe waha masisi, ni yahuri Jesu.

²²—“Yuhɛ wahatopɛre mɛsa pehe waha masisi”, tiquiro nigū tūhoye, “¿Ahriquiro tiquiro basi wejē yariarotari, sa nino?” nidi usā acaye judio masa tiquina basi.

²³Tiquina basi sa nigū Jesu yahuri tiquinare:

—Musa pehe ahri yehpa cjāna ijire. Yuhū pehe ūhmuse cjū ijiaja. Ahri yehpapū bajuarina ijire musa pehe. Ūhmusepū ahtarigu ijiaja yuhū pehe. ²⁴Musa yuhū ijiye tiyere yuhū nidire “Poto ijierare”, nina, musa ñañe buhiri tiye mehna yarianata musa. Sa yegū “Musa ñañe buhiri tiye mehna yarianata musa”, nimi musare, nidi Jesu tiquinare.

²⁵—¿Noa boro ijiajari mūhū? ni sinituri tiquina.

—Coā waropure yuhū niducuro sahata ijiaja yuhū. ²⁶Musare yuhū yahuati pajiro dūhsarīne. Sa yero musa ñano yeri buhirire musare yuhū yahuati pajiro dūhsarīne. Sa yegū yuhūre ohoriquiro tiquiro yahurire ahri yehpa cjēnare yahuaja. Tiquiro yahuri poto tjire, nidi Jesu tiquinare.

²⁷“Yuhūre ohoriquiro”, tiquiro nigū tūhoye, “Mari Pacū ijiaja”, ni tūhotuerari tiquina. ²⁸Tiquina sa ni tūhotueragū ihñano Jesu yahuri tiquinare.

—Yuhūre masure Cohācjū ohorigure musa yucū teō mehna wahcō doconata. Musa sa yena, “Tiquiro Cohācjū ohoriquiro tjire”, ni masinata musa yuhūre. Sa yena yuhū esa tuhāro yuhū yerarigū ijigū masinata musa. Sa yena yuhū Pacū yuhūre tiquiro buheri dihitarē yahurigū yuhū ijigū gūhūre masinata musa. ²⁹Sa yero yuhūre ohoriquiro pehe yuhū mehna ijire. Tiquiro cahmeñene ijipihtiye decori yeducuaja. Sa yero yuhūre tiquiro ne cohāedare, nidi Jesu.

³⁰Tiquiro sa nigū tūhoye, tiquirore masa peyequina wacū tutuari.

Cohācjū pohnene, ñañe yeyequina gūhūre yahuahye Jesu

³¹Sa ye apequina judio masa Jesure wacū tutuari. Sa yero Jesu tiquinare yahuri:

—Yuhū dutiyere ye pehona, potota yuhū buhena ijire musa. ³²Sa yena poto masinata musa. Poto ijiyere masina, ñañe yeyere duhu masinata. Sa yena cahacjēna yero saha iji nemosi musa, nidi Jesu tiquinare.

³³Tiquiro sa nigū tūhoye ohō saha ni yūhtiri tiquina:

—Ūsā pehe panopū cjūno Abrahā mūnāno panamena iji turiana ijiaja. Sa yena ne apequina tiquina cahacjāna ijieraja usā. ¿Sa yegū “Cahacjēna yero saha iji nemosi”, nigū, dūhse ijiro boro usāre sa niājari mūhū? ni sinituri tiquina Jesure.

³⁴Tiquina sa nigū tūhoro ohō saha nidi tiquiro:

—Ijirota niāja musare. Ijipihtiyequina ñañene yeyequina pehe tiquina ñañene ye duhu masiedare. Sa yero ñañe pehe tiquina pūhtoro yero saha ijire. Sa ijiyequina ijiye cahacjēna yero saha ijire tiquina. ³⁵Cahacjūno pehe tiquiro pūhtoro ya curua cjūno ijipihtiye decori ijiducuerare. Ti wūhū cjūno macūno pehe ijipihtiye decori potota ti curua cjūno ijire tiquiro. (Yuhū pehe Cohācjū macū ijiaja. Sa yegū dutigū ijiaja. Musa ñañe yeyere duhu dutiitja.) ³⁶Sa yena yuhū Cohācjū macū ñañene yuhū duhugū yenohrina ijina potota ñañene duhurina ijire musa. ³⁷Abrahā mūnāno panamena iji turiana musa ijigū masiaja. Sa ijiepenata yuhū yahuyē pehere tūho duerare musa. Sa yena yuhūre wejē duare musa. ³⁸Yuhū Pacū yuhūre tiquiro masigū yerire yahuaja

músare. Yũhũ sa yahuepegũta mũa pacũ watĩno músare tiquiro dutiyere yere mũa gũhũ, nidi Jesu tiquinare.

³⁹—Abrahã mũnano panopũ cjũno usã ñecũ mũnano ijie tiahye. Sa yero watĩno usã pacũ ijierare, ni yũhtiri tiquina.

Tiquina sa nigũ Jesu yũhtiri:

—Abrahã panamena iji turiana ijina, tiquiro yeriro sahata yeboaga mũa. ⁴⁰Cohãcjũ yũhũre poto tiquiro yahuyere músare yũhũ yahuepegũta yũhũre wejẽ duare mũa. Abrahã mũnano pehe ne sa yera tiahye. ⁴¹Mũa pacũ tiquiro yeriro sahata yere mũa, nidi Jesu tiquinare.

Tiquiro sa nigũ tiquina yũhtiri:

—Omoca dũhtemehneñequina pohna ijieraja usã. Ihcãquirola ijire usã Pacũ. Tiquirota ijire Cohãcjũ, nidi tiquina.

⁴²Tiquina sa nigũ Jesu yũhtiri:

—Cohãcjũ mehna cjũ ijigũ, ohõpũre ahtaũ. Sa yena Cohãcjũ mũa Pacũ tiquiro ijigũ yũhũre cahĩboya mũa. Yũhũ esa tuharo ahtaerũ yũhũ pũrita. Cohãcjũ tiquiro ohogũ ahtaũ ohõpũre. ⁴³¿Dũhsena yũhũ yahuducuyere tũhoerajari mũa? Yũhũ yahuyere tũho duerare mũa. Sa yena tũhoerare mũa. ⁴⁴Mũa pacũ pehe watĩno ijire. Sa yena watĩno cahmeñe pehere ye duare mũa. Ahri yehpa coã waropũ to iji dũcagũrũ, yojopũ gũhũre tiquiro masare wejẽdiquiro ijire. Tiquirore poto yahuducuye mariedare. Sa yero tiquiro ne poto yahuducuerare. Tiquiro coã waropũre ni meho mũhta dũcariquiro ijie tiahye. Sa yero tiquiro sa ni mehoducuriquiro ijiro, ni mehoñene yahure. ⁴⁵Yũhũ pehe músare poto yahuaja. Sa yũhũ yahuepegũta yũhũre tũhoerare mũa. ⁴⁶“Mũhũ ñano yegũ ijire”, yũhũre ni masiedare mũa. ¿Poto músare yũhũ yahuepegũta dũhsena tũhoerajari mũa? ⁴⁷Cohãcjũ pohne pehe tiquiro yahuducuyere tũhore. Tiquiro pohne ijierana, tiquiro yahuducuyere tũho duerare mũa, nidi Jesu tiquinare.

Abrahã tiquiro ijiato pano Cristo pehe iji tuhasae tiahye

⁴⁸Tiquiro sa nigũ tũhoye judio masa tiquirore ohõ saha nidi:

—“Mũhũ Samaria cjũ ijire. Sa yegũ watĩnore cũore mũhũ”, usã nidi poto tjire, nidi tiquina Jesure.

⁴⁹Tiquina sa nigũ tũhoro ohõ saha ni yũhtiri Jesu:

—Watĩnore cũoeraja yũhũ. Yũhũ Pacũre ño peoaja. Mũa pehe yũhũre ño peoerare. ⁵⁰Yũhũre masa tiquina ño peogũ cahmedaja yũhũ. Yũhũ Pacũ pehe yũhũre ño peogũ cahmene masare. Tiquiro pũrita yũhũ ijie tiyere quehnoano ihña masino, sata ño peo dutire. Sa yero yũhũre tiquina cahmedari buhiri, buhiri dahreatiquiro ijirota tiquiro. ⁵¹Ijirota ni aja músare. Yũhũ dutiyere yeriquiro ijipihtye decori Cohãcjũ mehna sa ijiducurota, nidi Jesu.

⁵²Tiquiro sa nigũ tũhoye ohõ saha nidi tiquina:

—Yojopũ pũritare watĩnore cũogũ mũhũ ijigũ usã quehnoano masiaja. Abrahã mũnano yariaa wahahye. Cohãcjũ yere yahu mũhtariquina gũhũ

yaria pihtia wahahye. ¿Sa yegü “Yuhü dutyere yeriquiro ijipihtiyeh decori Cohäcjö mehna sa iiducurota”, nigü dühse nigü sa nijari mühü? ⁵³¿Usä ñecü münano Abrahä yuhdüoro tutuajari mühü? Tiquiro, Cohäcjö yere yahu mühtariquina gühü yariaa wahahye. ¿Mühü pehe noa boro ijijari mühü, sa ni yahuducugü? Mühü sa nibogü ijierare, nidi tiquina.

⁵⁴Tiquina sa nigü tuhoro Jesu yahu nemori:

—Yuhü basi “Tutuagu ijiaja yuhü”, yuhü nigü, tutuagu ijieraboaga yuhü. Yuhü Pacü pehe “Tiquiro tutuariquiro ijire”, nine yuhäre. “Usä Pacü”, müsa nidiquiro pehe yuhü Pacü tjire. ⁵⁵Müsa pehe yuhü Pacüre ne masiedare. Yuhü pehe tiquirore masiaja. “Tiquirore masiedaja”, nigü müsa yero saha ni mehoñe peyagü ijiboaga yuhü. Potota tiquirore masiaja. Sa yegü tiquiro dutyere yeaja. ⁵⁶Ahri yehpapü yuhü ahtatore mari ñecü Abrahä münano masie tiahye. Sa masino tiquiro bucuee tiahye, nidi Jesu.

Tiquiro sa nigü tiquina yuhtiri:

⁵⁷—Cincuenta cühmari cüeraga mühü. Abrahä münano panopü cjöno ijiri. ¿Yojopüre tiquiro münanore mühü dühse masiboagari? nidi judio masa Jesure.

⁵⁸—Ijirota njaja müsare. Abrahä tiquiro ijiato pano yuhü pehe iji mühta tuhasae tii, nidi Jesu tiquinare.

⁵⁹Tiquiro sa nigü tuhoye tiquina pehe ütã pacare ne, tiquirore doque duamedí. Tiquina sa doque duepegüta Jesu pehe Cohäcjö wühüpü ijiriquiro duhti wijiiaa wahari.

Caperi bajueriquirore ihñagü yeahye Jesu

9 ¹Sa yena Jesu usä tiquiro buhena mehna mahapü wahana, apeqirore caperi bajueriquirore boca saü. Tiquiro wahma masa bajuaropüta caperi bajueriquiro ijie tiahye. ²Usä gühü tiquirore ihñana, sinituu Jesure:

—¿Buhegü, ahriquiro dühsero caperi bajueriquiro masa bajuayari? ¿Ñañene yeyari tiquiro sa waharo? ¿O tiquiro pacusümua pehe ñañene yeyari tiquiro sa wahagü? ni sinituu usä pehe Jesure.

³Usä sa nigü tuhoro ohö saha ni yuhtiri tiquiro:

—Ahriquiro ñañene yeri buhiri caperi bajueriquiro wahaerari. Tiquiro pacusümua gühü ñañene tiquina yeri buhiri caperi bajueriquiro wahaerari. Cohäcjö tiquirore caperi bajueragü yeri tiquirore ihñagü yero taro, masare tiquiro ihñoatire. ⁴Yuhäre ohoriquiro tiquiro cürire yojopüre yero cahmene marine. Namipü mari dahra masieno sahata camerü yuhäre ohoriquiro tiquiro cürire ye masiedaja mari. ⁵Ahri yehpapü buhrioro marine to ihña masigü yero saha ijigü ahri yehpa cjenare Cohäcjö yere masigü yeaja yuhü, nidi Jesu.

⁶Sa ni tuhasarota yehpapü sihco puti cüri. Tiquiro sa sihco puti cürire dihta mehna dahra more, caperi bajueriquirore tiquiro caperire wisöri.

⁷Sa wisöno ohö saha nidi Jesu:

—Siloé wame tiri coperü cuhsari coperü mühü caperire cosegü wahaya, nidi Jesu.



(San Juan 9.6)

Siloé usâ ye mehna niñe “Ohori cope”, niñe nidi.

Jesu tiqiro caperire cose dutiriquiro pehe waha, cose, caperi ihñariquiroꝑu tojoa wihiri. ⁸Tiqiro tojoa wihigũ tiqiro cahapũ ijiyequina tiqirore ihñari. To pano niñeru sinimediquiro tiqiro ijigũ ihñariquina tiqirore ohõ saha nidi tiquina basi:

—¿Ahriquiro sohõ ijiriquiro niñeru sinidiquiro ijierajari? nidi tiquina.

⁹—Tiquirota ijire, nidi apequina pehe.

—Tiqiro ijierare. Tiqiro saha bajuriquiro ijire, nidi apequina pehe.

Tiquina sa nigũ tũhoro caperi bajueramediquiro pehe ohõ saha nidi:

—Tiqiro tjiaja yũhũ, nidi tiquinare.

¹⁰Tiqiro sa nigũ masa tiqirore sinituri.

—¿Caperi bajuegũ ijirigũ dũhse waha ihñari mũhũ? ni sinituri tiquina tiqirore.

¹¹—Jesu wame tiriquiro sihco co mehna dihta mehna dahra more, yũhũ caperire wisõri. Yũhũre wisõ tuhasa “Siloé wame tiri copeꝑu mũhũ caperire cosegũ wahaya”, tiqiro nigũ cosegũ esau yũhũ. Yũhũ sa coseri bato yũhũ caperi quehnoano bajuri yũhũre, ni, yahuri tiqiro masare.

¹²—¿Mũhũre sa yeriquiro nohopũ ijiagari tiqiro? nidi tiquina.

—Õbah. Noho ijiro ijiaga, nidi tiqiro.

Caperi bajueramediquirote fariseo masa sinituahye

¹³Sa ni yahuducu tuhasa tiquina caperi bajueramediquirote fariseo masa cahapũ neari. ¹⁴Ti deco Jesu dihtare sihco co mehna dahra more caperi bajueriquirote tiquiro ihñagũ yeri deco saurú deco ijiri. Ti deco usã sori deco ijiri. ¹⁵Sa ye fariseo masa pehe tiquirote sinituahye tja.

—¿Dũhse ye mũhũ ihñari? ni sinituahye tiquina.

—Dihta mehna yũhũ caperire wisõri. Sa yegũ yũhũ caperire yũhũ coseri bato ihña dũcaũ yũhũ, ni yahuahye tiquiro tiquinare.

¹⁶—Tiquiro saurú decore mari sori decore mari dahra dutieri decore dahraya. Sa yero tiquiro Cohãcjũ yaquiro ijierare, niahye apequina fariseo masa pehe.

Apequina pehe ohõ saha niahye:

—Ñañene yeriquiro ohõ saha yũhdũo masiedare. Sa yero tiquiro quehnoariquiro ijiboaga, niahye apequina.

Sa ye tiquina pũa curua tu wahye tiquina basi. ¹⁷Sa ye pari turi tiquina caperi bajueramediquirote sinituahye tja.

—¿Mũhũre caperire quehnoano yeriquirote mũhũ waro dũhse ni tũhotuajari Jesure? niahye tiquina tiquirote.

—Tiquiro potota Cohãcjũ yere yahu mũhtariquiro ijire, niahye caperi bajueramediquiro.

¹⁸Coã waropũre judio masa ohõ saha ni tũhotumahye. “Ahriquiro caperi bajueramediquiro ijierare”, ni tũhotumahye tiquina. Sa ni tũhotuye caperi bajueramediquiro pacũsumũare pijioahye tiquina. ¹⁹Pijio, tiquiro pacũsumũare sinituahye fariseo masa pũhtoa.

—¿Ahriquiro potota masa macũ ijiajari? ¿Duita tiquiro caperi bajueriquiro masa bajuari? ¿Potota caperi bajueriquiro ijieperota dũhsero ihñajari yojopũre? ni sinituahye tiquina tiquiro pacũsumũare.

²⁰—Ahriquiro usã macũta ijire. Sa yero duita caperi bajueriquiro masa bajue tiri tiquiro. ²¹Tire masiepenata tiquiro ihñarire, tiquirote ihñagũ yeriquiro gũhũre masiedaja usã. Usã macũre sinituya. Bũcũro ijire tiquiro. Tiquiro basi yahu masine, niahye tiquiro pacũsumũa.

²²Judio masa usã pũhtoa coã waropũre ohõ saha nie tiahye.

—“Jesuta Cristo Cohãcjũ ohoriquiro ijire”, niñequinare mari buheye wũhũsepũ sajã dutisi usã, nie tiahye judio masa pũhtoa.

Tiquina sa nigũ tũhoye caperi bajueramediquiro pacũsumũa judio masa pũhtoare cue niahye. ²³Sa cueye, “Bũcũro ijire tiquiro. Tiquirote sinituya”, niahye tiquina judio masa pũhtoare.

²⁴Came judio masa pũhtoa pari turi pijioahye caperi bajueramediquirote tja. Pijio ohõ saha niahye tiquirote:

—Cohãcjũ mehna poto yahuya mũhũ. Jesure ni mehoriquiro tiquiro ñañe yeriquiro ijigũ usã masiaja. Sa yegũ poto yahuya usãre, niahye judio masa caperi bajueramediquirote.

25 Tiquina sa nigũ tũhoro ohõ saha ni yũhtiahye tiquiro:

—Jesure tiquiro ñañe yeriquiro ijigũ masiedaja yũhũ. Ihcãnota masiaja yũhũ. Panopũre caperi bajuegũ ijie tii yũhũ. Yojobũre ihñaja yũhũ. Ti dihitare masiaja yũhũ, ni yũhtiahye caperi bajueramediquiro tiquinare.

26—¿Dũhse yeri mũhũre tiquiro? ¿Mũhũ caperi ihñatire dũhse yeri tiquiro mũhũre? ni sinituahye tiquina.

27—Tireta mũsare yahu tuhasami yũhũ. Yũhũ sa niepegũta mũsa ne tũho duerare yũhũre. ¿Dũhse ye duana pari turi yũhũ yahugũ tũho duajari mũsa? ¿Mũsa gũhũ tiquiro buhena iji duajari? niahye tiquiro tiquinare.

28 Tiquiro sa nigũ tũhoye tiquina tuhtiahye tiquirore:

—Mũhũ Jesu buherigũ ijire. Usã pehe Moise buhena ijiaja. 29 Potota Cohãcjũ Moiserẽ yahuducue tiahye. Jesu tiquiro ahtarirore usã masiedaja, niahye tiquina caperi bajueramediquirore.

30 Tiquina sa nigũ yũhtiahye tiquiro:

—¿Tiquiro ahtarirore mũsa masiedagũ yũhũre ihñagũ yeriquiro ijiro, Cohãcjũ ohoriquiro ijieraboagari tiquiro? 31 Cohãcjũ ñañe yeyequinare tiquina siniñene tũhoerare. Ti pũritare mari masiaja. Tiquinare tũhoeraperota Cohãcjũre ño peoriquirore, tiquiro dutiyere yeriquirore tiquiro siniñene tũhore Cohãcjũ. 32 Coã waropũre ahri yehpa iji dũcagũpũre ne coã masa bajaropũ caperi bajueriquirore ne ihcãquiro ihñagũ yeriquiro marieda tiahye. 33 Sa yero Jesu Cohãcjũ ohoriquiro ijieraro yũhũre ihñagũ yeraboaya tiquiro, niahye tiquiro tiquinare.

34—Mũhũ duita ñagũ ijie tiahye. ¿Sa ijiepeguta usãre buhe duajari mũhũ? niahye judio masa pũhtoa tiquirore.

Sa ni tuhasayeta tiquina tiquirore cohã wio cãhye.

Jesu yere cahmeeñequina caperi bajueyequina tiquina ihña masieno saha mari Pacure masiedare

35 Sa yero caperi bajueramediquirore tiquina cohã wiorire Jesu tũhori. Sa tũhoro caperi bajueramediquirore boca saro tiquirore sinituri:

—¿Masũnore Cohãcjũ ohoriquirore wacũ tutuajari mũhũ? nidi Jesu.

36—¿Pũhto, noa ijiajari tiquiro? Tiquirore masigũ wacũ tutuagũtja tiquirore, nidi caperi bajueramediquiro Jesure.

37—Tiquirore ihña tuhasari mũhũ. Yojobũre mũhũ mehna yahuducugũ tiquirota ijiaja yũhũ, nidi Jesu caperi bajueramediquirore.

38—Pũhto, mũhũre wacũ tutuaja, nidi caperi bajueramediquiro.

Sa nino tiquiro Jesu caha dũsepe curi mehna quehe sa, tiquirore ño peori.

39 Tiquiro sa ño peogũ ihñano ohõ saha nidi Jesu:

—Quehnoañequina, ñañequina gũhũ tiquina yerire masigũ yei ahtaũ ahri yehparũre. Caperi bajueyequina tiquina ihña masieno saha tiquina yero saha ijiequina yũhũ Pacure masiedare. Sa masieñequinare yũhũ Pacure masigũ

yei ahtau yuhũ. “Usã quehnoano masiaja”, ni tũhotumediquina quehnoano tiquina masiedarire masigũ yei ahtau yuhũ, nidi Jesu.

⁴⁰Tiquiro sa nigũ tũhoye meheñequinagã fariseo masa tiquirore ohõ saha nidi:

—¿“Caperi bajueyequina tiquina ihña masieno saha quehnoano masiedare musa gũhũ”, nii nijari muhũ usãre? nidi fariseo masa Jesure.

⁴¹Tiquina sa nigũ ohõ saha nidi Jesu:

—Caperi bajueyequina tiquina ihña masieno saha poto musa quehnoano masiedagũ, musare buhiri mariedaboaya. “Usã quehnoano masina ijiaja”, musa nidi buhiri, buhiri tina ijinine musa yojopũre, nidi Jesu tiquinare.

Ovejare coheriquiro quitire yahuahye Jesu

10 ¹Came queoye mehna buhero ohõ saha nidi Jesu:

—Ijirota niaja musare. Ovejare coheri sahrĩno sopecaha sajãedariquiro, sopecaha marienopũ sajãriquiro pehe yaque bũcũro ijire.

²Sopecaha sajãriquiro pehe ovejare coheriquiro ijire. ³Sopecahare coheriquiro sopecahare pũore ovejare coheriquiro sajãtore. Ovejare coheriquiro yahuducugũ tũho cãhtare tiquiro nuñequina oveja pari. Tiquinare pijoro tiquina wame mehna pisuducure tiquiro. Sa yero tiquinare sahrĩnopũ ijiriquinare piji wiodocore sopecahapũ. ⁴Tiquiro yequinare ijipihtiequinare piji wio tiquinare sa uhmũ tãducure. Oveja pehe tiquiro yahuducuyere tũho masiñe tiquiro bato nũnũ tãre.

⁵Apequirore tiquina ihña masieniquirore nũnũ tãedare tiquina. Sa ye apequina tiquina yahuducuyere tũhoye, cue oma sitea wahare, nidi Jesu tiquinare.

⁶Ahri queoyere tiquiro sa yahuepegũta tiquiro yahuyere masiedari tiquina.

Jesu ovejare quehnoano coheriquiro yero saha tiquiro yequinare quehnoano cohere

⁷Pari turi Jesu tiquinare yahuri tja:

—Ijirota niaja musare. Ovejare coheri sahrĩno sopecaha yero saha ijiaja yuhũ. ⁸Ijipihtiequina yuhũ pano ahtayequina ni mehoñene buheyequina yaqueyequina yero saha ijire. Tiquina sa ijiepegũta oveja yero saha ijieyequina yeequina pehe apequinare ne tũho cãedare. ⁹Yuhũ ovejare coheri sahrĩno sopecaha yero saha ijiaja. Sopecaha sajãñequina yero saha ijire yuhũre wacũ tutuayequina. Sa yegũ tiquinare pecapũ wahaboriquinare yuhũoutja. Ovejare cahmotari sahrĩno tiquinare cahmotariro sahata yuhũ yuhũoyequinare cahmotatja. Sa ye tiquina cahmeñene cũoeta tiquina, nidi Jesu.

¹⁰Sa ni tuhasa ohõ saha ni nemori:

—Musare ni meho buheyequina ovejare yaqueyequina yero saha ijire. Apequina yaque duaye, apequina wejẽ duaye ahtare. Oveja yero saha ijieyequinare, yeequina ijipihtie decori Cohãcjũ mehna ijiatiquinare yegũ ahtau yuhũ. Sa yegũ yeequina decoripe tiquina bucueatire ahtau yuhũ. ¹¹Ovejare quehnoano coheriquiro yero saha ijiaja yuhũ. Ovejare quehnoano coheriquiro yariatiquiro ijieperota tiquiro

yequina ovejare cohtere, “Sijoro wahari”, nino. Yeequina Cohăcĵŭ mehna tiquina sa ijiducuatire yegu yariŭtja yŭhŭ. ¹²Oveja upŕo cahacĵŭno pehe oveja upŕo ijierare. Sa yeye oveja tiquiro yequina ijierare. Sa yero yairo ovejare tiquiro ihyaro ahtagŭ ihŭano tiquiro cahacĵŭno pehe ovejare cohă doco că, oma căa wahare. Tiquiro sa cohă docori bato, yairo ovejare tiquiro ņehegŭ ihŭaŭe oveja pari oma site căa wahare. ¹³Tiquiro cahacĵŭno pehe tiquiro wapataye dihitare cahmene. Sa yero tiquiro ovejare quehnoano cohte coerare, nidi Jesu.

¹⁴Sa ni tuhasa ohŭ saha ni nemori:

—Ovejare quehnoano cohteriquiro yero saha ijiaja yŭhŭ. Sa yegu yeequinare masiaja yŭhŭ. Sa yeye yeequina pehe yŭhŭre masine. ¹⁵Sata yŭhŭ Pacŭ gŭhŭ yŭhŭre masine. Sa yegu yŭhŭ gŭhŭ yŭhŭ Pacure masiaja. Oveja yero saha ijieyequina yeequina Cohăcĵŭ mehna tiquina sa ijiducuatire yariŭtja yŭhŭ. ¹⁶Apequina oveja ape sahrŭno cĵena yero saha ijieyequina apequina masa gŭhŭ yeequina ijietta. Tiquina gŭhŭre neagutja. Sa ye yŭhŭ yahuducugŭ tŭho căeta tiquina gŭhŭ. Sa ye yeequina ijipihtieyequina ihcă curuata ijietta. Sa yegu yŭhŭ dihita yeequinare cohteitja, nidi Jesu.

¹⁷Sa ni tuhasa ohŭ saha ni nemori:

—Yeequina Cohăcĵŭ mehna tiquina sa ijiducuatire yariŭtja yŭhŭ. Yŭhŭ yariari bato masa mŭjagutja. Sa yeacĵŭ yŭhŭ ijigŭ yŭhŭ Pacŭ yŭhŭre cahine. ¹⁸Yŭhŭ wejĕ dutieragŭ yŭhŭre wejĕ masiedaboaya tiquina. Yŭhŭ cahmeno sahata yŭhŭre wejĕeta. Sa yegu yeequina Cohăcĵŭ mehna tiquina sa ijiducuatire yariŭtja. Yaria masiaja yŭhŭ. Sa yegu masa mŭja masiaja. Yŭhŭ Pacŭ yŭhŭre tireta ye dutiri, nidi Jesu.

¹⁹Tiquiro sa nigŭ tŭhoye judio masa pŭa curua tu wari. Apequina sijoro tŭhotu, apequina gŭhŭ sijoro tŭhoturi.

²⁰—Tiquiro watŭno cŭore. Sa yero tŭho masiedare. ĴDŭhsena tiquireore pari turi tŭhoajari mŭsa? nidi apequina peyequina judio masa.

²¹Apequina pehe ohŭ saha nidi:

—Watŭno cŭoriquiro ijiro sa ni yahuducueraboaya. Caperi bajueriquirore ihŭagŭ ye masiedare watŭnore cŭoriquiro. Sa yero watŭnore cŭoerare Jesu, nidi apequina judio masa.

Judio masa Jesure cahmedahye

²²Ape deco ŭsă acaye judio masa Jerusalĕpŭ bose deco yeye nidi pari turi. Cohăcĵŭ wŭhŭre panopŭ Cohăcĵŭre tiquina ohorire tiquina wacŭati deco ijiri. Ti pjere pohecŭ ijiri. ²³Ti decore Salomo wame tiri tucŭpŭ Cohăcĵŭ wŭhŭpŭ ijiri tucŭpŭ Jesu ihŭa tinino nidi. ²⁴Ti tucŭpŭ tiquiro ijigŭ ihŭaŭe ŭsă acaye judio masa tiquiro cahapŭ cahmecoa, tiquireore sinituri.

—Yoabutiari pje ŭsăre quehnoano yahueraga mŭhŭ. Poto ŭsăre quehnoano yahu madoqueohya mŭhŭ. ĴCohăcĵŭ ohorigŭ Cristota ijijari mŭhŭ? nidi tiquina Jesure.

²⁵Tiquina sa nigŭ tŭhoro ohŭ saha ni yŭhtiri Jesu:

—Mūsare yahu tuhasamajagu. Yuhū sa yahuepegūta yuhūre tuho duerare mūsa. Yuhū Pacu yuhūre tiqiro dutiro sahata tiqiro tutuaye mehna ye ihñoaja. Sa yegu yuhū Cristo ijyereta mūsare ihñogu niaja. ²⁶Yuhū sa ihñoepēgūta yuhūre tuho duerare mūsa. Mūsa pehe yeequina ijjerare. Sa yena apequiro yequina oveja yero saha ijina, yuhū pehere tuhoerare mūsa. ²⁷Ovejare cohteriquirore tiqiro yequina tiquina tuhoriro saha yuhūre yeequina tuhore. Sa yegu tiquinare masiaja yuhū. Sa ye tiquina yuhū mehna wahare. ²⁸Sa yegu ijipihtiye decori Cohācjū mehna ijigū yeaja tiquinare. Sa ye tiquina pecapu wahasi. Sa yegu yeequinare yuhū cohtegū apequina pehe ne yuhūre ehma masiedare yeequinare. ²⁹Yuhū Pacu yuhūre yeequinare ohoriquiro ijipihtiyequina yuhūoro tutuariquiro ijire. Sa ye yuhū Pacu pehe yeequinare tiqiro cohtegū apequina pehe tiqiro gūhūre ne ehma masiedare tiquinare. ³⁰Yuhū, yuhū Pacu mehna ihcūta ijiaja, nidi Jesu judio masare.

³¹Tiqiro sa nigū tuhoye judio masa pehe tiqirore tiquina doque wejēati utā pacare pari turi nemedi tja. ³²Tiqina sa yegū ihñano Jesu sinituri tiquinare:

—Yuhū Pacu tutuaye mehna peye tahari ye ihñomi mūsare. ¿Dise boro pehere yuhū yeri buhiri yuhūre utā paca mehna doque wejē duajari mūsa? ni sinituri Jesu.

³³Tiqiro sa nigū tuhoye ohō saha nidi tiquina:

—Cohācjū tutuaye mehna mūhū ye ihñori buhiri mūhūre utā mehna doque wejē dueraja usā. Cohācjūre mūhū ñano yahuducuri buhiri mūhūre utā paca mehna doque wejē duaja usā. Masu ijiepegūta “Cohācjū ijiaja yuhū”, mūhū niñe buhiri mehna mūhūre utā paca mehna doque wejē duaja usā, ni yuhūti tiquina.

³⁴Tiqina sa ni yuhūtigū tuhoro Jesu tiquinare yahuri:

—Mūsa gūhūre “Cohāmana”, ni pisuri Cohācjū. Sata ni ojoahye tiqiro dutiyere tiquina ojoari pūpu. ³⁵Cohācjū yere tiquina ojoari pū potota ijigū mari masiaja. “Ni mehoñe ijire”, ti pūre ni masiedaja mari. Sa yero tiqiro yere tuhoyequinare potota tiqiro “Cohāmana”, ni pisure. ³⁶Cohācjū yuhūre besetjāno, ahri yehpapure ohori. Sa yegu yuhū “Cohācjū macu ijiaja”, yuhū nidi buhiri “Cohācjūre ñano yahuducuro nine Jesu”, nine mūsa yuhūre. ¿Duhsena yuhūre sa nijari mūsa? ³⁷Yuhū Pacu tiqiro cahmediro sahata tiqiro tutuaye mehna yuhū ye ihñoedagū pūritare yuhū buherire “Poto tjire” niedaboaga mūsa. ³⁸Yuhū Pacu tiqiro tutuaye mehna yuhū ye ihñoepēgūta yuhū pehere tuho duerare mūsa. Sa tuho duerapenata tiqiro tutuaye mehna yuhū ye ihñogu ihñana yuhū yerire “Poto tjire”, niña mūsa. Mūsa sa nina, yuhū Pacu mehna usā ihcāno saha ijigū masinata mūsa. Sa yena tuhonata mūsa, nidi Jesu tiquinare.

³⁹Tiqiro sa nigū tiquina pari turi tiqirore ñehe duamedī. Tiquina sa ñehe duagū ihñano tiqiro duhti wijiaa wahari.

40 Sa wijiariquiroputa Ñu masare tiqiro wame ye m̄htariopu Jordã asũ m̄ja taro pehepu pari turi Jesu wahari tja. Topu esaro tojoa cãri tiqiro.

41 Sa ye masa peyequina tiqirore ihñañe esari. Ohõ saha nidi tiquina basi:

—Ñu pehe Cohãcjũ tutuaye mehna ye ihñoedari. Sa ye ihñoedapegũta ijiptiye Jesure tiqiro yahuri pehe queorota ijire, nidi masa tiquina basi.

42 Sa ye topure masa peyequina wacũ tutua ducari Jesure.

Lázaro wame tiriqiro yariaa wahahye

11 1 Sa ye Betania wame tiri maca cjũno Lázaro wame tiriqiro dohatiro niahye. Ti macapu tiqiro wahmiosãnumia gũhu María, Marta mehna ijiri. 2 María pehe Jesure ehme sitiye pio wisõaticoro, ticoro poari mehna tiqirore tu coseaticoro ijire. Ticoro bahuro Lázaro pehe dohatiro niahye. 3 Sa ye tiquina numia apequinare Jesure yahu dutiye ohoahye.

—Pũhto, mũhu cahĩniqiro dohatiro nine, ni yahu dutiye ohoahye Lázaro wahmiosãnumia.

4 Ti quitire tũhoro ohõ saha nidi Jesu:

—Yojopure Lázaro tiqiro dohatiye tiqiro yariati ijierare. Cohãcjũ tutuayere masare ihñoatire yojopure tiqiro dohatire. Sa ye yũhu tutuagu yũhu ijigũ gũhure masa ihñaeta, nidi Jesu.

5 Jesu Martare, ticoro bahoro gũhure, Lázaro gũhure tutuaro cahĩdi.

6 Sa nino Lázaro tiqiro dohatigũ tũhoeperota topu Jesu pua deco tojoari.

7 Pua deco bato Jesu ohõ saha nidi usãre tiqiro buhenare:

—Pari turi Judea yehpapu tojoa wahauhna tja, nidi usãre.

8—Buhegu, canuagãta judio masa mũhure utã paca mehna doque wejẽ duamedí. ¿Dũhsegu pari turi tojoaa waha duajari mũhu? nii usã pehe.

9 Usã sa nigũ tũhoro tiqirore tiquina wejẽ masiedarĩne yahuro, queoye mehna buhero ohõ saha nidi usãre:

—Pajiro tũhotueracãhña. Ihcã decore doce horari waro ijire. Asũ deco cjũno ijigũ quehnoano ihñaja mari. Sa yena decore tinina, ne pũha boraeraja mari. 10 Nahitianopu tiniñequina pũha boraahare. Asũ deco cjũno mariedagũ quehnoano ihñedare tiquina, nidi Jesu. (Sa nino ohõ saha nino niahye: “Yojopure yũhu Pacu yere yũhu yahu pehoato dũhsarĩne. Sa ye yũhure wejẽ masiedarĩne”, nino niahye.)

11 Sa nino usãre yahu nemori tja:

—Mari mehna cjũno Lázaro, carĩno niaga. Tiqiro sa carĩpepũta yũhu tiqirore wahcõgu wahautja, nidi usãre.

12—Pũhto, Lázaro carĩniqiro ijiro, yũhurota, nii usã.

13 Usã sa niepegũta Jesu “Carĩno niaga”, nino “Yariaa wahare”, nino nidi jimedí. Tiqiro sa nigũ tũhona “Lázaro soro niaga”, ni tũhotumi usã pehe. 14 Usã sa ni tũhotugũ masino Jesu potu yahuri usãre:

—Lázaro yariaa wahaga. ¹⁵Yũhũ marieno tiqiro yariagũ quehnoarĩne. Sa yena m̄sa yũhũre wacũ tutua nemonata. Isa mari ihñana wahaũhna tiqiro cahapũ, nidi Jesu.

¹⁶Tomasu sũhdũariqiro tiquina ni pisuriqiro ohõ saha nidi usãre:

—Mari gũhũ Jesu mehna wahaũhna. Tiquirore wejẽñe, mari gũhũre wejẽahdo, nidi Tomasu.

Jesu sa ijiducugũ yeriqiro masare masoriqiro ijire

¹⁷Sa ye topũre usã esari bato to cjẽna ohõ saha ni yahuri Jesure:

—Pititia deco wahare Lázaro m̄nanore masa copepũ tiquina cũri bato, ni yahuri tiqirore.

¹⁸Betania pehe Jerusalẽ cahapũ ihtia kilómetro yoaro ijiri. ¹⁹Sa ye usã acaye judio masa peyequina Martare, María gũhũre ñehe quea utiye ahtahye Lázaro yariari bato. ²⁰Sa yero Jesu mehna usã esana tana yegũ tũhoro Marta pehe usãre piti caro ahtari jiri. Ticoro sa piti caro wahagũ María pehe tiquina ya wũhũpũ tojoahye. ²¹Sa piti caro Marta ohõ saha nidi Jesure:

—Pũhto, yũhũ bahũ tiqiro yariato pano mũhũ ohõpũ ijigũ tiqiro yarieraboaya. ²²Yojopũ gũhũre Cohãcjũre mũhũ sini basagũ tiqiro mũhũ sinino sahata yerota, nidi Marta Jesure.

²³—Mũhũ bahũ masa wijiariota, nidi Jesu ticorore.

²⁴—Ahri yehpa pihtiatu deco tiqiro masa wijiatore masiaja yũhũ, nidi ticoro.

²⁵Ticoro sa nigũ Jesu yahuri tja:

—Yũhũ masa wijiagũ yegũ tjiaja. Yũhũ sa ijiducugũ yegũ tjiaja. Yũhũre wacũ tutuariqiro yarieperota sa ijiducurota. ²⁶Sa ye ijipihtiyequina Cohãcjũ mehna ijiducuyequina yũhũre wacũ tutuayequina ne pecapũ wahasi. ¿Ahrire masiajari mũhũ? nidi Jesu ticorore.

²⁷—Pũhto, masiaja yũhũ. Cristo Cohãcjũ macũ, “Ahri yehpapũ ahtarota”, tiquina nidigu mũhũ ijigũ masiaja yũhũ, nidi Marta Jesure.

Lázaro masa cope cahapũ esaro Jesu utiahye

²⁸Marta sa ni tuhasa ticoro bahoro Maríare pijiro wahari.

—Marine buheriqiro mari ya macapũre wihiri. Mũhũre pijire, derogã ni yuahye Maríare.

²⁹Ticoro sa nigũ tũhoro María sojaro mehna wahcãdũca, usã cahapũ ahtahye Jesure ihñano taro. ³⁰Tiquina ya macapũ esera nii usã. Marta ticoro piti cariropũ ijini usã. ³¹Judio masa ti wũhũpũ Maríare ñehe quea utiye niahye. Sa ye ticoro wahagũ ihñañe, tiquina ticorore nũnũ tã cãhye. “Ticoro bahũro m̄nanore tiquina cũri copepũ utiro waharo nine ticoro”, ni tũhotumahye tiquina. Sa ni tũhotuye ticorore nũnũ tã cãhye.

³²Sa yero María usã cahapũ wihiro, Jesure ihña, tiqiro dahpocãri cahapũ dũsepe curi mehna quehe sari.

—Pũhto, yũhu bahũ tiquiro yariato pano mũhũ ohõrũ ijigũ tiquiro yarieraboaya, nidi ticoro Jesure.

³³Sa yero judio masa ticoro mehna ahtariquina gũhu tiquina utigũ ihãano Jesu pehe tutuaro bũjũa witi ñano jeripohna tiri.

³⁴—¿Lázaro mũnanore nohopũ cohãri mũsa? ni sinituri Jesu.

—Ihãau taya, ni piji cãri tiquina.

³⁵Tiquina sa nigũ tũhoro Jesu utiri.

³⁶—Lázaro mũnanore Jesu tutuaro cahĩmeyari, nidi judio masa tiquina basi.

³⁷Apequina pehe ohõ saha nidi:

—Caperi bajueriquirore ihãagũ yeriquiro ijire ahriquiro Jesu. ¿Sa yero Lázaro tiquiro yariato pano tiquirore yũhdũoeraboayari? nidi tiquina.

Lázaro masa wĩjahye

³⁸Sa yero Jesu pari turi tutuaro bũjũa witiri. Sa yena usã ijipihina Lázaro masa copepũ esau. Utãpũ tiquina seheri cope ijiri. Sa yero tiquiro pagũre tiquina siõ sãa cĩri cope ijiri. Sa yero ti cope pajiria utã mehna tiquina bihari cope ijiri.

³⁹—Utã bihariare neña, nidi Jesu.

Tiquiro sa nigũ tũhoro Marta yariariquiro mũnana wahmiono ohõ saha nidi:

—Pũhto, yojopũ pititia deco waha tuhasare tiquiro yariari bato. Sa yero tiquiro pagũ ijiriro urĩ yũhdũaga, nidi Jesure.

⁴⁰—“Yũhũre wacũ tutuago Cohãcjũ tutuayere ihãagota”, mũhũre nimigũ, nidi Jesu Martare.

⁴¹Tiquiro sa nidi bato tiquina utã bihariare ne wiori. Tiquina sa nedi bato Jesu pehe mũmũsepũ ihãa mũo, Cohãcjũre ohõ saha nidi:

—Mai, yũhũre mũhũ tũho tuhasari. Tire mũhũ yegũ masigũ bucueaja mũhũre. ⁴²Yũhũre mũhũ decoripe tũhoducure. Tire masiaja. Sa masiepegũta yũhu mũhũ ohorigũ yũhu ijigũ ohõre ducuyequina tiquina masiatire mũhũre sa njaja. Tire “Potota ijire”, tiquina nino quehnoano sa nigũ njaja, nidi Jesu tiquiro Pacũrore.

⁴³Sa ni tuhasa Jesu tutuaro saũuducuri:

—Lázaro ahtaya, ni saũuducuri tiquiro.

⁴⁴Tiquiro sa nigũ yariariquiro mũnana omocarine tiquiro dahpocãri gũhũre suhti cahseri mehna tiquina dũhtemediquiro, tiquiro dapure suhtiro mehna tiquina wahmemediquiro, masa copepũ wĩjia tari.

—Tiquina dũhterire pãña tiquirore, nidi Jesu.

Judio masa pũhtoa pehe Jesure ñehe duamahye

(Mt 26.1-5; Mr 14.1-2; Lc 22.1-2)

⁴⁵Tiquiro sa masogũ ihãañe peyequina judio masa mehna cjẽna Marĩa mehna ahtariquina Jesure wacũ tutua, cahmedi. ⁴⁶Apequina tiquina mehna cjẽna pehe fariseo masa cahapũ esaye, Jesu yerire yahuahye



(San Juan 11.44)

tiquinare. 47-48 Sa ye pahia puhto, fariseo masa puhto gũhu cahmecoa, tiquina basi ohõ saha ni yahuducuahye:

—Jesu peye tahari Cohãcjũ tutuaye mehna ye ihñore. Tiquiro sa ye ihñogũ “Tire yeracãhña”, mari niedagũ ijipilthiequina masa tiquirore cahmeñe, tiquiro mehna wahaboaga. Sa ye Roma cjëna puhto Cohãcjũ wũhure cohã dutiye ohoeta tiquina yequina surarare. Mari ya dihta gũhure ehmaeta tiquina. (Mari ya dihta cjëna Jesure tiquina puhtoro cũgũ ihñañe Roma cjëna puhto “Marine cohãñe nine”, ni usua ñano yeeta marine.) ¿Sa yena dahse yenatari yojopũre? ni yahuducuahye tiquina basi.

⁴⁹Tiquina sa niepegūta apequiro Caifa wame tiriqiro ti cūhmare pahia pūhtoro ijiro, tiquinare yahuahye:

—Musa pehe ne masiedare. ⁵⁰Judio masa ijipihina mari ye ijiatire ihcāquiro masano tiquiro yariagū quehnoare. Tiquiro yarieregū marine ijipihina judio masare cohā peho cāboaga. Tire musa masiedare, niahye Caifa tiquinare.

⁵¹Sa nino tiquiro esa tuharo sa nino niedahye. Pahia pūhtoro tiquiro ijigū judio masa ye ijiatire Jesu yariatire mari Pacu pehe Caifare sa ni yahu dutiahye. ⁵²Jesu yariaro judio masa dihitare yūhdūoro taro niedare. Sa yariaro ijipihiteyquina Cohācjū pohnene ahri yehpapū iji siteyequina gūhure ihcā curuata ijigū yeatire yariatiquiro ijiri Jesu. ⁵³Sa ye ti decota tiquina “¿Jesure dūhse ye wejēnataro mari?” ni yahuducuye, tiquirore wejēne tee niahye.

⁵⁴Tiquina sa wejē duagū masino Jesu peyequina judio masa watoa pari turi tinino wahaerari. Sa yero masa marieno cahagā Efraī wame tiri macapū ūsāre siho wahari. Ūsāre ti maca siho tojoarīdi Jesu.

⁵⁵Ti pjere pascua bose decori ūsā judio masa ūsā bose decori ijiato mehenogā dūhsatjīari. Sa ye bose deco panogā masa peyequina apeye macari cjēna Jerusalēpū cahmecoari. Pascua cjēne tiquina ihyato pano Cohācjū yere yeye tehe, tiquina cahmomohnore cohoro saha tiquina ñañene cosee tee nidi. ⁵⁶Sa ye tiquina Jesure macañe niahye. Sa ye Cohācjū wūhūpū ijiyequina ohō saha ni yahuducuahye:

—¿Bose decore ihñano ahtaeraboari Jesu, musa tūhotugū? niahye tiquina basi.

⁵⁷Sa ye pahia pūhtoa, fariseo masa gūhū ohō saha ni yahu dutiahye masare:

—Jesu wihigū ihñana, yahuya ūsāre. Tiquirore ñehena tana niaja, niahye pūhtoa masare.

María Jesu dahpocārine ehme sitiye mehna pio peohye

(Mt 26.6-13; Mr 14.3-9)

12 ¹Jesu, ūsā tiquiro buhena mehna Betaniapū ūsā esari bato pascua deco esato seis decori waro dūhsarīdi. Lázaro Jesu masoriquiro ti maca cjēno ijiri. ²Ūsā esari bato Jesu gūhū ūsā ihyatire dahreri apequina. Sa ye Lázaro, Jesu, ūsā mehna mesa cahapū nuju sau. Ūsā sa nuju sari bato Marta ihyayere peori ūsāre. ³Sa yero María ehme sitiye ūhsere nardo wame tiye cohorī ūhsere kilo deco mehna ne cāhta Jesu dahpocārine pio peori. Ti ūhse wapa ti yūhdūari. Pio peo tuhasa ticoro poari mehna wūori. Ticoro sa pio peori bato ti wūhū quehnoano ehme siti sehsaa wahari. ⁴Ūsā mehna cjēno, Jesure ihñā tuhtiyequinare ihñōatiquiro Juda Iscariote pehe ohō saha nidi:

⁵—¿Dūhse yero ahricoro sa ye siteajari? Tire ticoro duaboaya. Tire duaro tres cientos niñeru cjoerire wapataboaya. Sa yero ticoro ti niñerure pejecūoyequinare ohoboaya, nidi tiquiro.

⁶Juda pehe pejesoyequinare yedoho duerari. Tiquiro usã niñerure ihbo basariquiro ijjeperota yaqueriquiro ijiri. Sa yero tiquiro usã niñerure ihquẽ tahari ne mujari. Sa yero “Ti niñerure neitja”, nino, sa nidi Mariare tiquiro.

⁷Tiquiro sa nigũ tũhoro ohõ saha nidi Jesu:

—Sa niedacãhña titorore. Ticoro ehme sityere yũhũre ticoro dũharire yũhũre pio peori, yũhũre tiquina yato pano yũhũ pagũre quehnoyoro. Pejesoyequina pehe mũa mehna sa ijiducueta. Sa yena tiquinare oho masine mũa. ⁸Yũhũ pehe ahri yehpapũre mũa mehna sa ijiducusi, nidi Jesu.

Pahia pũhtoa Lázarore wejẽ duahye

⁹Sa ye Jesu Betaniapũ tiquiro ijigũ tũhoye, usã acaye judio masa peyequina tiquirore ihñañe ahtari. Tiquiro dihitare ihñañe ahtaye niedari. Lázaro yariamediquirore Jesu masoriquirore tiquiro gũhũre ihñañe ahtaye nidi. ¹⁰Tiquina ihñañe esarire masiñe, pahia pũhtoa Lázaro gũhũre wejẽ duari. ¹¹Lázaro yariamediquiro Jesu masoriquiro ijigũ ihñañe peyequina masa Jesure wacũ tutuari. Tiquiro sa masogũ ihñañe peyequina judio masa tiquina pahia ye buheye pehere duhu cãri. Tiquina sa duhugũ ihñañe pahia pũhtoa pehe usua yũhdũye Lázarore wejẽ duari.

Jerusalẽpũ esahye Jesu

(Mt 21.1-11; Mr 11.1-11; Lc 19.28-40)

¹²Pascua bose decore tiquina yegũ peyequina masa Jerusalẽpũ ihñañe wahari jiri. Ape deco Jerusalẽpũ Jesu ahtatire masa tũhori. ¹³Sa ye iqui pohnarine ne cã, tiquirore piti caye wahari. Sa piti caye ohõ saha ni sañuducuri tiquina:

—Ahriquirore ño peouhna. Ahriquiro Cohãcjũ ohoriquiro quehnoano ijiahro. Ahriquiro judio masa mari pũhtoro tjire, ni sañuducuri tiquina.

¹⁴Jesu burrogã tiquiro bocariquirogã bui pesari. “Ohõ sahata yerota”, ni ojoahye Cohãcjũ yere tiquina ojoari pũpũ:

¹⁵Jerusalẽ wame tiri maca cãna, cueracãhña mũa. Ihñaña. Mũa pũhtoro burrogã bui pesa cãhtare, ni yahuahye Cohãcjũ yere tiquina ojoari pũpũ.

¹⁶“Tiquina sa ni ojoari Jesure nino niaga”, ni, usã tiquiro buhena quehnoano masiedarũ. Sa masiedapenata uhmũsepũ Jesu mujari bato usã ti ojoarire wacũ boca tuho masii. Ohõ saha ni tuhotuu: “Cohãcjũ yere tiquina ojoari pũ pehe Jesure yahuro nimeya. Sa ye Cohãcjũ yere tiquina ojoari pũ nidiro sahata yeri masa Jesure”, ni tuhotu, masii usã.

¹⁷Lázarore masa copepũ ijiriquirore Jesu pisu masogũ ihñariquina pehe yahuri masare. ¹⁸Sa ye Lázarore Jesu masorire tũhori bato masa peyequina Jesure ihñañe ahtari. ¹⁹Tiquina sa ahtagũ ihñañe fariseo masa tiquina basi ohõ saha niahye:

—Ijipihtiyequina Jesu yequina dihita wahaye nine yojopũre. Sa yena mari dũhse ye masiedaga tiquinare, niahye fariseo masa tiquina basi.



(San Juan 12.13)

Meheñequinagã griego masa Jesure maca cãhtahye

²⁰Sa ye bose deco Cohãcjüre ño peoye ahtayequina mehna cjëna meheñequinagã griego masa ijiri. ²¹Sa ye tiquina Felipe cahapũ wihiahye. Felipe pehe Betsaida wame tiri maca Galilea yehpapũ ijiri maca cjũno ijiri. Sa ye tiquiro cahapũ wihiriquina ohõ saha niahye tiquirore:

—Jesure ihña duaga usã, niahye tiquina.

²²Tiquina sa nigũ tũhoro Felipe Andrepũre tire yahuro wahahye. Sa ye tiquina pũaro Jesure yahuri. ²³Tiquina sa ni yahuri bato Jesu tiquinare yahuri:

—Yũhu masũ Cohãcjũ ohorigũ ijiaja. Yũhũre ijipihiteyiquina tiquina ño peoati pje yojopũre ijirota nine. Yojopũre yũhu yariati pje ijirota nine. ²⁴Potota musare yahugũ niaja. Oteri pjere yehpapũ mari yaeragũ, ti pjere mari oteragũ ihcã pjeta tojoarota. Sa yero ti pjere mari yari bato pihni, dũca tirota. (Sata yũhu yariari bato yũhũre tiquina yari bato peyequina masare Cohãcjũ mehna sa ijiducuatiquina ijigũ yeitja yũhu.) ²⁵Ahri yehpapũ musa ijiyere pajiro tũhotuboaga musa. Sa tũhotuna Cohãcjüre wacũedana, pecapũ wahanata musa. Ahri yehpapũ musa ijiyere sa tũhotu cãna, Cohãcjũ mehna sa ijiducunata. ²⁶Yeere ye duana yũhu buheyere quehnoano tũhoya musa. Musa sa yena musa gũhu yũhu ijiorpũ ijinata. Yeere yeriquire yũhu Pacũ pehe ño peorota, nidi Jesu.

Jesu tiquiro yariatore yahuahye

²⁷Sa ni tuhasa ohõ saha ni nemori:

—Yojopũre yũhu ñano jeripohna tiaja. ¿Yũhu Pacũre dũhse nigutari yũhu? ¿“Mai, yũhu ñano yũhduatire yeracãhña yũhũre”, niboagari yũhu? Tire niedaja yũhu. Ñano yũhduacjũta ahri yehpapũ ahtaũ. Sa yero yũhu ñano yũhduati pje yojopũre ijirota nine, ni yahuri usãre tiquiro buhenare.

²⁸Sa yero ohõ saha nidi tiquiro Pacũrore:

—Mai, mũhũ tutuagũ ijiyere yojopũre ihñoña masare, nidi Jesu tiquiro Pacũrore.

Tiquiro sa nigũ ãhmũsepũ yahuducuro ca tari:

—Tutuagũ yũhu ijiyere masare ihño tuhasaũ. Yojopũre sa yegũ pari turi ihñoutja masare, nino ca tari.

²⁹Tiquiro sa nigũ tũhoye topũ ducuyequina masa peyequina ohõ saha nidi:

—Upo ijiaga sa bisiro, nidi masa.

—Angel Jesure yahuro nidi, nidi apequina masa.

³⁰Ohõ saha nidi Jesu pehe:

—Ãhmũsepũ sa bisiro yũhũre tũho dutiro niedari. Musa pehere tũho dutiro sa bisiro ca tari. ³¹Yojopũre ahri yehpa cjëna tiquina ñañe yeri buhirire buhiri dahrerota tiquinare. Ahri yehpa cjëna pũhtoro watĩnore cohãnota Cohãcjũ. ³²Sa yegũ yũhũre curusapũ tiquina wahcõ docogũ peyequina masare yeequina ijiatiquinare yeitja yũhu, nidi Jesu.

³³Sa nino curusapũ tiquiro yariatire yahuro nidi Jesu masare.

³⁴Tiquiro sa nigũ tũhoye masa pehe tiquirore ohõ saha nidi:

—Cohãcjũ yere tiquina ojoari pũpũ ohõ saha nine: “Cristo ijipihtiye decori ijirota”, ni ojoahye. ¿Tiquiro sa ni ojoagũ mũhũre masare Cohãcjũ ohorigũre dũhse yeye curusapũ wahcõ docoetari masa mũhũre? ¿Masuno Cohãcjũ ohoriquiro noa ijijari tiquiro? ni sinituri tiquina.

³⁵Tiquina sa nigũ ohõ saha ni yũhtiri Jesu:

—Buhriro mehna mari ihña masigũ yero saha masare Cohãcjũ yere quehnoano masigũ yeaja yũhũ. Came cjũnogã mũsa mehna ijisi yũhũ. Mũsare yũhũ buhegũ yojopũre tũhoya mũsa “Ñãñe yeari”, nina, Cohãcjũ mehna mũsa sa ijiducuatire. Yũhũ buheyere tũhoeyequina nahitiano tiniñequina yero saha tiquina wahatore masiedare. ³⁶Sa yegũ buhriro yero saha ijigũ ijijaja yũhũ. Sa yegũ mũsare buhegũ Cohãcjũ yere quehnoano masigũ yeaja mũsare. Yojopũre yũhũ wahato pano yũhũre wacũ tutuaya. Sa wacũ tutuana yeequina ijinata mũsa, nidi Jesu.

Sa ni yahu tuhãsa duhti cãa wahari.

Judio masa Jesure cahmedahye

³⁷Peye tahari Cohãcjũ tutuaye mehna tiquinare Jesu tiquiro ye ihñoepegũta peyequina judio masa tiquirore ne tũho duerari. ³⁸Cohãcjũ yere tiquina ojoari pũpũ Isaia mũnãno tiquiro ojoariro sahata yeye nidi tiquina. Ohõ saha ni ojoahye Isaia mũnãno:

Cohãcjũ, mũhũ buheyere usã yahugũ masa ne tũho duerare. Mũhũ tutuayere tiquinare mũhũ ye ihñoepegũta, tire “Poto ijierare”, nidi tiquina, ni ojoahye Isaia mũnãno.

³⁹Tiquina sa tũho dueragũ ihñano Cohãcjũ tiquinare masiedagũ yeri. Ti gũhũre Isaia mũnãno ohõ saha ni ojoahye:

⁴⁰Caperi bajueyequina yero saha ijigũ yee tiahye Cohãcjũ tiquinare.

Sa yero tiquiro yere masiedagũ yee tiahye tiquinare. Sa ye tiquiro tutuayere ihñaepeeta tiquina ihñarire masiedare. Sa ye tiquiro buheyere tũhoepeeta tire masiedare tiquina. Cohãcjũ ye buheyere masiñe tiquina ñãñe yerire cohã dutiboaya. Sa yero tiquinare yũhdũoboaya tiquiro, ni ojoahye Isaia mũnãno Cohãcjũ yere tiquina ojoari pũpũ.

⁴¹Sa ni ojoaro Isaia Cristo tutuayere masino tiquiro nidiro sahata Cristore yahu ojoahye.

⁴²Apequina Jesure tiquina cahmedapegũta judio masa usã pũthoa mehna cjẽna peyequina Jesure wacũ tutua, cahmedi. Sa cahmepeta tiquina fariseo masare cueye apequinare “Jesu yequina wahaũ usã”, ni yahu duerari. Tire tiquina yahugũ tũhoye Jesure tiquina cahmedi buhiri judio masa usã buheri wũhũpũ tiquinare sajã dutieraboaga fariseo masa pehe. ⁴³Cohãcjũre bucuegũ ye duepeeta ti yũhdũoro fariseo masa pehere bucuegũ ye duari Jesure cahme dũcayequina. Sa ye tiquina “Jesu yequina wahaũ”, ni apequinare yahu duerari.

Jesu yahuyere tiquina tũho duerari buhiri masa buhiri tieta

⁴⁴Sa ye Jesu tutuaro sañuducu, yahuri:

—Yũhũre wacũ tutuariquiro yũhũ dihitare wacũ tutuerare. Yũhũre ohoriquiro gũhũre wacũ tutuare tiquiro. ⁴⁵Sa ye yũhũre masiñequina yũhũre ohoriquiro gũhũre masine. ⁴⁶Buhrioro mehna mari ihña masigũ yero saha ahri yehpapũ Cohãcjũ yere masigũ yei ahtau nii yũhũ. Sa yegũ Cohãcjũ yere masare masigũ yeaja. Ihcãquiro nahitiano wahariquiro yero saha ñañene yeducure. Yũhũre wacũ tutuariquiro tiquiro yero saha yesi. Yũhũre wacũ tutuariquiro potota tũhorota. ⁴⁷Apequina yũhũ yahuyere tũhoepeta yũhũ nidiro saha yerare. Tiquina sa yerapegũta tiquina yerari buhirire buhiri dahresi yũhũ pehe tiquinare. Ahri yehpapũre buhiri dahregũ ahtagũ niedũ yũhũ. Ahri yehpa cjẽnare pecapũ wahaboriquinare yũhũoacjũ ahtagũ nii yũhũ. ⁴⁸Yũhũre cahmeeñequina, yũhũ yahuye gũhũre cahmeeñequina buhiri dahrenohatiquina ijietã. Tiquina yũhũ yahuyere tiquina tũhoerari buhiri ahri yehpa pihitiri deco ijigũpũ buhiri tieta. ⁴⁹Yũhũ esa tuharo yeraja. Yũhũ Pacũ yũhũre ohoriquiro pehe yũhũre yahu dutiri. Sa yero yũhũ yahuye pehe tiquiro ye yahuducuye ijire. ⁵⁰Tiquiro ye yahuducuyere tũhona Cohãcjũ mehna sa ijiducunata mũsa. Sa yegũ yũhũ Pacũ tiquiro yahu dutiriro sahata yahuaja mũsare, nidi Jesu.

Jesu buheyequina dahpocãrine coseahye tiquiro

13 ¹Sa ye pascua deco bose deco panogã ahri yehpare tiquiro cohã cãtore tiquiro Pacũro cahapũ tiquiro wahatore masidi Jesu. Sa yero ahri yehpa cjẽnare tiquiro yequinare tiquiro tutuaro cahĩdi tiquina mehna tiquiro ijiro puno. Sa cahĩducure tiquiro yequinare.

²Ti ñamine Jesu usã tiquiro buhena mehna usã ihyagũ Juda Iscariotere Simo macunore Jesure ihña tuhtiyequinare ihño duti tuhasari jiri watĩno pehe. ³Sa yero mari Pacũ Cohãcjũ Jesure ijipihtiyequina bui tiquiro pũhoro sũrre masidi Jesu. Sa yero Cohãcjũ cahapũ tiquiro ahtarire came uhmũsepũ tiquiro mũjati gũhũre masidi. ⁴Sa masino wahcãdũca, tiquiro suhtiro bui cjãnore tu we ne, tore cũ tuhasa, suhtiro cahsero mehna tiquiro pari yũjũ dũhteri. ⁵Dũhte tuhasa, waparopũ acore pio sãa, usã tiquiro buhena dahpocãrine cose dũcari. Usãre cose tuhasa tiquiro dũhteri cahsero mehna wũori usã dahpocãrine.

⁶Apequina buheyequinare cose cã, Simo Pedropũre esari. Tiquiro dahpocãrine tiquiro coseato pano Pedro pehe tiquiore ohõ saha nidi: —¿Pũhto, yũhũ dahpocãrine cosegũ tũũ nijari mũhũ? nidi Pedro Jesure.

⁷—Mianogã mũhũre yũhũ yeatire masiedare mũhũ. Sa masiedapegũta camerũ masiita mũhũ, nidi Jesu tiquiore.

⁸—Yũhũ dahpocãrine ne cosesi mũhũ, nidi Pedro.

—Mũhũre yũhũ coseragũ yaquiro ijisi mũhũ, nidi Jesu.

⁹—Pũhto, yũhũ dahpocãri dihitare coseracãhña. Yũhũ dahpocãrine, yũhũ omocarine, yũhũ dapu gũhũre coseya, nidi Pedro.



(San Juan 13.5)

¹⁰Tiquiro sa nigū Jesu queoye mehna buhero ohō saha nidi:

—Ihcāquiro masuno cuhsaro tiquiro pagare quehnoano tu cose pehere. Sa yero pari turi tiquirore tu cosero cahmedare. Tiquiro dahpocāri dihitarē tu cosero cahmene. Ijipiltina mūsa ñañe yerire coserina mūsa ijiepegūta ihcāquiro mūsa mehna cǵno tiquiro ñañene cosemehnediquiro ijire, nidi Jesu.

¹¹Jesu tiquirore ihña tuhtiyequinare ihñoatiquirore masidi: Sa masino “Ihcāquiro mūsa mehna cǵno tiquiro ñañene cosemehnediquiro ijire”, nidi.

¹²Ūsā dahpocārine cose tuhasa, tiquiro suhtirore saña tuhasa, nuju sari tiquiro dujiriroputa.

—¿Mianogā mū sare yūhū yerire masiajari mūsa? ¹³Mūsa yūhūre “Buhegū”, ni pisuna, “Pūhto”, ni pisuna poto ninata nine mūsa yūhūre. Mū sare buhegū, mūsa pūhto potota ijiaja yūhū. ¹⁴Sa yena yūhū mū sare buhegū, mūsa pūhto ijiepeguta mūsa dahpocārine yūhū cosegū ihñana mūsa gūhū mūsa mehna cǵena dahpocārine coseya. ¹⁵Mianogā mūsa yeatire mū sare ihñou. Mūsa mehna cǵenare mūsa yedohoatire ihñou. Mū sare yūhū yeriro sahata mūsa gūhū yeya. ¹⁶Ijirota niaja mū sare. Mūsa yūhū cahacǵena yero saha ijina yūhū bui ijierare.

ihñoutja yuhũ pehe. ³²Sa yegu Cohãcjũ tiquiuro tutuayere yuhũ ihñogũ tiquiuro pehe yuhũ tutuaye gũhũre yojoꝛũ pũritare ihñõ madoqueorota. ³³Yuhũ pohna yuhũre tuhoya. Meheñe decorigã mũa mehna ijinigutja. Yuhũ wahari bato yuhũre macanata mũa. Sa yegu mari acaye judio masare yuhũ nidiro sahata mũa gũhũre niãa. “Yuhũ wahatore mũa pehe waha masiedare”, tiquinare yuhũ nidiro sahata mũa gũhũre yahuaja. ³⁴Wahma dutiurore mũsare yahugutja. Mũa mehna cjenare cahĩña mũa. Mũsare yuhũ cahĩdiro sahata, mũa mehna cjenare cahĩña. ³⁵Sa yena mũa mehna cjenare mũa cahĩgũ ihñañe, yeequina mũa ijijere masieta apequna, nidi Jesu usãre.

“Jesure masiedaja”, Pedro tiquiuro niatire yahuahye Jesu
(Mt 26.31-35; Mr 14.27-31; Lc 22.31-34)

³⁶Tiquiuro sa nigũ Simo Pedro Jesure sinituri:
—¿Pũhto, nohopũ wahautjari mũhũ? nidi Pedro.
—Yuhũ wahatorũre yojoꝛũre yuhũ mehna waha masiedare mũhũ.
Yojoꝛũre waha masiedapegũta came yuhũ cahapũ wahautã mũhũ, nidi Jesu Pedore.

³⁷—¿Pũhto, dũhsegu yojoꝛũre mũhũ mehna waha masiedaboari yuhũ?
Yuhũre tiquina wejẽ duepegũta mũhũre ne duhusi yuhũ, nidi Pedro Jesure.

³⁸—¿Yuhũre ne duhueragũtari mũhũ? Poto mũhũre yahutja. Canaca tiquiuro yahuato pano “Jesure masiedaja”, niita mũhũ apequnare. Ihtia taha sa niita mũhũ, nidi Jesu Pedore.

Jesu Cohãcjũ cahapũ wahari maha yero saha ijire

14 ¹Came Jesu usãre ohõ saha ni yahuri:
—Ne bujua witi, pajiro wacũedacãhña. Cohãcjũre wacũ tutuaya. Sa yena yuhũ gũhũre wacũ tutuaya. ²Yuhũ Pacũ tiquiuro ijiroꝛũre peye wuhũse ijire. Mũa ijiatore quehnoyugũ wahagutja. Ti ijirota ijire. Sa yegu mũsare tire yahuaja. ³Sa yegu mũa ijiatore quehno tuhasa, tojoa tautja yuhũ. Sa yegu yuhũ cahapũ mũa ijiatire mũsare negũ ahtautja yuhũ. ⁴Sa yena yuhũ wahati mahare masine mũa, nidi Jesu usãre tiquiuro buhenare.

⁵—Pũhto, mũhũ wahatore masiedaja usã. ¿Sa yena dũhse ye mũhũ wahati mahare masinatari usã? ni sinituri Tomasu Jesure.

⁶Tiquiuro sa ni sinitugũ Jesu yũhtiri:
—Cohãcjũ cahapũ wahagũ yegu ijiita niãa yuhũ. Sa yegu poto ijijere yahugũ ijiita niãa yuhũ. Sa yegu uhmũsepũre catiducugũ yegu ijiita niãa yuhũ. Sa ye yeequina dihita yuhũ Pacũ cahapũ wahaeta. ⁷Yuhũre masina, yuhũ Pacũ gũhũre masiboya mũa. Yojoꝛũre tiquiurore ihñari mũa. Sa yena tiquiurore masi tuhasare mũa, nidi Jesu usãre.

⁸Tiquiuro sa nigũ Felipe ohõ saha nidi:
—Pũhto, mari Pacũre ihñõña usãre. To punota ihña duaja usã, nidi tiquiuro.

⁹Tiquiro sa nigū Jesu yahuri:

—¿Felipe, yoari pje yuhū mehna ijiepeguta, mūhū masiedajari yuhūre? Yuhūre ihñariquiro yuhū Pacu gūhūre ihña tuhasari. ¿Sa yegu “Mari Pacure ihñoña usāre”, nigū dūhsegu sa nijari mūhū yuhūre? ¹⁰Yuhū, yuhū Pacu mehna pūana ijiepenata ihcūta ijiaja. ¿Tire “Poto ijierare”, niimeje nijari mūhū? Mūsare yahugu yuhū esa tuharo yahugu niedaja. Yuhū Pacure yahu basagu niaja. Sa yero tiquiro yuhū mehna ijiriquiro tiquiro tutuaye mehna ye ihñore. ¹¹Yuhū, yuhū Pacu mehna pūana ijiepenata ihcūta ijiaja. Tire “Ijirota ijire”, ni wacūña mūsa. Tire “Ijirota ijire”, niedana, Cohācjū tutuaye mehna yuhū ye ihñore wacūna, yuhū Pacu mehna yuhū ihcūta ijiyere “Ijirota ijire”, ni wacūña mūsa. ¹²Ijirota mūsare niaja. Yuhūre wacū tutuariquiro yuhū yeriro sahata yerota. Sa yero tiquiro pehe yuhū yuhūro yerota. Yuhū Pacu cahapu tojoa wahau tūn niaja yojopare. Sa yero yuhūre wacū tutuariquiro yuhū yuhūro Cohācjū tutuaye mehna ye ihñonota. ¹³Sa yegu yuhūre wacū tutuayequina tiquina sinino punota yeitja. Sa yegu yuhū Pacu tiquiro tutuariquiro ijiyere ihñoutja. ¹⁴Yuhūre wacū tutuana mūsa ijigū mūsa sinino punota yeitja, nidi Jesu.

—Espíritu Santore mūsare ohoutja, ni yahuahye Jesu

¹⁵Sa ni tuhasa ohō saha ni nemori:

—Yuhūre mūsa cahīna, yuhū dutiyere quehnoano ye pehonata. ¹⁶Yuhū Pacure siniitja. Yuhū sa sinigū yuhū Pacu pehe apeqirore mūsare yedohoatiquirore mūsare ohorota. Sa yero tiquiro mūsare yedohoatiquiro pehe ijipihitiye decori mūsa mehna ijirota. ¹⁷Tiquiro poto yahuriquiro Espiritu Santota ijire. Ahri yehpa cjēna pehe Espiritu Santore masiedare. Sa ye tiquirore cūo masiedare. Tiquirota mūsa mehna ijirota. Sa yena mūsa pehe tiquirore cūonata. Sa yena tiquirore masine mūsa. ¹⁸Mūsare cohāsi yuhū. Mūsa mehna ijigu tagu, tojoa tautja yuhū. ¹⁹Sa ijiepegūta mehenogā dūhsare yuhū wahato. Yuhū wahari bato ahri yehpa cjēna yuhūre wacū tutuayequina yuhūre pari turi ihñasi. Mūsa pehe yuhūre ihñanata. Yuhū catigu ijigū mūsa gūhū ijipihitiye decori Cohācjū mehna catinata. ²⁰Ti deco yuhū tojoa tati deco yuhū Pacu mehna ihcūta usā ijigū masinata mūsa. Sa yegu yuhū mehna cjāna mūsa ijigū mūsa mehna cjū yuhū ijigū gūhūre masinata mūsa. ²¹Yuhū dutiyere yeriquiro yuhūre cahīniquirota ijire. Sa yero yuhūre cahīniquirore yuhū Pacu pehe cahīnota. Sa yegu yuhū gūhū tiquirore cahītja. Sa ye yuhūre quehnoano masigū yeitja tiquirore, nidi Jesu usāre tiquiro buhenare.

²²Usā mehna cjūno apeqiro Juda wame tiriquire ijiri. Juda Iscariote Jesure ihña tuhtiyequinare ihñoatiquiro ijierari tiquiro. Apeqiro Juda ijiri. Sa yero tiquiro Jesure sinituri:

—¿Pūhto, dūhse yeitjari mūhū usāre sa nigū? ¿Ahri yehpa cjēnare mūhūre masigū yeragu, yabere yeitari mūhū usā dihitare mūhūre masigū yegu? ni sinituri Juda.

²³Tiquiro sa nigũ tũhoro Jesu tiquirore yahuri:

—Yũhũre cahĩnequina, yũhũ dutiyere quehnoano yeye nine. Tiquina sa yegũ yũhũ Pacũ pehe tiquinare cahĩnota. Sa yena tiquina mehna ijina ahtanatja usã. ²⁴Yũhũre cahĩeniquiro yũhũ dutiyere yerare. Sa ye yũhũ yahuye mũa tũhori pehe yee yahuye ijierare. Yũhũre ohoriquiro ye yahuye pehe ijire. Tiquiro yũhũ Pacũta ijire.

²⁵Mũasa mehna ijinigu ahrire mũsare yahugu niaja. ²⁶Came yũhũ sinigũ yũhũ Pacũ Espĩritu Santore ohorota mũsare. Sa yero Espĩritu Santo pehe mũsare yedohoatiquiro ijiro, mũsare buhe pehorota tiquiro. Sa yero mũsare yũhũ yahurire mũsare wacũgũ yerota tiquiro.

²⁷Mũsare quehnoano ijigũ yeitja yũhũ. Yũhũ quehnoano ijiriro sahata quehnoano ijigũ yeitja yũhũ mũsare. Ahri yehpa cjẽna tiquina ni mehoriro sahata yesi yũhũ mũsare. Yũhũ pũrita potota quehnoano ijigũ yeitja mũsare. Bũjũa witi pajiro wacũedacãhĩa mũa. Sa yena cueracãhĩa mũa. ²⁸“Yũhũ wahautja. Sa yegu mũasa mehna ijigu tagũ tojoa tautja”, mũsare yũhũ sa ni yahugũ tũho tuhasari mũa. Tire tũhona, bucueboaya mũa. Yũhũre mũasa poto cahĩna, bucueboaya mũa. Yũhũ Pacũ pehe yũhũ yũhdũoro tutuare. Sa yena tiquiro cahapũ yũhũ wahatore mũasa masidi bato yũhũre cahĩna, bucueboaya mũa. ²⁹Mũasa yũhũre wacũ tutuatire yũhũ wahatore yahuyugu niaja mũsare.

³⁰Ahri yehpa cjẽna pũhtoro watĩno pũhtoro ijiro taro nine yojopũre. Tiquiro sa ijiro tagũ yũhũ mũasa mehna yũhũ yahuducu bato tiati pje mehenogã dũhsare. Tiquiro pehe yũhũre yũhdũdũca masiedare. ³¹Sa yegu yũhũre yũhũ Pacũ tiquiro dutiriro sahata yeaja yũhũ. Sata yeaja yũhũ, yũhũ Pacũre yũhũ cahĩnene ahri yehpa cjẽna tiquina masiatire. Wahcãdũcaya. Isa wahana, nidi Jesu usãre tiquiro buhenare.

Jesu uɦse da yero saha ijiriquiro ijire

15 ¹Came queoye mehna buhero usãre ohõ saha nidi Jesu:

—Yũhũ potota uɦse da yero saha ijigu ijijaja. Yũhũ Pacũ pehe uɦse dare ihĩa ihboriquiro yero saha ijire. ²Yeequina uɦse da dũpũri yero saha ijijeyequina yũhũ mehna cjẽnata ijire. Uɦse da dũpũri dũca marieĩe dũpũrire ihĩa ihboriquiro tiquiro pehe cohãriro saha yũhũ Pacũ tiquiro cahmeĩene yerariquinare cohãre. Dũca tiye dũpũrire ihĩa ihboriquiro tiquiro quehnoriro saha yũhũ Pacũ tiquiro cahmeĩene yeyequinare yedohorota tiquiro, “Yũhũ cahmeĩene ye nemoahdo”, nino. ³Yeere tũhona, “Ijijirota ijire”, nidi mũasa. Sa yero yũhũ Pacũ mũasa ñaĩe yerire cohã tuhasari. ⁴Yũhũ mehna cjãna ijijya mũasa. Sa yegu mũasa mehna ijijitja. Uɦse da dũpũri uɦse da mehna wahĩaedaye dũpũri ijijye, ti dũpũri pehe dũca mariedare. Sata yũhũ mehna cjãna ijierana, yũhũ Pacũ cahmeĩene ye masiedare mũasa.

⁵Yũhũ uɦse da yero saha ijigu ijijaja. Mũasa pehe ti da dũpũri yero saha ijina ijire. Yũhũ mehna cjũno mehna yũhũ ijigũ dũca tiye dũpũri yero saha

tiquiro yũhũ Pacũ cahmeñene yere. Yũhũ mehna cjãna ijierana yũhũ Pacũ cahmeñene ye masiedare mũsa. ⁶Ñãñe dũpũrĩre tiquiro cohãboriro saha yũhũ mehna cjẽna ijieyequinare yũhũ Pacũ cohãnota. Ti dũpũri ñai dijiaa wahagũ uhsẽ dare ihña ihboriquiro ti dũpũrĩre ne cahmecoa pecarũ uĩũa cohãnota. Sata yerota Cohãcjũ yũhũ mehna cjẽna ijieyequinare.

⁷Yũhũ mehna cjãna ijina, yũhũ buheyere boeraboaga mũsa. Sa boerana, mũsa cahmeno punota siniña. Sa yegũ mũsa sinino punota ye basautja. ⁸Yũhũ Pacũ cahmeñene yena mũsa ijigũ ihñañe “Jesu yequina ijire ahriquina”, ni masieta masa. Sa ye mũsare ihñañe yũhũ Pacũre ño peoeta. ⁹Yũhũ Pacũ yũhũre tiquiro cahĩdiro sahata mũsare yũhũ gũhũ cahĩe tii. Yũhũ cahĩna ijiducuya mũsa. ¹⁰Yũhũ cahĩnequina ijiducuyequina yũhũ dutiyere yere. Yũhũ Pacũ ye dutiyere yeaja yũhũ. Sa yegũ tiquiro cahñogũ ijiducujaja yũhũ. Sata mũsa gũhũ yũhũ dutiyere yena yũhũ cahĩna ijiducunata mũsa.

¹¹Ahrire mũsare yahuu yũhũ mehna mũsa quehnoano bucueatire. Sa yena tutuaro bucuenata mũsa. ¹²Ohõ saha dutiaja mũsare: Mũsare yũhũ cahĩdiro sahata mũsa mehna cjẽna gũhũre cahĩña. ¹³Ihcãquiro masũno tiquiro mehna cjũno ye buhiri yariaro tiquiro mehna cjũnore tutuaro cahĩne, apequina tiquina cahĩdiro yũhdũoro. ¹⁴Sa yena yũhũ dutiyere yena yũhũ mehna cjãna ijire mũsa. ¹⁵Potota yũhũ mehna cjãna waro ijire mũsa. Mũsa sa ijigũ ijipilhtiyẽ yũhũ yerire yahujaja mũsare. Cahacjũno tiquiro pũhtoro yerire masiedare tiquiro. Sa yegũ “Yũhũ cahacjãna ihyo ijina ijire mũsa”, mũsare niedaja. Yũhũ Pacũ yũhũre tiquiro yahurire mũsare yahu pehou. Sa yahugũ “Yũhũ mehna cjãna ijire mũsa”, mũsare niaja yojopũre. ¹⁶Mũsa pehe yũhũre ne beserari. Yũhũ pehe mũsare besei yũhũ Pacũ cahmeñene mũsa yeatire. Mũsa sa yegũ mũsa yeye ne ihyo waro ijisi. Ahri deco yoaro punota sa ijiducuatĩ ijire mũsa yeye. Mũsa sa yegũ yũhũre mũsa wacũ tutuagũ yũhũ Pacũre mũsa sinino punota tiquiro mũsare ohorota. ¹⁷Ahrire mũsare dutiaja yũhũ: Mũsa mehna cjẽnare cahĩña mũsa, ni yahuri Jesu.

Jesure tiquiro yequina gũhũre ahri yehpa cjẽna ihña tuhtire

¹⁸Sa yero tiquiro yahu nemori:

—Ahri yehpa cjẽna mũsare tiquina ihña tuhtigũ ihñana ahrire wacũña mũsa: Mũsare tiquina ihña tuhtiatõ pano yũhũ pehere ihña tuhti mũhtari tiquina. ¹⁹Cohãcjũre cahmedana mũsa ijigũ, ahri yehpa cjẽna tiquina cahme cahĩdiro sahata mũsa gũhũre cahĩboaya tiquina. Ahri yehpa cjãna mũsa ijigũ mũsare besei. Sa yena yojopũre ahri yehpa cjãna waro ijierare mũsa. Mũsa sa ijieragũ ihñañe ahri yehpa cjẽna mũsare ihña tuhtire. ²⁰“Yeequina ijina mũsa yũhũ bui ijierare”, mũsare yũhũ nidire wacũña mũsa. Sa yena yũhũ docarũ ijina yũhũ ñano yũhdũriro sahata ñano yũhdũnata mũsa gũhũ. Yũhũre ñano yeriquinata mũsa gũhũre ñano yeeta. Yũhũ buhegũ yũhtiriquinata mũsa buhegũ gũhũre yũhtietã tiquina. ²¹Ahri yehpa cjẽna yũhũre ohoriquirore masiedare. Sa ye yũhũre wacũ tutuana mũsa ijigũ ihñañe tiquina ñano yeeta mũsare.

22'Tiquinare yũhũ buhegũ ahtaeragũ yũhũre tiquina cahmedari buhiri, buhiri mariedaboaya. Yojoþure tiquinare yũhũ buheri bato "Ñañe buhiri mariedare usãre", ni masiedare tiquina. 23Yũhũre ihña tuhtiriquiro yũhũ Pacu gũhũre ihña tuhtire. 24Cohãcjũ tiquiro tutuaye mehna apequina tiquina ne yerarire ye ihñou. Sa ye tiquinare tire yũhũ ye ihñoadagũ tiquinare ñañe buhiri mariedaboaya. Cohãcjũ tutuaye mehna yũhũ ye ihñorire tiquina ihñari bato yũhũre yũhũ Pacu gũhũre ihña tuhtire tiquina. 25Sa ihña tuhtiyeh Cohãcjũ yere tiquina ojoari pũpũ duitarũta tiquiro ni ojoariro sahata yeye nidi tiquina. Ohõ saha ni ojoahye: "Tiquinare yũhũ ñano yerapegũta yũhũre ihña tuhtire tiquina", ni ojoahye duitarũta Cohãcjũ yere tiquina ojoari pũpũ.

26'Yũhũ batorũ musare yedohoatiquiro, yũhũ Pacu mehna ijiriquiro musare yũhũ ohoatiquiro Espĩritu Santota ijire. Tiquiro potota yahuriquiro ijire. Sa yero tiquiro ahtarõ, yũhũ ijire tiyere yahurota musare. 27Masare yũhũ buhe dũcagũpũta musa gũhũ decoripe yũhũ mehna ijiducuri. Sa yena musa gũhũ yũhũ ijire tiyere yahunata apequinare, ni yahuri Jesu.

16 ¹Sa ni tuhasa usãre ohõ saha ni yahu nemori: —Came yũhũ buheyere yũhũ gũhũre musa cohãedatire ahrire ijipihtiyere yahuu musare. ²Judio masa mari buheye wũhũsepu musa sajã duagũ musare sajã dutisi yeequina musa ijiri buhiri. Sa ye ape taharu musare wejẽ, "Cohãcjũ cahmeñene yena niaja", ni tuhuetamaga apequina. ³Sa ye yũhũ Pacure, yũhũ gũhũre tiquina masiedare. Sa masiedaye musare ñano yeeta tiquina. ⁴Sa yena musare ñano tiquina yegũ ihñana "Tiquina ohõ saha yeato panota Jesu yahu tuhasari usãre", ni wacũnata musa. Musa sa ni wacũatire yojoþure ahrire yahu muhtagũ niaja musare, ni yahuri Jesu.

Espĩritu Santo tiquiro yeatire yahuahye Jesu

Sa ni tuhasa ohõ saha ni yahu nemori:

—Coã waropũre musa mehna ijigũ ahrire musare yahuerũ. ⁵Yojoþu pehere yũhũre ohoriquiro caharu wahautja. "¿Nohopũ wahautjari muhũ?" yũhũre ni, ihcãquiro borota ne sinituerari musa. ⁶Sa sinituerapenata yũhũ wahatire musare yũhũ yahu mujagũ musa ñano jeripohna tire. ⁷Musare ijirota yahugũta niaja. Yũhũ wahari bato musare quehnoanota. Yũhũ uhmũsepu wahaeragũ musare yedohoatiquiro pehe ahtaeraboaya. Wahagũ musare tiquirore oho dijioutja yũhũ. ⁸Yũhũ sa oho dijiogũ tiquiro ahtarota. Sa wihiro ahri yehpa cãena ñañe yeyequina tiquina ijiyere tiquinare masigũ yerota tiquiro. Sa yero quehnoano ijire tiye gũhũre buherota tiquiro masare. Sa yero Cohãcjũ masare tiquiro buhiri dahreato gũhũre yahurota masare yedohoatiquiro pehe. ⁹Yũhũre wacũ tutueyequina ijire ahri yehpa cãena. Sa yero yedohoatiquiro pehe masa ñañe yeyequina tiquina ijire tiyere tiquinare masigũ yerota. ¹⁰Yũhũ Pacu caharu wahautja. Yũhũ sa wahari bato masa yũhũre ihñasi. Sa yero quehnoano ijire tiye

gũhũre buherota yedohoatiqiro pehe. ¹¹Ahri yehpa cĵena puhtorore watĩnore Cohãcĵũ buhiri dahre duti tuhasari. Sa yero Cohãcĵũ masare tiqiro buhiri dahreati gũhũre yahurota yedohoatiqiro pehe.

¹²Pajiro ijire mũsare yũhũ yahuati. Yũhũ sa yahu nemo duepegũta tire yũhũ yahugũ yojopũ masinisi mũsa. Sa yena yojopũre quehnoano tũhosi mũsa. ¹³Yũhũ sa yahu nemoedagũ Espĩritu Santo pehe mũsare yahu nemono ahtarota. Tiquiro esa tuharo mũsare yahusi. Tiquirore yũhũ Pacũ yahu dutirire tiqiro yahurota mũsare. Sa yero mũsare potu yahu pehorota. Sa yero “Camerũ ohõ saha waharota”, ni yahurota tiqiro mũsare. ¹⁴Sa yero yeere mũsare tiqiro yahurota. Sa yahuro yũhũre ño peogũ yerota masare. ¹⁵Ijipihtiyi yũhũ Pacũ ye, yee gũhũ ijire. Sa yegũ “Espĩritu Santo pehe yeere yahurota mũsare”, nii mũsare, ni yahuri Jesu.

—Bũjua witina ijiepenata came bucuenata mũsa, ni yahuahye Jesu

¹⁶Sa ni tuhasa ohõ saha ni yahu nemori:

—Mehenogã bato mũsa yũhũre ihñasi. Sa yena mehenogã bato mũsa yũhũre ihñanata tja, nidi Jesu usãre tiqiro buhenare.

¹⁷Tiquiro sa nigũ tũhona, usã pehe meheñequinagã ohõ saha ni yahuducuu usã basi:

—¿“Mehenogã bato mũsa yũhũre ihñasi. Sa yena mehenogã bato mũsa yũhũre ihñanata tja”, nino dũhse nino sa niajari marine? ¿Sa yero “Yũhũ Pacũ cahapũ wahautja”, nino dũhse ijiro boro marine sa niagari tiqiro? ¹⁸¿“Mehenogã bato”, nino dũhse nino sa niajari ahriqiro? Tiquiro ni yahurire quehnoano masiedaja mari, ni yahuducuu usã basi.

¹⁹Usã sa ni yahuducugũ Jesu tiqirore usã sinitu duarire masino, usãre yahuri:

—¿“Mehenogã bato mũsa yũhũre ihñasi. Sa yena mehenogã bato yũhũre ihñanata tja”, yũhũ nidire sinitu duajari mũsa? ¿Tire yũhũ nidire masiedajari mũsa? ²⁰Ijirota mũsare nigũ niaja. Yũhũ yariagũ ihñana mũsa utinata. Sa yena tutuaro bũjua witinata. Sa ye yũhũre ño peoyequina pehe bucueta. Mũsa pehe bũjua witina ijiepenata, came bucuenata mũsa. ²¹Ohõ saha ijire ti: Numino niji wahcõno, ticoro ñano yũhũduato pano ijire. Sa yero ticoro tutuaro bũjua witiere. Sa bũjua witiereperota ticoro pohna tiri bato ticorore purĩdire wacũedare ticoro. Nijinogã ahri yehpapũ tiqiro masa bajuagũ ticoro bucuere. Sa yero ticorore purĩdire wacũedare. ²²Sata mũsa yojopũre bũjua witinata. Came mũsare ihñautja. Sa yena mũsa tutuaro bucuenata. Mũsa sa bucuẽgũ apequina mũsare bũjua witiẽgũ ye masisi.

²³Ti deco mũsa yũhũre ihñari deco yũhũre sinitusi mũsa. Masi tuhasarinapũ ijinata. Ijirota mũsare nigũ niaja. Yũhũre mũsa wacũ tutuagũ ihñano yũhũ Pacũre mũsa siniñene tiqiro mũsare ohorota. ²⁴Ahri deco pano yũhũ tutuaye mehna Cohãcĵũre siniedarĩdi mũsa. Yũhũre wacũ tutuatjiãna Cohãcĵũre siniña. Mũsa sa sinigũ mũsa sinidire mũsare ohorota, mũsa quehnoano bucuẽatire, nidi Jesu usãre.

Nañequinare Jesu pehe yuhduducahye

²⁵Sa ni tuhasa ohō saha ni nemori:

—Queoye mehna musare yahue tii. Sa yahuepeguta came musare queoye mehna yahusi yuhū. Sa yahueragu yuhū Pacu pehere quehnoano poto yahutja musare. ²⁶Ti decore musare yuhū Pacure sini basasi yuhū. Yuhure wacū tutuana, mūsa basi tiqirore sininata. ²⁷Mūsa yuhure cahīne. Sa yena yuhū Pacu cahapū yuhū ahtarigu ijigū “Ijirota ijire”, nine mūsa. Sa nina mūsa ijigū ihñano yuhure cahīna mūsa ijigū ihñano yuhū Pacu pehe musare cahīne. Tiquiro sa cahīgū tiqirore mūsa sininata. ²⁸Yuhū Pacu cahapū ijirigu ahri yehpapure ahtau yuhū. Sa yegu yojopure ahri yehpapū ijirigu yuhū Pacu cahapū wahautja, nidi Jesu.

²⁹Tiquiro sa nigū usā tiqiro buhena ohō saha nii:

—Yojopū pūrta queoye marieno yahuducugū quehnoano bajuro yahugū nine mūhū usāre. ³⁰Mūhū quehnoano masi pehogū mūhū ijigū yojopū pūrta usā masiaja. Sa ye apequina mūhure buhe masiedare. Tire yojopure usā quehnoano masiaja. Usā quehnoano masina, Cohācjū cahapū ahtarigu mūhū ijigū “Ijirota ijire”, niaja usā, nii usā Jesure.

³¹Usā sa nigū Jesu yuhtiri usāre:

—¿Yojopure “Ijirota ijire”, niajari mūsa? ³²Came cjūno ijipihtina mūsa wuhusepū waha sitena, yuhure cohānata mūsa. Mūsa sa cohāpegūta yuhū Pacu pehe yuhū mehna ijire. Sa yegu yuhū ihcūta ijieraja.

³³Ahrire musare yahu mūhtaū, yuhure mūsa wacū tutuaye mehna mūsa quehnoano ijiatore. Cohācjūre cahmeeñequina cahapū mūsa ijigū ñano yeeta musare tiquina. Tiquina sa yepegūta bucueya mūsa. Ahri yehpa cjēna tiquina ñañe yerire yuhduducagū ijiaja yuhū. Sa yena yuhure wacū tutuana bucueya mūsa, nidi Jesu usāre tiqiro buhenare.

Jesu tiqiro buheyequinare Cohācjūre sini basahye

17 ¹Sa ni yahu tuhasa Jesu uhmuanopū ihña mūo, Cohācjūre ohō saha ni yahuducuri:

—Mai, yojopure mūhū yahu queoriro sahata yuhure ñano tiquina yeati pje esarota nine. Yuhure mūhū macure masare ño peogū yeya. Mūhū sa yegū mūhure masare ño peogū yeitja yuhū gūhū. ²Ijipihtiequina puhto yuhure cūri mūhū. Sa yegu yuhure mūhū ohoriquinare mūhū mehna sa ijiducugū yeitja yuhū. Sa yegu mūhure masare ño peogū yeitja yuhū. ³Mūhū dihita Cohācjū waro ijire. Yuhū Jesucristo mūhū ohorigū ijiaja. Sa ye ijipihtiequina mūhure masiñequina, yuhū gūhure masiñequina uhmusepū mari mehna sa ijiducuetā, nidi Jesu.

⁴Sa ninota ohō saha ni nemori mari Pacure:

—Ahri yehpapure mūhū ye dutirire ye peho tuhasaū yuhū. Sa yegu mūhure masare ño peogū yei yuhū. ⁵Ahri yehpa ijiato pano mūhū mehna yuhū ijigū ijipihtiequina yuhure tiquina ño peo mūhtariro sahata yojopure yuhure tiquina ño peogū yeya tja.

⁶Ahri yehparu ijyequinare yuhure muhu ohoriquinare muhure masigū yei. Muhu ohoriquina muhu yequina ijire. Sa yegu tiquinare ohori muhu yuhure. Sa ye muhu dutiyere yeri tiquina. ⁷⁻⁸Yuhure muhu yahurire tiquinare buhei. Yuhu sa buhegū tuhoye yuhu buheyere cahmedi tiquina. Sa ye potota muhu caharu ahtarigu yuhu ijigū masine tiquina. Sa ye muhu ohorigu yuhu ijigū “Ijirota ijire”, ni tuhature tiquina. Sa ye ijiphtiye yee muhu ye ti ijigū masine tiquina.

⁹Tiquinare muhure sini basagu niaja. Apequina pehere sini basagu niedaja yuhu. Yuhure muhu ohoriquina muhu yequina ijire. Sa yegu tiquinare sini basagu niaja muhure. ¹⁰Tiquina ijiphtiyequina muhu yequina ijire. Sa ye muhu yequina pehe yeequina ijire. Yuhure wacū tutuaye yuhu tutuagu ijyere masigū yere tiquina masare.

¹¹Yojopure ahri yehparure tojoasi yuhu. Muhu caharu wahuu tuu niaja. Yuhu sa wahaepēgūta yojopure yuhure muhu ohoriquina ahri yehpare tojoare. Mai, muhu quehnoagu ijire. Yuhure muhu ohoriquinare muhu tutuaye mehna ihña ihbo basaya. Muhu sa ihña ihbogū mari ihcūta mari ijiro saha tiquina gūhu ihcā curuata ijiahro. ¹²Tiquina mehna ijigu muhu tutuaye mehna tiquinare quehnoano ihña ihbou. Ihcāquiro pūrta pecaru waharota muhu yere tiquina ojoari pūpu yahuriro sahata.

¹³Yojopure muhu caharu wahuu tuu niaja. Sa yegu ahri yehparu ahri ijiphtiyere yeequinare yahuaja yuhu mehna tiquina quehnoano bucueatire. ¹⁴Muhu yere yahuu tiquinare. Tiquina gūhu yuhu yero sahata ahri yehparu iji dojoatiquina ijierare. Sa ye ahri yehpa cĵēna pehe tiquinare ihña tuhtire. ¹⁵“Ahri yehparu ijyequinare, yeequinare neahña”, niedaja. Yuhu sa niedapēgūta tiquinare quehnoano ihña ihboya. “Watino ñañene tiquinare ye dutiari”, nigu, quehnoano ihña ihboya tiquinare. ¹⁶Ahri yehpa cĵū ijieraja. Tiquina gūhu yuhu yero sahata ahri yehparu iji dojoatiquina ijierare. ¹⁷Yeequinare muhu buheye mehna quehnoañequina yeya tiquinare. Muhu yahuye pehe ijirota ijire. ¹⁸Ahri yehparure yuhure muhu ohoriro sahata yuhu pehe yeequina gūhure muhu yere buhe dutigu ohou. ¹⁹Muhu cahmeñene yegu tagu yariacju ijigu yuhu pagure ohoaja. Sa yeaja yuhu, yeequina gūhu muhu cahmeñene poto tiquina quehnoano yeatire.

²⁰⁻²¹ “Yeequina yojopure ijyequina dihitarē yedohoya”, ni sini basaeraja yuhu. Yeequina apequina gūhure yeere tiquina buheri bato tiquina gūhu yuhure wacū tutuata. Tiquina gūhure yedohoya, yeequina ijiphtiyequina ihcā curua tiquina ijiro quehnoano. Yuhu muhu mehna mari puana ijiepenata ihcūta ijiaja. Ihcūta mari ijiro sahata tiquina gūhu mari mehna ihcā curuata ijiahro. Ihcā curuata ijiahro, muhu ohorigu yuhu ijyere ijiphtiyequina masa “Ijirota ijire”, tiquina niatire. ²²Yuhure muhu tutuaye ohorire yeequinare ohou. Ti tutuayere cūoye, ihcūta mari ijiro sahata tiquina gūhu ihcā curuata ijietā. ²³Yuhu tiquina mehna ijiaja. Sa yegu muhu yuhu mehna ijire. Mari sa ijigū yeequina potota ihcā curuata quehnoano ijietā. Ihcā curuata tiquina ijigū ihñañe muhu ohorigu yuhu

ijiyere ahri yehpa cjëna masieta. Sa ye yuhure mûhu cahîdiro sahata yeequina gûhure mûhu cahîñene masieta masa.

24'Mai, ahri yehpa iji ducato pano yuhure cahîe tiri mûhu. Sa cahîgu yuhû tutuagu ijiyere ihñori mûhu. Sa yegu yuhure mûhu ohoriquinare yuhû mehna tiquina ijigû cahmeaja, yuhû tutuagu ijiyere tiquina masiatire. 25'Mai, mûhu quehnoagu ijire. Ahri yehpa cjëna ñañequina mûhure masiedare. Yuhû pehe mûhure masiaja. Sa ye mûhu ohorigu yuhû ijigû masine yeequina. 26 Tiquinare mûhure masigû yei. Came gûhure mûhure tiquinare masigû yeitja, yuhure mûhu cahîdiro sahata apequinare tiquina cahîatire. Sa yegu yeequina mehna ijigutja, nidi Jesu mari Pacure.

Jesure peresu yeahye

(Mt 26.47-56; Mr 14.43-50; Lc 22.47-53)

18 1Tiquiro sa nidi bato Jesu, usã gûhu tiquiro buhena Cedrô wame tiri mare pehã, olivo wame tiye cju wesepu esau. 2Peye tahari ti wesepu Jesu mehna cahmecoae tii. Sa yero Juda Jesure ihña tuhtiyequinare ihñoatiquiro ti wesere masidi. 3Sa masino pua curua surarare uhmû tã câhtari ti wesepu Jesure ihñono taro. Ihcã curua surara waro ijiri. Ape curua surara Cohãcjû wuhure cohteyequina ijiri. Tiquina pahia puhto, fariseo masa tiquina ohoriquina ijiri surara, Cohãcjû wuhure cohteyequina mehna. Sa ahtaye sihãne pacare, sihãne cju gûhure sihã câhtari. Tiquina wamoa gûhure ne câhtari tiquina. 4Ti wesepu tiquina wihiri bato Jesu tiquiro ñano yuhdutire masino, tiquinare piti ca, sinituri:

—¿Noare macana niajari mûsa? nidi Jesu.

5—Jesu Nazare cjûnore macaja usã, ni yuhtiri tiquina.

—Tiquiro tjiaja yuhû, nidi Jesu.

Juda pehe Jesure ñehe dutiro ihñoriquiro tiquina mehna ijiri. 6Sa ye “Tiquiro tjiaja yuhû”, Jesu nigûta tiquina pehe tuho maria waha, du siti maa, yehparu bora quehe sari. 7Tiquina sa wahagû ihñano pari turi sinituri tiquinare Jesu:

—¿Noare macana niajari mûsa? nidi.

—Jesu Nazare cjûnore macana niaja usã, ni yuhtiri tiquina tja.

8—“Yuhû tjiaja”, ni tuhasamigu yuhû mûsare. Sa yena yuhure ñehena ahriquinare yuhû mehna cjênare peresu yeracãhña mûsa, nidi Jesu.

9Sa usãre cahîno ne ihcãquirore butigû yerari. Sa yero to pano Cohãcjûre tiquiro nidiro sahata yero nidi tiquiro. “Yuhure mûhu ohoriquinare ne ihcãquiro boeru”, tiquiro nidiro sahata yero nidi Jesu. 10Sa ye Simo Pedro ñoseni pjine cuoro, ti pjine tuã we nedoqueo, pahia puhtoro cahacjûno Malco wame tiriquireo cahmonore dute pahrê cãri. Poto pehe cjã cahmonore dute pahrê cãri. 11Tiquiro sa dute pahrêgû ihñano Jesu tiquirore ohõ saha nidi:

—Mûhu ñoseni pjine ihboya. Yuhû Pacu yuhure tiquiro ñano yuhdu dutiriro sahata ñano yuhdutja yuhû, nidi Jesu Pedore.

Pahia puhtoro cahapü Jesure neahye tiquina

(Mt 26.57-58; Mr 14.53-54; Lc 22.54)

¹²Tiquiro sa ni tuhasagüta surara, tiquina puhtoro mehna, Cohäcjö wuhure cohteyequina surara gühu Jesure ñehe, tiquirore dchteri. ¹³Duhte tuhasa Anás cahapü nea muhtari tiquina. Anás pehe Caifa mareino ijiri. Caifa pehe ti cuhmare pahia puhtoro ijiri. ¹⁴“Judio masa ye ijiatire ihcäquiro masuno yariagü quehnoanota”, nidiquiro boro ijiri Caifa pehe.

—Jesure masiedaja, niahye Pedro

(Mt 26.69-70; Mr 14.66-68; Lc 22.55-57)

¹⁵Sa yena yuhu Simo Pedro mehna Jesure yoa cjunopu ihña nunu täu. Caifa ya wuhupu neañe nidi Jesure. Yuhu pehe pahia puhtoro tiquiro ihña masinohgu ijigu Jesu bato puhtoro ya wuhu ijiri sahrinopu sajä wahaü. ¹⁶Yuhu sa sajägü Pedro pehe sahrino sopecahapü tojoaduca sari. Sa yegu majare wijia ta, sopecahare cohtericorore sinituu. Yuhu sa sinitu tuhasagü ticoro Pedrore sajä ta dutiri. Ticoro sajä ta dutiri bato yuhu Pedrore ne sajäa wahaü. ¹⁷Yuhu sa ne sajägü ihñano sopecahare cohtericoro pehe Pedrore sinituri:

—¿Jesu buheyequina mehna cjü ijierajari muhu? nidi ticoro Pedrore.

—Ijieraja yuhu, ni yuhtiri Pedro pehe.

¹⁸Usä esato pano to cjëna puhtoä cahacjëna, surara mehna tiquina sohmati pecare wijia tuhasari jiri. Yusuaridi. Sa ye tiquina ti peca duhtu caha ducuye, sohmañe nidi. Tiquina sa sohmagü ihñano Pedro gühu ahta, sohmani.

Pahia puhtoro Jesure sinituahye

(Mt 26.59-66; Mr 14.55-64; Lc 22.66-71)

¹⁹Sa ye pahia puhtoro Jesu buherire, usä tiquiro buhena gühure sinituahye Jesure. ²⁰Tiquiro sa sinitugü Jesu pehe yuhtiahye tiquirore:

—Ijipihtiyequinare buhegu tiquina ihñono ducuu. Sa buhegu judio masa mari buheye wuhusepu Cohäcjö wuhupu gühure sa buheducuu yuhu. Duhtitjägü buheru yuhu. ²¹¿Duhsegu yuhure sinitujari muhu? Sinitu duagu yuhu buheyequinare sinituya. Yuhu buherire tiquina masine, ni yuhtiahye Jesu.

²²Tiquiro sa nigü tuhoru topu ducuriquiro surara pehe tiquiro omoca mehna Jesure quëahye.

—Sa niedacähña pahia puhtorore, niahye surara pehe Jesure.

²³Tiquiro sa nigüta Jesu ohö saha niahye:

—Ñano yuhu ni yahuducurire yahuya yuhure. ¿Poto masare yuhu yahuepegüta, duhsegu tagu yuhure quëajari muhu? niahye Jesu surarare.

²⁴Came Anás Jesure tiquina dchteriquirore Caifa pahia puhtoro cahapü ohoahye.

—**Jesure masiedaja, pari turi niahye Pedro**
(Mt 26.71-75; Mr 14.69-72; Lc 22.58-62)

²⁵Sa ye Simo Pedro peca dũhtũ cahapũ ducuro, sohmano nidi. Tiquiro sa sohmaducugũ ihñañe to cjẽna tiquirore sinituri:

—¿Mũhũ gãhũ Jesu buheyequina mehna cjũ mũhũ ijierajari? nidi tiquina Pedrore.

—Ijieraja yũhũ, ni yũhtiri Pedro.

²⁶Sa yero pahia pũhtoro cahacjẽna mehna cjũno Pedro tiquiro cahmono dũte pahrẽdiquiro acayũro pehe Pedrore sinituri:

—¿Jesure tiquina ñehedi wesepũ yũhũ ijigũ mũhũ gãhũ tiquiro mehna ijieracoahte? ni sinituri tiquiro Pedrore.

²⁷—Yũhũ tiquiro mehna ijierũ, nidi Pedro.

Tiquiro sa nigũta canaca yahuri.

Jesure Pilato sinituahye

(Mt 27.1-2, 11-14; Mr 15.1-5; Lc 23.1-5)

²⁸Ñami cjũno ijigũ Caifa ya wũhũpũ ijiriquina Jesure ne wija, Roma cjẽna pũhtoro Pilato ya wũhũpũ nea wahari tiquina. Sa wahaepeta tiquiro ya wũhũpũ sajãedari. Pascua deco ijigũ tiquina ihyatiquina ijiye, ohõ saha nidi: “Judio masũno ijierare Pilato. Tiquiro sa ijiriquiro ijigũ tiquiro ya wũhũre sajãna, mari dutiyere yũhdũducana niboaga. Sa yena mari sajãgũ marine bose deco cjẽ ihyayere ihya dutieraboaga”, nidi. Sa niñe pũhtoro Pilato ya wũhũre sajãedari Jesure neariquina pehe. ²⁹Tiquina sa sajãedagũ ihñano Pilato tiquina cahapũ wũhũ sopecahapũ esadũcaro, tiquinare sinituri:

—¿Yabe buhirire ahriquiore yahusã duajari mũsa? nidi Pilato tiquinare.

³⁰—Ahriquiore quehnoariquiore ijigũ mũhũre usã ohoeraboaya. Ñariquiore ijire tiquiro, ni yũhtiri tiquina.

³¹Tiquina sa nigũ Pilato ohõ saha nidi:

—Mũsa basita tiquirore neaña. Sa yena mũsa ye dutiye ti nidiro sahata tiquirore buhiri dahreya, nidi Pilato tiquinare.

—Mũsa ye dutiye pehe usãre masũnore wejẽ dutierare, nidi tiquina Pilatore. Sa niñe Jesure wejẽ dutiye tee nidi.

³²Tiquina sa wejẽ dutigũ Jesu pehe curusapũ tiquiro yariatire to pano tiquiro yahuriro sahata wahari. ³³Tiquina sa nidi bato, Pilato pehe wũhũpũ majare sajã, Jesure pijioahye. Pijio tuhasa, tiquirore sinituahye:

—¿Judio masa tiquina pũhto tjajari mũhũ? ni sinituahye Pilato.

³⁴—¿Mũhũ esa tuharota sa ni sinituajari mũhũ yũhũre? ¿O apequina pehe yũhũre tiquina yahusãri bato tire sinituajari mũhũ? niahye Jesu Pilatore.

³⁵—Judio masũ ijieraja yũhũ. Mũhũ ya yehpa cjẽna, pahia pũhtoa gãhũ mũhũre ohori usãre. ¿Yabere ñano yeari mũhũ tiquina sa buhiri dahre duagũ? niahye Pilato.

³⁶—Ahri yehpa cjũ pũhto ijieraja yũhũ. Ahri yehpa cjũ pũhto yũhũ ijigũ, yũhũ buheyequina yũhũre yedohoboaya. Judio masare ñehe dutieraboaya. Yũhũ pũhto ijije ahri yehpa cjẽ ijierare, niahye Jesu Pilatore.

³⁷—¿Sa yegũ pũhto ijijari mũhũ sa nigũ? niahye Pilato.

—Mũhũ nino sahata pũhto ijijaja. Masa tiquina pũhto ijigũ tagũ masa bajũũ yũhũ. Sa yegũ ahri yehpapũ ahtaũ tiquina pũhto ijii tũhũ, potõ ijiyere yahugũ tũhũ. Ijipihtiyequina potõ ijiyere tũho duayequina, yũhũ yahuyere tũhore, niahye Jesu.

³⁸—¿Yabe boro ijijari potõ ijije? niahye Pilato.

Judio masa Jesure wejẽ dutiahye

(Mt 27.15-31; Mr 15.6-20; Lc 23.13-25)

Sa ni tuhasa Pilato judio masa caha majare tojoa tiquinare yahuri:

—Ahriquiõ Jesure ne buhiri mariedare. ³⁹Cũhmaripe pascua ijigũ ihcãquiõ pesu ijiriquiõre mũsa wio dutiducure. ¿Sa yegũ ahriquiõ Jesureta mũsa pũhtõro ijatiquiõre mũsare wio basagari yũhũ? nidi Pilato judio masare.

⁴⁰Tiquiõ sa nigũ tũhoye judio masa ohõ saha ni saũducure:

—Tiquiõre wioeracãhã. Barrabá pehere usãre wio basaya, ni saũducure judio masa Pilatore.

Barrabá pehe yaque bucũro ijiri.

19 ¹Tiquina sa ni saũducure bato Pilato Jesure tana dutiahye. Sa ye tiquiõrequina surara pehe tiquiõre tanahye. ²Tana tuhasa tiquina pota behto ye tuhasa, Jesu dapu buipũ duhu peohye. Duhu peo tuhasa, pũhtõa ye suhti borore tiquiõre sãa tuhasa, tiquiõ cahapũ esa dũca, ohõ saha ni bujũpeahye tiquina:

³—Quehnoano ahtaya. Judio masa pũhto, quehnoano ahtaya, ni bujũpe, Jesu wũhdoare quẽ mũjahye.

⁴Sa yero Pilato pari turi judio masa cahapũ waha, tiquinare yahuri:

—Tũhoya mũsa. Ahriquiõ ne buhiri mariediquiõ ijire. Sa yegũ tire mũsa masiatire mũsa cahapũ tiquiõre ne cãhtaũ, nidi Pilato.

⁵Tiquiõ sa ni tuhasagũ Jesu pota behto pesariquiõ, pũhtõa ye suhti borore sañariquiõ wũhũpũ ijiriquiõre wijia tari. Tiquiõ sa wijia tagũ Pilato tiquinare ohõ saha nidi:

—Ihãña. Ahriquiõ ijire tiquiõ, nidi Pilato.

⁶Tiquiõ sa ni tuhasagũ tũhoye, pahia pũhtõa, surara gũhũ Jesure ihãña, saũducure:

—Curusapũ quẽ biha wejẽña tiquiõre. Curusapũ quẽ biha wejẽña tiquiõre, ni saũducure tiquina.

—Tiquiõ ne buhiri mariedare. Sa yena mũsa basita tiquiõre neahã. Sa yena mũsata tiquiõre curusapũ quẽ biha wejẽña, nidi Pilato tiquinare.

⁷—Tiquiõ basi “Cohãcjũ macũ ijijaja”, nie tiri. Tire tiquiõ sa nigũ usã dutiye pehe tiquiõre wejẽ dutire, nidi tiquina Pilatore.



(San Juan 19.3)

⁸Tiquina sa nigū tūhoro cue yūhdūa wahari Pilato pehe. ⁹Sa yero pari turi wūhūpūre majare sajā, Jesure sinituahye tja:

—¿Noho cjū ijiajari mūhū? ni sinituahye tiquiro Jesure.

Tiquiro sa ni sinituepegūta Jesu tiquirore yūhtierahye.

¹⁰Tiquiro sa yūhtieragū ihñano Pilato tiquirore sinitu nemoahye:

—¿Yūhūre yūhtierajari mūhū? Yūhū mūhūre peresupū ijirigūre wio masiaja. Sa yegū mūhūre curusapū gūhūre quē biha wejē duti masiaja yūhū. ¿Tire masiedajari mūhū? niahye Pilato Jesure.

¹¹—Cohācjū mūhūre tiquiro dutieragū yūhūre ñano ye dutieraboaya mūhū. Yūhūre ihña tuhtiequinare ihñoriquiro pehe mūhū yūhdūoro ñano buhiri tire, niahye Jesu Pilatore.

¹²Tiquiro sa nigū tūhoro Pilato pehe tiquirore wio duamahye. Tiquiro sa wio duepegūta pari turi judio masa sañuducuri:

—Jesu “Pūhto ijiaja”, nino mari ijipihtina pūhtorore Roma cjūnore ihña tuhtiriquiro ijire tiquiro. Sa yegū tiquirore wioḡū mūhū gūhū mari pūhtorore ihña tuhtigū ijiaja mūhū, ni sañuducuri judio masa Pilatore.

¹³Tiquina sa nigū tūhoro Jesure wūhūpū ijiriquirore ne wijia ta, buhiri dahre dutiro taro tiquiro dujiri pahtapū nuju sari Pilato. Tiquiro buhiri dahre dutiri paa utā mehna tiquina yeri paa judio masa ye mehna Gabata wame tiri. ¹⁴Ti deco pascua bose deco usā ihyatire usā quehnori deco ijiri. Ti pjere coheri pje waro ijiri. Nuju sa tuhasa Pilato masare ohō saha ni yahuri:

—Ahriquiro tjire mūsa pūhtoro, nidi tiquiro.

¹⁵Tiquiro sa nigū tūhoye judio masa sañuducuri:

—Yariahro tiqairo. Yariahro tiqairo. Curusapɛ quẽ biha wejẽña tiqairore, ni sañuducuri tiqaina.

—¿Musa pɛhtoro tiqairo ijiepegũta tiqairore curusapɛ quẽ biha wejẽ dutiajari musa? nidi Pilato.

Tiqairo sa nigũ ohõ saha ni yɛhtiri pahia pɛhtoa:

—Mari ijipihtina pɛhtoro Roma cjũnota tiqairo usã pɛhtoro ijire. Apeqairo pɛhtoro usãre mariedare, ni yɛhtiri pahia pɛhtoa.

¹⁶Tiqaina sa ni yahuducuri bato Pilato Jesure curusapɛ quẽ biha wejẽ dutiro, tiqairore oho tiqinare.

Jesure quẽ biha wejẽahye tiqaina
(Mt 27.32-44; Mr 15.21-32; Lc 23.26-43)

Sa ye tiqaina Jesure ne wijjari. ¹⁷Tiqaina ne wijjagũ Jesu pehe tiqairo ya curusare tiqairo basi wɛa ne, dapu pehtoro wame tiropɛ esari. Usã judio masa ye mehna Gólgota wame tiri. ¹⁸Topɛ esaye tiqaina Jesure quẽ biha ohõri. Sa ye apequina pɛarore ihcãqairo tiqairo poto pehe, apeqairo tiqairo cũ pehe pehe quẽ



(San Juan 19.17)

biha ohōri tiquina. Sa yero Jesu tiquina deco curusapū wahñari. ¹⁹Tiquina quē biha tuhasagū Pilato taboa pñine ojoa duti, Jesure tiquina quē biha ohōri curusapū quē biha ohō dutiri jiri ti pñine. Ohō saha ni ojoa dutiri jiri tiquiro: “AHRIQUIRO JESU NAZARE CJĒNO, JUDIO MASA PŪHTORO IJIRE”, ni ojoa dutiri jiri Pilato ti pñine. ²⁰Ti pñine ojoaro judio masa ye mehna, Roma cjēna ye mehna, griego masa ye mehna ojoari jiri apequiro. Sa yero Jesure curusapū tiquina quē biha ohōriro maca cahagā ijiri. To cahagā ijyeyquina peyeyquina judio masa Pilato ojoa dutirire ihña, buheri. ²¹Sa buhe tuhasa judio masa usā pahia pūhtoahō saha nidi Pilatore:

—“Ahriquiro judio masa pūhtoro ijire”, ni ojoa dutieracāhña. Usā pūhtoro ijierare ahriquiro. Sa yegū ohō saha ni ojoa quehno dutiya mūhū. “Ahriquiro ‘Judio masa pūhto ijijaja’, ni ihcāquirota tiquiro basita sa ni tūhoturiquiro ijiri”, ni ojoa quehno dutiya, nidi pahia pūhtoahō.

²²—Yūhū ojoa duti mūhtararo sahata ijirota, nidi Pilato tiquinare.

²³Jesure tiquina quē bihari bato pititiaro surara pehe Jesu suhtire tiquina basi itiri. Tiquina sa iti duepegūta ihcā suhtiro yoari suhtiro dohori marieni suhtiro ijiri. Ti suhtiro suhari suhtiro ijiri. ²⁴Ti suhtiro sa ijigū ohō saha nidi tiquina basi:

—Ahri suhtirore tūhrēdacūhna. Ahri suhtirore neatiquirore masi duana, doquepeihna mari, nidi tiquina basi.

Sa doquepeye, Cohācjū yere tiquina ojoari pūpū tiquina ni ojoariro sahata yeye nidi tiquina. “Yūhū suhtire tiquina basi itiri. Sa ye yūhū suhtire neatiquinare masi duaye, doqueperi tiquina”, ni ojoahye Cohācjū yere tiquina ojoari pūpū. Tiquiro sa ni ojoariro sahata sa yeye nidi tiquina.


²⁵Surara tiquina sa yegū, Jesu pacoro, Jesu mūono, María Cleofa namono, María Magdalena mehna Jesu curusa cahagā ihñaducuri tiquina. ²⁶Sa yero tiquiro pacoro yūhū tiquiro cahñogū gūhū tiquiro cahapū usā ducugū ihñano tiquiro pacorore yahuri Jesu:

—Yojopūre ahriquiro mūhū macū ijire, nidi Jesu tiquiro pacorore.

²⁷Sa ni tuhasa, yūhūre ohō saha ni yahuri tiquiro:

—Yojopūre ahricoro mūhū paco ijire, nidi Jesu yūhūre.

Tiquiro sa nidi bato Jesu pacorore ya wūhūpū iji dutii.



(San Juan 19.26)

Jesu yaria wahahye

(Mt 27.45-56; Mr 15.33-41; Lc 23.44-49)

²⁸Tiquiro sa ni yahuri bato ohō saha ni tūhotu, masiahye Jesu: “Ijipihtiyē Cohācǵū yūhūre dahra dutiro tiquiro cūrire ye pehou”, ni tūhotu, masiahye Jesu. Sa masino Cohācǵū yere tiquina ojoari pūpū tiquiro ni yahuriro sahata ohō saha nidi Jesu:

—Aco wūoaga yūhū, nidi Jesu.

²⁹Sa yero topū vino sūēñe co pose tiri sutu dujiri. Sa yero topū ijiriquiro aco ihmini sūhtere sūēñe co mehna tiquina sohari sūhtere yucūgū hisopo wame tidū sohtoapū dūhte ohōri. Sa yero Jesu dūseropū siō ohōri. ³⁰Ti core Jesu ihmi tuhasa ohō saha nidi:

—To punota ijiaga, ninota tiquiro dapure muhri yo, yariaa wahari.

Surara Jesu pati pahma batogā ñoseahye ñosenū mehna

³¹Ti deco pascua bose deco pano ijiri. Bose deco cǵēne ūsā ihyatire quehñori deco ijiri. Sa ye ape deco saurú ijigū tiquina bose deco ijigū curusaripū yariariquinare cū duerari. Ti deco Cohācǵūre tiquina ño peori bose deco ijiri. Sa ye ti decopū tiquina quē biha ohōriquinare curusaripū tiquina wahñagū cahmedari tiquina. Sa ye tiquina quē biha ohōriquinare tiquina ñecū cohārīne quē nuha dutiye tehe, judio masa siniahye Pilatore, “Tiquina yaria madoqueoahro”, niñe. Tiquina sa yeri bato tiquina pagūrire ne dijio madoqueoeye tee nidi. ³²Tiquina sa dutigū surara pehe curusari cahapū esa, ihcāquiro yaqueriquiro ñecū cohārīne quē nuhari. Apequiro gūhūre sata yeri tiquina. ³³Sa ye Jesu ñecū cohārīne quē nuhae tee yemehe, tiquiro yariariquiro ijigū ihñañe, quē nuhaedari.

³⁴Sa quē nuhaedaye ihcāquiro surara tiquiro pati pahma batogā ñosenū mehna ñosedī. Tiquiro sa ñosegū duita tiquiro dii, aco mehna wijiari. ³⁵Ti sa wahagū ihñau yūhū. Yūhū ahri pūre ojoarigū mūsare poto yahuaja. Poto yūhū yahuye ijigū masiaja yūhū. Mūsare yahuaja mūsa gūhū Jesure mūsa wacū tutuato saha. ³⁶Cohācǵū yere tiquina ojoari pū ti ni diro sahata sa wahari: “Tiquiro cohārīne ne ihcā cohāre quē nuhaedari”, tiquiro ni ojoariro sahata Jesu ñecū cohārīne ne ihcā cohāre quē nuhaedari. ³⁷Sa yero ape pūpū Cohācǵū yere tiquina ojoari pūpū ohō saha nine. “Tiquirore tiquina ñosediquirore ihñāeta tiquina”, ni ojoahye Cohācǵū yere tiquina ojoari pūpū.

Jesu pagūre masa copepū cūahye

(Mt 27.57-61; Mr 15.42-47; Lc 23.50-56)

³⁸Tiquiro yariari bato José Arimatea cǵūno Jesu pagūre ne dijioro taro, Pilatore siniahye. José pehe apequina judio masare cuero, Jesure wacū tutuariquiro tiquiro ijiyere yahu duerahye. Sa yero tiquiro pagūre sinidi bato Pilato pehe Jesu pagūre nea dutiahye. Tiquiro nea dutigū José curusa cahapū esa, Jesu pagūre

nea wahahye. ³⁹Nicodemo gũhũ José mehna wahahye. Tiquiro yucũgũ cjê ehme sitiye, mirra wame tiye ehme sitiye yucũgũ cjê mehna dahra moredire ne cãhye. Jesu pagure tiquina cohãto pano tiquina quehnoati ijiahye ti ehme sitiye. Tiquiro ne cãhtari treinta kilo nũcũahye. Nicodemo sohõ ijiri pje Jesu mehna tiquiro coã yahuducuri pje ñamipũ Jesu cahapũ esariquiro ijiahye. ⁴⁰Sa ye tiquina pũaro Jesu pagure ne, judio masa yariariquinare usã cohãducuro sahata tiquiro pagure ehme sitiye mehna suhti mehna wahmeahye. ⁴¹Curusapũ Jesure tiquina wejẽdiro cahapũ wese ijiri. Ti wesepũ masa cope utãpũ wahma tiquina seheri cope ijiri. Ti copere ne ihcãquiro yariariquirore cohãedarĩdi. ⁴²Pascua bose deco judio masa bose deco usã ihyatire quehnoari deco ijiri. Sa ijiri deco ijigũ ti cope cahagã tiquiro curusa ijigũ, topũ cũahye tiquina Jesu pagure.

Jesu masa wijiahye

(Mt 28.1-10; Mr 16.1-8; Lc 24.1-12)

20 ¹Domingo ñami cjũnogã ijigũ, bohreato panogã María Magdalena Jesu masa copepũ esahye. Topũ esaro ti copere tiquina tu biharia utãre yoa cjũnopũ tiquina põo cũria utãre ihñahye ticoro. ²Sa ijigũ ihñano, usã cahapũ oma tojoa tari ticoro. Simo Pedro mehna yũhũ usã pũana ijii. Wihi ohõ saha ni yahuri usãre ticoro:

—Mari pũhtoro pagure ne cãri jiri. Nohopũ ne cã cũcoayaye mari masiedaja, nidi ticoro usãre.

³Ticoro sa nigũ tuhona, Pedro mehna masa copepũ ihñana wahaũ usã. ⁴Sa ihñana wahana usã pũana oma cãũ. Sa oma cãna, yũhũ Pedrore oma yũhũ cãgũ masa copepũ esa mũhtaũ. ⁵Topũ esagũ muhri ihña sũu ti copepũre. Muhri ihña sũgũ tiquirore tiquina wahmedi suhtiro dihitarẽ ihñaũ. Sa ye ti copere sajãedũ. ⁶Yũhũ sa ihñari batopũ Simo Pedro yũhũ batopũ wihiri. Wihi masa copepũ sajã, tiquiro pagure tiquina wahmedi suhtirore ihñari tiquiro. ⁷Sa yero Jesu dapure tiquina wahmedi cahsero gũhũre ihñari tja. Ti cahsero sijoro cuñano tiquiro torẽdi cahsero ijiri. ⁸Sa yegũ yũhũ gũhũ masa copepũ esa mũhtarigu ti copepũ sajã. Jesu sa mariedagũ ihñagu “Potota Jesu masa wijiahya”, ni tuhottuu yũhũ. ⁹Ti copepũ usã wahato pano Cohãcjũ yere tiquina ojoari pũpũ Cristo tiquiro yariatire yahurire, tiquiro masa wijiatire yahuri gũhũre usã quehnoano masiedarĩmi. Ti copere yũhũ ihñari bato, “Ijirota Jesu masa wijiahya”, ni, tuhottuu yũhũ. ¹⁰Sa ihña tuhasa usã ye wãhũsepũ tojoaa wahaũ.

Jesu María Magdalenare bajuahye

(Mr 16.9-11)

¹¹Sa ye masa copepũ María majare tojoa ta, ti cope sopecahapũ wihi, ducuro, utiro niahye. Sa utieperota ticoro muhri ihña sũahye masa copepũre. ¹²Sa ihña sũono pũaro angelere, yehseye suhti sañañequinare Jesu tiquiro cuñamediropũ tiquina dujigũ ihñahye ticoro. Ihcãquiro



(San Juan 19.40)

tiqairo dapu timediroꝑu dujiahye. Apeqiro tiqairo dahpocāri timediroꝑu dujiahye. ¹³Tiqinare ticoro ihñagũ tiquina pehe ticorore sinituahye:

—¿Numio, dahse yego utiajari mũhũ? niahye tiquina.

—Yũhũ puhtoro pagũre ne cāri jiri. Sa yego tiqairo pagũre tiquina cũrire masiedaga yũhũ, niahye ticoro.

¹⁴Sa ni tuhasa, majareducameno Jesure toꝑu ducuriquirore ihñahye ticoro. Sa ihñaeperota Jesure masiedahye ticoro.

15—¿Numio, dũhse yego utiajari mũhũ? ¿Noare macago niajari? niahye Jesu ticorore.

“Ahriquiroy ahri wesere cohteriquiro ijire”, ni tũhotumahye ticoro Jesure. Sa ni tũhoturo, ohõ saha niahye ticoro:

—Mũhũ tiquiro pagure nedigu ijigu mũhũ cũrirore yahuya yũhũre. Mũhũ yahuri bato tiquiro pagure negotja, niahye ticoro tiquirore.

16Ticoro sa nidi bato Jesu ohõ saha niahye:

—María, niahye.

Tiquiro sa ni pisugũ tũhoro majare ihũadoqueo ticoro hebreo ye mehna ohõ saha niahye:

—Rabuni, niahye ticoro Jesure. “Rabuni”, nino, “Buhegu”, nino niahye.

17—Yũhũ Pacũ caharũ mũjaedarĩaja yũhũ. Yũhũ sa mũjaedarĩgũ yũhũre ñehedacãhña. Sa yego apequina yeequina caharũ wahaya. Tiquina caharũ esago ohõ saha ni yahuya tiquinare: “ Yũhũ Pacũ caharũ wahau tũu niaja. Mũsa Pacũ gũhũ ijire tiquiro. Yaquiroy Cohãcjũ caharũ wahau tũu niaja. Mũsa yaquiroy Cohãcjũ gũhũ ijire tiquiro, nidi Jesu”, ni yahuya tiquinare, niahye Jesu Marĩare.

18Tiquiro sa nidi bato María Magdalena usã Jesu buhena caharũ wihi, yahuri usãre:

—Mari pũhtoro ihũau yũhũ, ni, Jesu tiquiro yahu dutirire yahuri usãre ticoro.

Jesu tiquiro buheyequinare bajuahye
(Mt 28.16-20; Mr 16.14-18; Lc 24.36-49)

19Ti deco domingo ñamicaharũ usã Jesu buhena usã acaye judio masare cuena, wũhũpũ biha sajã, dujii usã. Sa usã dujigũ Jesu usã watoapũ bajuadũca saro ohõ saha nidi:

—¿Ne, ijiajari mũsa? Quehnoano ijia mũsa, nidi.

20Sa ni tuhasa, tiquiro omocarine, tiquiro pati pahma bato gũhũre usãre ihũori. Sa yena usã tiquirore usã pũhtoro ihũana bucuei. 21Pari turi Jesu usãre ohõ saha nidi:

—Quehnoano ijia mũsa. Yũhũ Pacũ yũhũre tiquiro ohoriro sahata, mũsa gũhũre yee buheye buheanare ohoaja, nidi Jesu usãre.

22Sa ni tuhasa tiquiro usãre puti peori. Sa puti peoro Espĩritu Santore usã ñehetire ihũono nidi usãre. Ihũo tuhasa ohõ saha nidi:

—Yojopũ Espĩritu Santore ñehẽña mũsa, mũsa mehna ijiatiquirore.

23Apequina tiquina ñaũe yerire mũsa bogũ, sata ijietã. Sa ye apequina tiquina ñaũe yerire mũsa boeragũ ti bori ijisi, nidi Jesu usãre tiquiro buhenare.

Jesure masa wijiariquiroy Tomasu ihũahye

24Jesu usã watoapũ tiquiro bajuagũ Tomasu sũhũariquiroy tiquina ni pisuriquiroy usã mehna mariedari.



(San Juan 20.16)

²⁵Tiquiro sa mariedagū usā mehna cjēna tiquirore yahumedi.

—Mari puhtorore usā ihñau, ni yahumi usā Tomasure.

Usā sa ni yahuepegūta ohō saha nidi Tomasu:

—Tiquiro omocarine tiquina quē bihari coperire ihñedagu, ti coperire yuhū omo piria mehna ohbe tuhueragu “Ijirota masa wijiahya”, nisi yuhū. Sa yegu tiquiro pati pahma bato ijiri copere yuhū omoca mehna siō sōedagu, “Ijirota masa wijiahya”, nisi yuhū tiquirore, nidi Tomasu.

²⁶Ocho decori bato pari turi usā tiquiro buhena usā wuhupū ijii. Ti pjere Tomasu usā mehna ijiri. Ti wuhū bihari wuhū ijiri. Bihari wuhū ijiepegūta Jesu wuhupū sajā taro, usā watoapū bajuaduca saro ohō saha nidi:

—¿Ne, ijiajari mūsa? Quehnoano ijia mūsa, nidi.

²⁷Sa ni tuhasa, tiquiro Tomasure yahuri:

—Ihñaña yũhũ omocarine. Sa ye mũhũ omo piria mehna yũhũ omocarine tiquina quẽ bihari coperire ohbe tuhuya. Sa yegũ mũhũ omoca mehna yũhũ pati pahma bato ijiri copere siõ sõ tuhuya. “Poto ijierare”, niedacãhña. “Ijirota ijire”, niña mũhũ, nidi Jesu Tomasure.

²⁸Tiquiro sa nidi bato Tomasu yũhtiri:

—Mũhũ yũhũ pũhto ijire. Yaquiro Cohãcjũ ijire mũhũ, nidi Tomasu Jesure.

²⁹—Yũhũre mũhũ ihñari bato yũhũre wacũ tutuare mũhũ. Apequina pehe yũhũre ihñedapeta yũhũre wacũ tutuaeta. Sa ye tiquina mũhũ yũhdũoro bucueeta, nidi Jesu Tomasure.

Jesure mari masiatire ahri pũre ojoahye Ñu

³⁰Sa yero peye apeye gãhũre Cohãcjũ tutuaye mehna ye ihñori Jesu usã mehna ijiro. Tire tiquiro yerire ahri pũpũ ojoa pehoeradũ yũhũ.

³¹Sa ojoa pehoerapegũta ahri pũpũ yũhũ yahurire ojoaũ “Jesuta Cristo Cohãcjũ ohoriquiro ijire. Tiquiro potota Cohãcjũ macũno ijire”, mũsa ni masiatire. Sa yena mũsa tiquirore wacũ tutuana Cohãcjũ mehna mũsa sa ijiducuatire ojoaũ ahri pũre.

Jesu siete tiquiro buheyequinare bajuahye

21 ¹Came Tiberia wame tiri ditara dũhtũ cahapũ usãre tiquiro buhenare Jesu pari turi bajuari tja. Usãre bajuaro ohõ saha yeri tiquiro. ²Simo Pedro, Tomasu sũhdũariquiro tiquina niniquiro, Natanae Galilea yehpapũ ijiri maca, Canã wame tiri maca cjũno, apequina pũaro buheyequina, Zebedeo pohna pũana usã ohõpequinata cahmecoaũ.

³Sa usã cahmecoari bato Simo Pedro usãre ohõ saha nidi:

—Wahi wejẽgũ wahaũ niãa, nidi tiquiro.

—Usã gãhũ mũhũ mehna wahanatja, nii usã tiquirore.

Sa ni tuhasa buhaa wahaũ. Sa yena yucũsa mehna wahaũ. Ti ñamine usã quehnoano wahi wejẽ bohreenata ne ihcãquiro wahi wejẽdadũ. ⁴Bohrea parĩ quehagũ Jesu padũropũ ducugũ tiquirore ihñami usã. Sa ihñaepenata tiquirore ihña masiedũ usã. ⁵Sa yero tiquiro pehe usãre sinituri:

—¿Ne wahi wejẽajari mũsa? nidi Jesu.

—Ne wejẽdabutiaga usã, ni yũhtii usã.

⁶—Yucũsa poto pehe pahrẽ pehe doque ñoña. Tie pehe doque ñona wahi wejẽnata mũsa, nidi usãre.

Tiquiro sa nigũ tũhona usã tiquiro nidirota doque ñou. Usã doque ño tuhasagũta peyequina wahi sajãri. Peyequina wahi sajãgũ wẽñanũre yucũsapũ weje sãana cũedadũ usã. ⁷Sa yegũ yũhũ Jesu cahũogũ Pedrorẽ yahuu:

—Mari pũhtorota ijire siquiro padũropũ ducuriquiro, nii yũhũ Pedrorẽ.

Yũhũ sa nigũ tũhoro Jesuta tiquiro ijigũ masino, Simo Pedro tiquiro suhtirore sañari. Wahi wejẽno taro tiquiro suhtirore tu weriquiro ijinidi. Tiquiro suhtirore saña tuhasa, diapũ uhpu ñojoaa wahari. ⁸Sa yena usã

apequina buhena yucúsarü ijina, cien metro yoaro diapurë pahsarü usã. Sa yena wëñanüre wahi peyequina sajadüre yucusa mehna weje nujuau usã. ⁹Duhtu caharü usã wahã sagü, topü peca niti dihita asi cuñari peca ijiri. Ti peca bui tiquiro pühö cüriquirore wahire ihñau usã. Pã gühüre ihñau usã.

¹⁰Sa usã ihñagü ihñano Jesu usãre ohö saha nidi:

—Mianogã müsã wejëdiquinare meheñequinagã ne cãhtaya, nidi usãre.

¹¹Tiquiro sa nigü Simo Pedro pehe Jesu mehna ijiriquiro yucúsarü sajä, wëñanüre, bujüyequina wahi ciento cincuenta y tres wahi sajadüre weje majari. Peyequina wahi sajäepeta wëñanüre tuhredari.

¹²—Ihyana ahtaya, nidi Jesu usãre.

“¿Noa boro ijijari mühü?” ni sinituerü usã tiquirore. Usã puhtoro tiquiro ijigü masii usã. ¹³Sa yero Jesu peca caharü esaro, pãre ne, usãre itiri. Wahi gühüre itiri.

¹⁴Sa yero Jesu tiquiro masa wijiari bato paduropü bajuaro ihtia taha usãre tiquiro buhenare bajuaro nidi.

Jesu Simo Pedro mehna yahuducuahye

¹⁵Usã ihyari bato Jesu Simo Pedrorë sinituri:

—¿Simo Ñu macü, ahriquinare mühü cahño yuhduoro yühüre cahñajari mühü? nidi Jesu Simo Pedrorë.

—Puhto, mühüre cahñaja yuhü. Mühüre yuhü cahigü masine mühü, ni yuhtiri Simo Pedro.

¹⁶—Sa yegü ovejagãre tiquina nuno saha yeequinare buheya mühü, nidi Jesu. Sa ni tuhasa pari turi tiquiro Simo Pedrorë sinituri:

—¿Simo Ñu macü, yühüre cahñajari mühü? nidi Jesu.

—Puhto, mühüre cahñaja yuhü. Mühüre yuhü cahigü masine mühü, ni yuhtiri Simo Pedro.

—Ovejare cohteriquiro ovejare tiquiro quehnoano cohtero saha, yeequinare quehnoano buhe cohteya, nidi Jesu Pedrorë.

¹⁷Sa ni tuhasa pari turi Simo Pedrorë sinituri:

—¿Simo Ñu macü, yühüre cahñajari mühü? nidi Jesu tja.

Ihtia taha sa ni tiquiro sinitugü tuhoro Simo Pedro tutuaro bujua witiri:

—Puhto, mühü masi pehore. Mühüre yuhü cahigü masine mühü, ni yuhtiri Simo Pedro.

—Ovejare tiquina nuno saha yeequinare buheya mühü. ¹⁸Ijirota mühüre niája. Mühü wahmü ijigü mühü suhtire saña, mühü cahmediropü tinie tiahye mühü. Sa yerigü mühü ijiepegüta came mühü bucü ijigü, mühü omocarine mühü siódoqueogü apequiro mühüre suhtiro sãanota. Sa yero mühü waha dueropü mühüre neanota, nidi Jesu Simo Pedrorë.

¹⁹Sa nino Simo Pedrorë dühse waha tiquiro yariatire yahuro nidi. Camerü bucuro tiquiro wahagü sa yeye taye niahye apequina tiquirore. Cohãcjü

yere Pedro yeri buhiri apequina tiquiore wejẽne taye niahye. Sa yero Pedro yariatire yahuro nidi Jesu. Sa ni yahu tuhasa, ohõ saha ni nemori Pedrose:

—Poto yũhũ buheriro sahata yeya mũhũ, nidi Jesu Pedrose.

Jesu tiquiore cahĩniquiore buheriquiõ ahri pũre ojoariquiõ ijire

²⁰Tiquiõ sa nigũta Pedro pehe majare ihũadoqueo, yũhũre Ñure Jesu tiquiõ cahĩnogũ buherigũre tiquinare yũhũ nũnũ tãgũ ihũano Pedro Jesure sinituri. Yũhũ pehe Pedro ihũarigũ to pano ohõ saha nidigũ ijii. “¿Pũhto, mũhũre ihũa tuhtiyequinare ihũoatiquiõ pehe noa boro ijiagari tiquiõ?” ni Jesure siniturigũ ijii yũhũ. Ti pjere Jesu tiquiõ pari paha ihya dujii yũhũ. Sa yero yũhũre ihũano Pedro Jesure sinituri:

²¹—¿Pũhto, ahriquiõ pehe dũhse waharotari? ni sinituri.

²²—Tire mũhũre yahueraja. Ahri yehparũ yũhũ tojoa tato pano ahriquiõre ijiducugũ yũhũ yeatire masiedare mũhũ. Sa yegũ mũhũre yahueraja. Poto yũhũ buheriro sahata yeya mũhũ, nidi Jesu Pedrose.

²³Tire tiquiõ yahurire ijipihtiyequina Jesu yequina tiquina basi yahu sitemedi. Tire yahu siteye ohõ saha nimedi tiquina pehe: “Jesu tiquiõ cahĩniquiõ buheriquiõ yariasi”, ni yahu sitemedi yũhũre Jesu yequina tiquina basi. Tiquina sa niepegũta “Tiquiõ yariasi”, nino niedari jimedi Jesu. “Ahri yehparũ yũhũ tojoa tato pano ahriquiõre ijiducugũ yũhũ yeatire masiedare mũhũ. Sa yegũ mũhũre yahueraja”, nidi Jesu Pedrose.

²⁴Jesu buherigũ ahrire yahurigũ, ahri pũre ojoarigũ ijiaya yũhũ. Sa yena ahri yũhũ yahuye poto ijigũ masiaja mari.

²⁵Peye apeye gũhũre Jesu yeri. Tiquiõ yerire mari ojoa pehogũ ti pũri ojoari pũri peye waro wahaboaga. Sa ye ti pũrine mari ihbogũ esa tuhaeraboaga ahri yehpa. Wahpaa wahaboaga, yũhũ tũhotugũ. To puno tjire.